


أحمد يونس
نادر فوده

قبل البرايه
(الوقاد)



إهداء

إلى من اكتشف كل لحظة قيمته في حياتي
إلى من لم أستمتع بوجوده معي إلا قليلاً
إلى أبي الحبيب..

كنت أتمنى أن تكون معي في هذا اليوم لأرى دموع فرحتك الغالية وأنت
تمسحها بمنديلك القماش من أسفل نظارتك الطيبة السوداء..

- إلى امي وحببتي وسر وجودي
- إلى زوجتي وحببتي ورفيقة العمر
- إلى مكافأة ربي لي ابني معز
- إلى إخوتي سندي ودعمي وأسرهم
- إلى أبناء إخوتي «ولادي»
- إلى المعلمين «عزوتي وأهلي»
- إلى بيتي الكبير : الراديو ٩٠٩٠
- إلى الطالب المجتهد المناضل: أحمد يونس

أهديكم هذا العمل المتواضع...
داعياً الله أن ينال إعجابكم

أحمد يونس

مقدمة

أبدأ منين؟!

أبدأ باسمي وشغلي وهكذا زي ما وعدتكم؟

ولأبدأ بفلاش باك لمرحلة تعرفوها من حياتي؟

ولأفلاش باك أقدم، لمرحلة محدش يعرفها عني؟

طيب خلونا نتفق مبدئيًا إن دي أولى تجاربي في إني أتكلم عن نفسي

بشكل غير المعتاد اللي أنا وأنتم اتعودنا عليه دايماً..

أنا..

أنا نادر فودة الصحفي في جريدة عمق الحدث- باب ما وراء الطبيعة.

أنا الصحفي المغامر والمغامر اللي دايماً بيدور على أبواب مشاكل

ويدخلها من دون حساب.. يفتحها ويتوكل على الله ويدخل دون تردد.

اللي متابعتني أكيد عارف كويس مجال عملي الصحفي..

طيب خيليني أفكر اللي عارف وأعرّف اللي مش عارف..

أنا بالبلدي كده غاوي مشاكل.. مشاكل مش من أي نوع، يعني لا

سياسة ولا دين ولا جنس- ودي في الغالب الثالث بتاع وجع الدماغ

المعتاد-.. لكن أنا اخترت ما وراء الطبيعة، اخترت عالم غامض أسود

مظلم، الأنفاس فيه معدودة.. دقائق القلب فيه متسارعة. خُضت العديد

والعديد والعديد من من المغامرات، بعضها مرعب وبعضها غامض،

وبعضها فخ وبعضها لا تفسير له!

خلينا نتفق. كل متابعتي القدام من خلال أعماله الإذاعية مع أحمد
يونس وحلقات رعبه الشهيرة جداً اللي كان ليها الفضل الكبير جلا في إن
ملايين الناس تعرفني.

هتفق على إيه؟

العمل اللي بين إيديكم مش هيكمل أعماله الإذاعية بشكل حرفي
يعني ما تستغربش لو لاقيت شخصيات جديدة، وكم إن ما تستغربش لو
لاقيت بعض الأحداث مغايرة للقصص الإذاعية، وماندهش لو لاقيت
تفاصيل هنا أكثر بكثير عن أي حاجة سمعتها ليا قبل كده..

يعني بالبلدي كده..

هذا العمل اعتبره عملاً موازياً لكل مشواري (مشوار نادر فودة)
وتعاملوا معاه كعمل مستقل جديد ومختلف، دون العودة كثيرًا للقصص
السابقة.

اخترت لأول كتبي عنوان: نادر فودة (قبل البداية) علشان أحب جداً
الكل يعرف كيف كانت البداية وربما ما قبل البداية.

الفصل الأول

طفولة وفضول

طفل يبلغ من العمر ١٠ سنوات نشأ وترعرع في إحدى محافظات مصر العظيمة.. ما كنتش زي باقي الأطفال من سنه!

لا كورة ولا حتى (بلي).. المدرسة بالنسبة لي مرحلة من اليوم بالطول والعرض بتتقضي ويدور يومياً على حاجة مش عارفها بس مسيري معرفها.

وبدأت نقطة التحول وأنا في عمر الأحد عشر عامًا، بعد وفاة عمي شحاتة عبد الرحيم فودة..

بس قبلها خليني أكلمكم عن الأسرة.. أب وأم عاديين محبين لولادهم نادر وأمنية.. أمنية الأخت الكبرى.. اتربيت في بيت الجد معظم الوقت لكن نادر نشأ وسط والديه.. فكان ارتباطهم الثلاثة ببعض قوي جدًا.. وأمنية كانت بتفضل البقاء في بيت جدي وجدتي على العيش معنا.. عشان اللع إلي شايغاه هناك.

طب نرجع ثاني لنقطة التحول، مشهد سريع خاطف:

شحاتة عمي مات، والبيت اتملا صراخ وعويل، وإذا بالأسرة تغلق الباب على عمي وكأنهم قررروا يجبسوه لوحده للمرة الأولى، وكان كل واحد يقرب من باب الأوضة، والدي يجري يمنعه وكأنه هيرتكب جريمة!

ولكن الفضول قاتلني.. وحصل المطلوب؛ زوجة عمي جريت
وفتحت الأوضة، وقعدت جنب السرير اللي عليه جثمان عمي شعاعه
وهاتك يا صويت.. ناس كثير دخلت وراها يمنعوها ويشدوها بخرجوها.
اللي يقول لها حرام عليكى.. واللي يقول لها استغفري وقولي إننا لله وأنا
إليه راجعون..

أما أنا فانتهزت الفرصة ودخلت وسط الزحمة واستخيت تحت السرير
لحد لما الكل خرج.

فضلت تحت السرير، وقتها كنا المغرب.. وزى أي طفل غلبني النعاس
ممكن لساعة أو أقل..

وأنا نايم تحت السرير، بدأت أسمع همس في وداني غير مفهوم..

وبدأ الهمس يتضح شوية بشوية، وبدأت الكلام بوضوح:

- نادر.. نادر، اخرج من الأوضة..

نادر نادر، الأوضة ضلمة، اخرج..

الصوت كان مرعب جداً خلاني اتخضيت وفتحت عنيا فجأة وصحبت،
الأوضة كانت ضلمة تماماً بالفعل..

أنا مش شايف حتى إيدي، حبيت أقوم، راسي اتخبطت في السرير،
أدركت وقتها إني تحت السرير..

خبطة راسي في السرير هزته لكن مش لدرجة إن السرير يفضل يتهز
لحوالي نصف دقيقة بهدوء مخيف!

بعد السرير لما سكت تماماً، بدأت أزحف على بطني بالراحة، وخرجت
وقفت واتوجهت ناحية الأباجورة على الكمودينو علشان أنورها..

المشوار للأباجورة كان زي طريق الألف ميل..

شُفت في الضلمة ما لا عين رأت.. أشكال هلامية سوداء كَوْنها
الظلام.. وحووش مرعبة.. عيون ناظرة.. عبايات سوداء.. سيوف..
خناجر.. ومناجل قاطعة..

كل ده حوالي.. الضلمة كفيلة إنها تصورلك عالم كامل من الوحوش
والغيلان.

فضيلت أتحسس طريقي للوصول للكمودينو لكن رجلي داست على
حاجة لزجة جداً. رفعت رجلي بسرعة فأنكعبلت ووقعت على السرير..
أنا مش بس وقعت على السرير.. أنا وقعت على جثة عمي شحانة..
لاقتني فجأة فوق الجثة، وحاولت أقوم بدون أي فائدة وكان الجثة
مسكت في، كل ما أحاول أقوم أقع تاني..

الدنيا ضلمة والجثة ملتصقة بي، وأنا توازني اختل تماماً، وماتنسوش في
الأخر إني طفل..

بدأت أصرخ: يا بابا.. يا بابا.. يا بابا..

محدث سمعني بس بدأت أستعيد توازني، ووقفت، وبدل ما أهرب،
وقفت وولعت الأباجورة وبدأت أتأمل جثة عمي.. أول حاجة حطيت
صباغي على وشه، وبدأت أضغط علشان أشوف أي رد فعل.. بعدها
خبطت بإيدي على وشه وكررت الضربة أكثر من مرة لحد ما تقريباً
ضربته بالقلم.. رفعت إيد زى ما يبجي في الأفلام ورميتها.. بس اللي
حصل إنها ما نزلتش زى ما يبحصل في الأفلام.. إيد عمي فضلت متعلقة
في الهواء، وحصلت أول صدمة، إيد عمي الثانية لقيتها بتتحرك ويتحاول
ترفع هي كمان.

نور الأبا جورة اتطفأ، ومن الخضة اتكعبلت ووقعت تاني على جثة عمي، لكن إيده مسكتني فرجعت أصرخ تاني وتالبت..
باب الأوضة اتفتح ولقيت بنت عمي بتصرخ وتقول.. أهو.. نادر..
أهو..

دخل والدي وولع نور الأوضة

ولقتهم بصوالي باستغراب واستنكار شديد.. لكن نظراتهم تبدلت، وبدأوا يبصوا لجثة عمي شحانة ووشوشهم اسودت فجأة، ومحدث انحرك من مكانه وكأنهم اتشلوا بشكل جماعي مفاجئ!
بدوري بصيت لوش عمي.. وباريتني ما شفته..

عمري ما هنسى عينين عمي المفتوحة على الآخر وشفايفه المرفوعة، وسنانه الظاهرة اللي طابقة على بعضها ومخشبة.. صرخت تاني وتالت وعاشر لحد ما شالوني من عليه وبدأت أسمع جمل من عينة:

* هو إيه اللي دخله هنا؟

* هو انتوا ما قفلتوش عين شحاته ازاى من وقت الوفاة..

* لا والله قفلناها وكنار ابطين منديل على وشه وعلى راسه علشان «بُقه» ما يفتحش..

* الأوضة ما ينفعش تكون ضلمة كده..

* شغلوا سورة «يس» أو افتحوا إذاعة القرآن الكريم.

- سندوني واتلفت له ومما يبحاولوا يقفلوا عينه بصعوبة لحد لما اتقفلت وشدوا الملاية وغطوا وشه، ولكني سُفت عينه بتفتح والملاية خلاص بتقرب من وشه!

ماعلقتش وطلعت معاهم الصالة، وبدأت أسمع وصلات تويخ

وتهزيء من البعض، ونُصح وإرشاد من البعض الآخر،
وصوت يقول لأمنية أختي:

- روعي بيت جدك خليكلي معاهم..

وصوت يبسال والدي: هو أنت هتسكت، لازم تعمل لابنك «طاسة
الخضة».

فسأل أحد الموجودين عنها إيه، فأجاب والدي:

- دي عادة مصرية قديمة بتعتمد على أدوات معدنية ولبن وتمر، وإن
الشخص المخضوض يستحمي في مكان مكشوف بس بشرط القمر يكون
مكتمل قبل أذان الفجر بساعة.. وبعدها يبهدا الشخص تمامًا، وكلام كتير
من ده وده، وأصبحت أنا حديث القرية!

لكن الكلام كان بالنسبة لي عامل زي صدى الصوت.. أنا كنت في حنة
تانية خالص..

أنا كنت بدأت أفكر في العالم الآخر، وإن الموت ليس مثلما كنت أظن..

الموت هو مرحلة أخرى تمر بها الروح.. ويجب عليّ إني أدرسها وأفهمها
أكثر.. وماتنسوش إني لازلت طفل غريب الأطوار.

وكان القرار لازم أحضر دفن عمي..

مش ممكن ومش منطقي إن طفل في السن ده تفكيره في الحاجات دي..

لكن ده اللي حصل.. وبدأت أصوات مايكرفونات الجوامع بعد صلاة
الفجر زي ما عندنا بيحصل تقول الآتي:

بسم الله الرحمن الرحيم

إن لله وإنا إليه راجعون.. توفي إلي رحمة الله.. المرحوم بإذن الله.. شحاته
عبد الرحيم فودة.. والدفنة بعد صلاة الظهر من مسجد العباد الصالحين

والعزاء في دار ضيافة المركز والبقاء لله.

صوت اللي كان بيعلن وفاة عمي في المسجد القريب من البيت نحس إنه هو أصلاً كان ميت، صوته عجوز ونخيف وكأنه بيعلن الوفاة من داخل قبره.

وبدأت المساجد الأخرى تعلن الخبر، ومع أصوات النداء دي، تعالت صرخات الستات في البيت تشق ظلام الشارع..

زي ما يقولوا كانت ليلة سودا محدش نام منهم، دا غير اللي أنا سُفنته وحصلتي..

بعد صلاة الفجر، لقيت عربية منزلة كراسي وبتترص قُدَّام البيت..

سمعت والدي يقول للراجل اللي بيتزلهم: هتيجي بعد ثلاثة أيام تاخدها إن شاء الله.. حياتك البقية

منظر غريب جداً، لو أنت غريب معدي في الشارع ممكن تفتكر جداً إن البيت ده فيه فرح من منظر الكراسي المرصوفة برّه، ما احنا كده بنيان مرصوص في الفرحة وفي الحزن كمان.

بعد الشروق بدأ أهل القرية من الرجال يحوا البيت، وبدأ الكلام بين عمي وواحد قريننا يلفت نظري ويشدني، سمعت الحوار كله..

- يا مصطفى.. (مصطفى دا اسم والدي بالمناسبة).

- نعم يا حج مختار.

مختار: حد فتح التربة؟

مصطفى: لأ نزبه هياخد المفتاح وهبروح حالاً.

مختار: طيب خليه يشتري قفل باب جديد، أنت عارف التربة ما

انفتحش من إمتى؟

مصطفى: لا مش فاكرك.

مختار: دي يجي من عشرين سنة، من يوم سيدك فودة الكبير، وأخوك وصى يتدفن فيها مع سيده، دي وصية، ومارضيش يتدفن مع أبوك!

والدي مصطفى: هي هتفرق يعني! آهي رمية في التراب يا حاج مختار.

مختار: لا ازاي بقى هو وصى، ودي وصية واجبة التنفيذ.

مصطفى: ماقلتش حاجة، آدي نزيه أهوجه

نزيه: صباح الخير يا عم مصطفى (وهو بيتاوب).

والدي مصطفى: صباح الخير..

نزيه: لا مؤاخذة يا حاج.. البقاء لله..

مختار: اصحى كدا وفوق، أنت عارف هتعمل إيه يا نزيه؟

نزيه: قولي يا خال وأنا تحت أمركوا.

مختار: هتروح وتاخذ معاك أجنة وشاكوش لأن المفتاح أكيد مش

هيفتح، ومصطفى هيديلك قفل جديد احتياطي علشان لو كسرت

القديم، وخذ معاك زيت ومقشة.. هتزيق القفل القديم قبل ما تجرب

تفتحه، وهتكنس كويس قدام التربة، عاوزها زي البلاط.

ولما تدخل التربة سمي وسلم واستأذن إننا هندخل شحاته النهارده..

واكنس بالراحة و لولا قيت أي بواقى من أي حاجة سبها مكانها، ده سيدنا

فودة الكبير.. إياك تزعله.

إوعى تقرب من أي حاجة باقية ده لولا قيت.. انشالله حتى لوحتت

داية من كفته الله يرضى عنه وعنا.

نزيه: حاضر يا خال، في حاجة تانية؟

والدي مصطفى: بُص، بعد الدفنة عاوزين نجيب قصاري زرع
ونحطها قدام تربة عمك شحانة..

نزيه: ولا قصاري ولا حاجة، هُما علتين سمنة بنزرع فيهم صبار
ويتبقى جميلة.. القصاري بتسرق.. أو العيال بتكسرهما.

مختار: يلا طيب روح وكفاية رغي.

نزيه: طب مفتاح التربة فين؟

والدي مصطفى: آهو.. وخلع من جيبيه سلسلة مفاتيح قديمة وشارر
على أقدم مفتاح فيها وقاله آهو دا يا نزيه.

نزيه: خُذ المفتاح وطلّع المنديل وعطس كذا مرة واستأذن ومشي
ومسح المفتاح بنفس المنديل!

والدي لاحظ اهتمامي بالحوار وقال: أنت كويس يا نادر؟

نادر: أيوة أنا كويس..

والدي: متأكد؟

نادر: آه بس أنا لي طلب..

الوالد مصطفى: إيه يا نادر؟!

نادر: بس من غير زعيق..

والدي مصطفى: مش كفاية اللي عملته امبارح.. أنت إيه اللي دخلك
تنام جنب عمك أنت فاكراه نايم، أنا عارف إنك بتجبه، وكل حاجة.. بس
ده مات يا ابني.. فاهم مات يعني إيه؟!

مات.. يعني ماينفمش تنام جنبه.. عمك كان تعبان وربنا ريحه..

نادر (عجبني تحليل والدي): حاضر فهمت..

والدي مصطفى: طب قولي عايز إيه؟
نادر: عايز اروح التراب مع نزيه.. وأدخل...
والدي مصطفى بصوت عالي: أنت اتجننت عاوز تدخل التربة.. تدخل
مختار.. خير يا مصطفى فيه إيه؟
والدي مصطفى: اتفضل، الحلو عاوز ينزل التربة مع نزيه..
مختار: خلاص سبهولي يا مصطفى وروح شوف أنت الناس اللي جاية
تعزيك..

غادر والدي وقرب مني عم مختار، وقال: تعرف يا واد يا نادر، أنت
فكرتني بنفسي وأنا قدك كنت بروح بالليل أحدف طوب على التراب
عشان أخلي الميتين يطلعوا.. وكنت زعلان على أبويا، وقلت كدا ممكن
أرجعه تاني لو صحي من الطوب.

نادر: بس أنا عارف إن الميتين مش هتطلع، أنا عاوز بس أشوف التربة
من جوّه.

نظرة مرعبة من مختار: طب إيه رأيك إني هخليك تدخل التربة وتدفن
عمك كمان..

تهللت أساريري فرحًا وفضلت لازق في عمي مختار طول الوقت..
بس أمنية أختي لقيتها جاية تقولي: تعالى معايا.

طلعنا فوق سطح البيت وشُفنا كل الأجواء من فوق.. عرفت في اليوم
ده معنى اليوم الأسود بكل معنى لذلك المصطلح.

شُفت نساء متشحات بالسواد ويتوافدن من كل أطراف القرية ويدخلوا
البيت في أسراب سوداء.. أما داخل المنزل فأقسم إني ماشفتش غير اللون
الأسود ممتد من بوابته ومدخل البيت وفنائه، وبعدها اقتحم اللون الأسود
كل المنزل زي الوباء المميت..

فضيلنا فوق نتفرج لحد ما شُفنا حاجة خلتنى نزلت أجري .

قبل الظهر بساعتين، لاقيت ثلاثة كده بدقون داخلين البيت وشايلين شنط سودا. بصراحة خُفت.. وبدأت أركز.. سمعتهم يقولوا: جنبنا ورق الصدر والمسك..

وهنا كانت أول مرة أعرف حاجة اسمها غسل الميت.

ودخلوا الأوضة ومعاهم أبويا وعم مختار وابن عمي، وقللوا الباب، كنت هتجنن وأشوف.. لحد ما الباب اتفتح والدي خرج منها من البكاء، وفضل يقول: آه يا خويا آه يا شحاتة.. يا ضهري..

الباب اتساب متوارب فسرقت النظر جوّه وشفيت رجل عمي وبعدها وشه.. أصفر شاحب.. خلّى دقات قلبي تسارع.

ما أقدرش حتى أقول إنه أصفر، أنسب كلمة هي لون الموت..

كان شبه النايمين، لكن دقات قلبي المتسارعة كانت بتقول شيء تاني.

واحد من المغسلين اتحرك ووقف قدام وش عمي، وبعدها اتحرك من قدامه تاني فإذا بي أجد عمي عنيه مفتحة!!

أيوة مفتحة وبيضا تمامًا ومفيهاش النبي الأسود خالص، حسيت بشعر رأسي كله بيوقف وحرارة انتابت جسمي كله ومع كل هذه الحرارة رعشة عنيفة اجتاحت جسمي بالكامل انتهت مع الباب وهو بيتقفل من جوّه.. اتقفلت شاشة عرض أول فيلم رعب حقيقي أشوفه في حياتي .

الساعة دلوقتي ١١ صباحًا، ودخل مجموعة شباب شايلين نعش الأوضة اللي عمي فيها ودخلت المرة دي عادي لاقيت عمي عبارة عن نخدة.. بتفكيري وإدراكي وقتها، شُفت عمي كيس نخدة كبير وهو جواه.. الكفن الأبيض طبعًا ده المقصود.. لكن هو ده حجم إدراكي وقتها.

شالوه حطوه في النعش.. وهم يقولوا بالراحة - الراس الأول - سقوا الله.
وبدأت تتعالى صرخات الستات «الفاصل المعتاد في ذلك اليوم الأسود»
وظلعنا ييه على الجامع.. استئينا.. صلينا الظهر وبعدها صلينا الجنازة
وبعدها توجهنا بالنعش للمقابر عندنا
(أنتم السابقين ونحن اللاحقين)
ده النطق بالظبط اللي الحاج مختار قاله واحنا داخلين المقابر وأنا ماسك
إيده وإيدي ضاغطة على إيده جداً وكأني بحتمي بإيده وبتظمن بها.
ومشينا بين شوارع المقابر لحد لما وصلنا لمقابر عائلة فودة.. وأنا عمال
أتأمل المقابر..

- المقابر عندنا غير عندنا كثير..

ما بتنزلس لها بسلم هي عبارة عن أوضة فوق الأرض بنفتح الباب،
ونحط الميت ونقفل عليه..

الغريبة واحنا ماشيين بالنعش بقت فجأة الناس تغير اتجاهها فيحصل
الخبطة ونقف ونرجع نكمل مشي.. لدرجة إننا فيه شارع في التُّرب مشينا
وخلصناه ورجعنا جنبناه من الأول تاني.. والناس واخده الموضوع عادي
دون اعتراض.

شدت دراع عم مختار وقلت له هُما يقولوا سيوه يسلم ليه! أنا مش
فاهم!

مختار: عمك بيختار الشوارع إلي فيها حبايبه واللي سبقوه وجم هنا
قبله فيسلم عليهم زي الحاج رياض والحاج رجب ومراته والحاج محمد
والحاجة أنيسة سيه يسلم يا نادر ويوصلهم سلامنا كمان.
بعدها وقفنا قدام التربة بتاعة فودة الكبير..

الحاج مختار شال الجثة، وقال إيدك معايا يا نادر وكان دي الإشارة

شلت معاهم ودخلنا التربة.
ريحتها صعبة أوي.. ريحة مزيج من الرطوبة على عفن على روابح ثانية
متبقية.. ريحة الموت!

الحاج مختار: لفوا شحاته على القبلة يا شباب.
نيمناه على الأرض، وبدأ التُّرْبِي يعمل أكثر من حاجة رفع راسه بالراحة
وزق من تحتها شوية تراب، وجه عند الكفن عند الوشس تحديداً وفك
الكفن من غير ما يكشف وشه.. كل ده وأنا متشح لأول مرة أخوض تجربة
زي دي..

وصاح الحاج مختار: مع السلامة يا شحاتة.. السلام أمانة لسيدي
فودة، وسمعت صوت والدي مع السلامة يا أخويا لحد ما أجيلك.. مع
السلامة يا حبيبي.. سلم على أبويا.

وخرجنا واثرزع الباب وصاح أحدهم:
- اسألوا لأخوكم التثبيت إنه الآن يُسأل.

ومشينا وسبناه وحيد..

الله اعلم مصيره إيه؟ لكن المهم إننا سبناه زي ما سبناه قبل كده وقلنا
عليه باب الأوضة.. وأنا دماغني تشبعت جداً باللي دخلها من معلومات.
مرت الأيام والعزاء خلص.. وفي تالت يوم العزا سمعت عن حد
مات تاني من القرية اتسحبت من البيت..
لقتني لا إرادتي رايح الدفن، وفضلت أدخل وسط الناس لحد ما
وصلت للقبر ووقفت برّه.

التربي وأهل الميت فتحوا القبر وعملوا نفس اللي اتعمل مع عمي.
كنت واقف عند باب القبر أتأمل بتركيز أكبر من المرة اللي فاتت

ويجراًة أكبر.

وعينيّ عبارة عن مرصد يراقب كل ما يحدث ويسجل بأعلى جودة،
وتساءلت هو أنا كنت جوه زي الناس دي كده وأنا بـدفن عمي!
وقررت وقتها إن الموضوع مش هيكون مجرد تاني وآخر مرة أبداً..
عدت للتجربة دي وفضلت فترة أكرر.. أكرر الموضوع ونسيته.. لحد لما
دخلت لمرحلة جديدة بتجربة جديدة تانية خالص مرحلة عمر ١٥ سنة-
١٧ سنة تقريباً.

الفصل الثاني

الحاج مختار مارد المصباح

بطلة هذا الفصل هي مروة بنت خالتي .. مروة عمرها ٢٢ سنة، ومشكلتها بالنسبة لهم عندنا كانت مشكلة عويصة جداً.

مروة اتقدم لها عريس رفضته، وبعده ٢ كمان رفضتهم (بارت) أبوه بارت وهي عندها ٢٢ سنة!!

خالتي صفية جت عندنا البيت لوالدي ووالدي ودار الحوار الآتي:

«ملحوظة»:

- الحوار ده هتلاقيه دار عندك أو عند حد من قرابيك أو معارفك فهتحمس بالألفة جداً وأنت بتقرأه.

خالتي صفية: يا مصطفى أنا جتلك تلحقني، أنت مكان المرحوم ومحدث واقف معانا من وقت وفاته غيرك أنت وأختي.

والدي: خير يا صفية إحنا أهل وانتوا أمانة في رقابتي.

صفية: مروة بتضيع مني! يا مصطفى!

والدي: يا ستار يارب..

صفية: البت حالها اتبدل من ساعة ما فسحنا الخطوبة مع مبي زفت
أكرم.. جالها بعده كذا واحد، البت ما بتديش حد فرصة تقعد حتى
معاهم.. مجرد ما بتسمع السيرة بتقلب وتزعق وتقول مش هقابل حد..
زي المجانين..

والدي: طب مش يمكن عايزة حد معين يا صفية؟

صفية: دا أنا كنت دبحتها..

والدي: ادبحتها ماشي بس ماتر جعيش تصوتي وتقولي البت مالها.

اتلخبطت صفية: طب والله سألتها وكنت خايفة قامت مزعقة وفضلت
تصوت: «مش عوزة أتجوز خالص» لحد امبارح يا اخويا لاقتها بتقولي
وهي بتضحك: أنا أكرم يبجي في بالي كتير وحاجة بتقولي أرجع له.

والدي: طب سهلة ممكن أتدخل أنا وكأني بتكلم من وراكي وأرجعهم
لبعض .

صفية: المصيبة إنها قالت لي يا ماما أنا مش طايقاه ويكرهه ومش
عارفة ازاي فكرت تاني فيه.. بس مسيطر على تفكيري!

-أنا بقى كنت فين من الحوار ده.. كنت قاعد في ركن في البلكونة
مستخبي وسمع قصة حياة مروة بنت خالتي المجنونة.. اللي مابطقهاش
أصلاً.. وشايفها مجنونة ومتخلفة كمان!

وسمع باقي الحوار:

خالتي صفية: بالله عليك يا أبو نادر شوف لنا شيخ أوحد بقرا عليها،
البت حالها اتبدل وعمالة تخس! وحياة أمنية بتك!

- بالمناسبة مروة ما شاء الله ممكن تاكلك أنت شخصياً.. قالك تحس!
والدي: ما أنا لسه شايفها الأسبوع قبل اللي فات وكانت ما شاء الله
أذ الفيل.

والدي كان بيحاول يفك شوية من التوتر.

صفية: والله لو شفتها تصعب عليك..

والدي: خلاص أنا هكلم الحاج مختار ونشوف هنعمل إيه!

{الحاج مختار تحس إنه مفتاح اللغز دايمًا}

وبمكالمة تليفون مفيش نص ساعة وكان الحاج مختار موجود وتكرر
الحوار اللي دار بين والدي وخالتي صفية بالكامل.

بس اللي حكيت المرة دي والدي وخالتي مع إضافات عجيبة جدًا
وصلت تقريبًا إن البنت مابتاكلش من سنة ونص!! وإنها ممكن تمشي وهي
نايمة وممكن تصور قتيل، وأنا برّه قاعد بضحك وأستمع بكذب الستات
المعهد «أصل الستات فعلاً ما يعرفوش يكذبوا».

الحاج مختار: طيب هاتوها وهنروح للشيخ لطفي.

خالتي صفية: لأ دي لو عرفت ولآ جبت لها سيرة هتفضح الدنيا دي
بقت مخبولة.

الحاج مختار: طب والعمل.

والدي: بصوا أنا عندي اقتراح انتي هاتيها هنا واحنا هنجيب الشيخ
لطفي ووقتها ريك يجلها.

الاقتراح لاقى استحسان من الجميع.. وخلصت القعدة بخروج ماما
للبلكونة وتهزيقها لي وهاتك يا قرص «من اللبلايب»

وانتهت القعدة..

وأنا بدأت أفكر بما إني انفضحت.. إزاي محضر قعدة الشيخ لطفى مع مروة.. لازم حل.. ما هو لازم أتفرج وأشمت في مروة شوية.

- بس عرفت!

مكنش فيه غير الحاج مختار أبويا الروحي.. اللي مجرد ما قلت له عينيه لمعت وابتسم ابتسامة شريفة وقال: يا واد أنت بتفكرني بشبابي وبدأ يسرد بطولاته، وأنا عامل مهتم عشان عارف إنه الوحيد اللي هيقدر يدخلني معاهم وهسيه يرغي شوية وهاخد اللي عاوزه في الآخر.

كلامي معاه كان قدام بيته وانفاجئت لما قال إحنا هنجي بعد العشا وخالتك وبتها هيجوا بعد المغرب.. مكتش أعرف إن المعاد اتحدد كمان.

رُحت بسرعة كنا العصر.. وتعمدت أكون مطيع جدًا وأساعد في البيت أذما أقدر عشان يرضوا عني.. والباقي على عمي مختار زي ما وعدني.

ومع أذان المغرب كانت خالتي صفية جت ومعها مروة واللي بدون أي مبالغة فعلاً انحولت.

وشها سود خست جدًا وده مصلحة الحقيقة..

الحزن مسيطر عليها.. مش مركزة.. تايبة، والدي وهو يسلم عليها فضلت بصة له ومامتش إيدها فأخرجت والدي قامت خالتي شدت إيدها وخلتها تسلم فبصت لوالدي وقالت بتوهان: أهلاً يا عمي.

من الآخر: مابتش مروة اللي دايمًا بناكف في بعض!

حاولت أنكشها بأكثر من طريقة كانت بتبتسم ابتسامة باهتة جدًا وماترودش. ماما لما شانتها دخلت المطبخ بسرعة وعيطت ونادت على والدي وقالتله: صفية ماكانتش بتبالغ يا مصطفى.

وردة والدي: أنا مصدوم من شكلها.. البت اتبدلت! أنا خايف تكون
عيانة. ظهر صوت خالتي صافية بالراحة واحنا واقفين:

- وديتها يا مصطفى لدكاترة باطنة وأنف وأذن وحنجرة وقلب
وعملت تحليل الفيروس.. آخر حاجة قالوا لي اكشف على الأذن الوسطى
كل حاجة سليمة!

والدي: بصي ومن غير زعيق ننزل بيها على مصر نوديا لدكتور نفسي.
خالتي: موافقة بس بعد ما الشيخ يشوفها.

والدي: طب يلا اطلعوا كلكوا عشان ماتاخذش بالها.

قعدنا كلنا نتكلم في مواضيع نضيع بها الوقت لحد العشا والكل ساكن
ومستي جرس الباب.. وصوت عقارب الساعة مستفز ونقط ميه حنبة
الحمائم يحرق الدم.

وصوت أنفاس مروة غير المنتظمة لافت للنظر.. دقائق تمر بيته
ميت.. حتى أختي ماكانتش موجودة تقعد معاها تسليها شوية.
لحد ما جرس الباب رن الكل اتنفض في مكانه.. وأنا قمت بسرعة
أفتح الباب.

ودخل عم مختار ومعاها واحد أعرفه شكلاً بشوفه في المسجد أحياناً
وأحياناً في المقابر وآخر مرة سُفته كان يوم صلاة العيد اللي فات الناس
كانت كلها متجمعة حوايه.. آه هو ده بقى الشيخ لطفي..

دخلوا، فبابا طلب من الحريم يدخلوا أوضتي جوّه..

وقعدنا إحنا الأربعة.. فبابا بص لي وقال:

والدي: نادر قوم اتفرج على التليفزيون في أوضتي أنا ووالدتك.

أنا: مش عاوز أتفرج.

والدي: خلاص روح عند ولاد عمك ولا عند جدك.. أختك هناك.

أنا: مش عاوز أروح يا بابا.. أنا هقعد معاكوا.

والدي: قلت روح بيت عمك، أنت راجل ولازم تزورهم.

أنا: بابا أنا عاوز أشوف اللي هيحصل.

والدي برق عينيه: «تشوف إيه هوفيلم!»

تدخل الحاج مختار: مصطفى ابنك كبر وما شاء الله عليه جريء

ويفكرني بشبابي ماشفتوش وهو بيدفن عمه وكان لسه عيل!

والدي: يا حاج مختار دي حاجة ودي حاجة، هو أصلاً مش فاهم

حاجة.

تدخلت قائلاً: لأ فاهم مروة عليها عفريت والشيخ هيطلعه.

الحاج مختار ضاحكاً: سُفت.. آهو عارف وجابها لك على بلاطة..

ووالدي فضل لمدة طويلة مش مستوعب إني قولتها له في وشه كده إني

فاهم كل حاجة وعارفها..

واني مش عيل ولا حاجة..

وبدأوا يرقبوا الموضوع هيمشي ازاي وخرج الشيخ لظفي شنتته.

طلب من والدي ينادي على والدي..

حضرت والدي

فإذا بالشيخ يعطيها إزازة صغيرة وقالها اخلطها بلتر ميه وإداها وكيس

أسود فيه ورق شجر قالها اغليه في حلة ميه كبيرة.

دخلت والدي وعادت بعد نُص ساعة معلنة انتهاء المهام، طلب منها
تخط المية الأولانية في زجاجة مية معدنية وتجهها وتسبب الثانية في المطبخ.
بعدها دخل والدي الأوضة وإحنا بره عند باب الأوضة وساب
الباب مفتوح، كانت مروة وخالتي صفية جوّه.

فاقرب والدي من مروة وقالها:

والدي: مروة حبيبي انتي عارفة إني مكان والديك.

مروة: خير يا عم مصطفى فيه إيه؟

والدي: الشيخ لطفني.. مالحقش يكمل كلامه.. قامت مروة وقتت.

مروة: شيخ ليه؟ عملتها يا ماما؟ شيخ ليه؟ حد قالك عليّ بقطع في

شعري!

والدي: مروة، أنا مش شايف داعي للثورة دي كلها.

الشيخ لطفني خبط على الباب ودخل وقال وهو داخل: بسم الله وبحوله

وقوته نستعين..

أقسملكم بالله مروة عينها عملت حركة غريبة جداً.

بالظبط بصت للسقف وبعدها لأركان الأوضة.. عينها اتحركت

بسرعة شديدة جداً.. وهي ساكنة.

بغضب الشيخ لطفني قال: لا مفيش مكان تروحه.. اهدا كده خيلنا ننفق

وتخرج بالذوق أحسن.. الشيخ لطفني كان بيتكلم بنبرة قوية تخوف جداً.

مروة قعدت في هدوء واستسلام.

خالتي قامت خرجت من الأوضة بإشارة من الشيخ لطفني.

وفضل في الأوضة والدي والشيخ لطفني، وأنا وعم مختار واقفين بره،

لقيت عم مختار زقني بالراحة وقفل الباب بهدوء وفضل بره.

دخلت خالتي ومعاها ملايه ما أعرفش ليه .. المهم قعدت جنب مروة،
والشيخ لطفني بدأ يقرأ آيات كثير من القرآن فاكر منهم تحديداً المعوذتين وآية
الكرسي ففضل بقرا ومروة كانت ساكنة لحد ما خلص قالها اقفي يا مروة..

بعدها وقفت

قال: بسم الله بسم الله بسم الله ..

لواللي عليها مسّ ترفع إيدها اليمين

ولو اللي عليها جن من سحر ترفع إيدها الشمال

فرفعت إيدها الشمال ببطء

فبدأ الشيخ يزعق: يلا خلصوني فرفعت إيدها أسرع

قالها: خلاص نزليها يا مروة .

اقعدي يا مروة

بدأ يقرأ أكثر ويبدأ يقول بسم الله ..

اللهم أعنا على تطهير جسم مروة من كل مس أو سحر أو شر وأذي

بدأت مروة عينها تنقلب ودماغها ترجع لورا.. سندها بابا وخالتي
وقعدوها على كرسي وميلت رأسها لورا وشبه نامت.. الشيخ لطفني كمل
قرايته للقرآن والأذكار..

بدأت تتكلم بصوت ضعيف، بقيت مركز عشان أفهم:

كانت بتقول: خلاص أنا تعبت خلاص.

الشيخ لطفني: هو إيه اللي خلاص.. انت إيه اللي جابك عندها؟!

مروة: خلاص أنا تعبانة يا ماما..

عملت مروة بإيديها حركات كأنها بتحوش حاجة جاية عليها.

فضل الشيخ بقراء، وقال بأمر الله وبحوله وبقوته أمرك بالخروج..

مرورة ساكنة خالص

الشيخ لطفني: اسمك إيه؟

مرورة بصوتها عادي جداً: إدريس..

الشيخ لطفني: طب يا إدريس اخرج دلوقتي.

مرورة: ساكنة..

الشيخ لطفني: طيب كده؟ وبدأ يقرأ أكثر..

ها يا إدريس..

مرورة: بدأت تتنفس بسرعة شديدة وصدرها يطلع وينزل بسرعة..

الشيخ لطفني: يلاً اخرج وماترجعش تاني أبداً..

مرورة قامت فجأة وقفت.. أنا أقسم بالله قلبي وقع في رجلي..

- مرورة بصت لكل واحد واحد وبصت لي أنا بصة عمري ما هنساها

الشيخ لطفني بدأ يزعل كأنه بيتخانق مع حد يعرفه.. مرورة اترمت على الكرسي، وطلب من خالتي تغطيها بالملاية.. وبدأ يقول أدعية كبير، وبدأت مرورة تتشنج وتصرخ، وبدأ صوتها يخشن ويتخن وتقول كلام غير مفهوم نهائي، كلام يشيب من أسلوب الكلام ونبرة الصوت.. أنا نفسي كنت خايف منه.

أما مرورة فعملت زي أفلام الرعب وقالت للشيخ لطفني وهي بتصرخ:

لأ.. ماتحاولش.. هموتالك.. قبل ما اخرج منها.

الشيخ لطفني: أقسم عليك بالخروج.. أقسم عليك بالمغادرة.

مرورة: خلاص.. خلاص.. ارحمني..

الشيخ لطفي: بسم الله الرحمن الرحيم : (وما خلقت الإنس والجن إلا
ليعبدون)

اخرج الآن..

بسم الله الرحمن الرحيم:

«والصافات صفا فالزاجرات زجراً فالتاليات ذكراً إن إلهكم لو احد رب
السموات والأرض وما بينهما ورب المشارق»
- زادت تشنجات مروءة..

الشيخ لطفي: يا معشر الجن، أناشدكم بالعهد الذي أخذه عليكم
سليمان بن داود أن لا تظهروا لنا ولا تؤذونا.. ومن تجاوز منكم العهد
فعليه من الله ما عليه.

وظلع الشيخ لطفي الإزازه اللي ماما حطيت عليها الإزازه الصغيرة
ورشت على وش مروءة..

مروءة كأنها اترش عليها مية نار.. فضلت ترعش، وبعدها وقعت
على الأرض.. وخالتي بدأت تعيط وتصرخ.. وحملها والدي وأنا ساعدته
ونيمناها على السرير وطلب من والدتها تسيبها نائمة.

الشيخ لطفي: بصوا سييوها هي هتنام غالباً للصبح - بس بكرة الميّه
المغلية بورق السدر حد هيقرا عليها قرآن من الليلة آيات معينة، ولازم
مروءة تستحمي بيها الصبح والميّه اللي هتقع ماتر ميش في الحمام، ترمي في
جنية البيت..

الترم الجميع بتفاصيل الأوامر.. لكن أنا كنت في ملكوت تاني!

إيه العالم ده!

إيه ده!

هل ده كلام حقيقي؟!!

هل ده تخريف؟

أسئلة كثيرة يصعب على أي حد في سني يلاقي لها إجابات.. لكن بعدها اللي حصل إن مروة فاقت، وحاولنا نعرف منه هل خطيها الأولاني ورا كل ده! لكن ما أدناش إجابة..

الشيخ لطفني بعد ما أنهى مهمته قرّب منّي وقالّي: الحاج مختار مبسوط منك وأنا كمان.. لوحيت تيجي معايا كذا جلسة جاية تعالى..

عينيا أنا لمعت من الفرحة..

وبدأت أعدّ الأيام والليالي..

وعرفت بعدها إن ده كان بتوصية من الحاج مختار وصاه إنه ياخذني معاه أساعده وأتعلم منه كمان..

بالمناسبة: مروة بنت خالتي بعدها قبل ما أنسى في تفاصيل الحدوتة: اتجوزت والمفروض إن حياتها استقرت، بس ما اتجوزتش أكرم. والمفروض إن عمي مختار هو إلي هيلغني بالمكان والزمان، عدّي يجي شهر.

كنت بدأت أشتري روايات ما وراء الطبيعة للدكتور أحمد خالد توفيق وأعجب بفكرة الشخص المتخصص في مجال ما وراء الطبيعة..

وقررت أعمل زيه و أكتب كل التجارب اللي مرّيت وهمّري بها..

بعد الشهر قابلني الحاج مختار «أبويا الروحي» وقالّي بكرة بعد صلاة المغرب عدّي على الشيخ صلّي معاه العشا في الجامع وهياخدك معاه وأي حد هيسألك أنت مين، قول أنا مساعد الشيخ.

وبدأت هنا رحلتي مع الشيخ.. لطفني.. مرحلة جديدة.

الفصل الثالث

رحلتي مع الشيخ لطفی

في المكان والزمان المتفق عليه حضرت.. وقابلت شيخنا ورَّحَّب بيَّ
جداً..

أول ما صلينا العشا لاقيت راجل جاي بسرعة وسلم على الشيخ وقال
يلاً بينا بص لي الشيخ لطفی، وقال: يلاً يا نادر في إشارة منه إن ده تبعي
توجهنا للبيت اللي فيه المشكلة..

أول ما دخلنا الشيخ سند عليا وقال: بص يا نادر دايباً و'حنا داخلين
تسلم على أهل البيت وعمار البيت..

نادر: عمار إيه؟

الشيخ لطفی: أهل البيت من الجن بيوتنا مش بتاعتنا لوحدنا.

البيوت فيها حاجات كثير جداً..

إحنا جزء منها.. العمار هم أهل البيت من الجن اللي عايشين زينا
بالضبط.. وعشان كده بنقول دايباً ما حدش يرمي مبه سخنة في الحمام
بالليل.

محدث يغني قدام المراية!

محدث يجبط جامد على الأرض بالليل

محدث يحدف طوب على الحيطان

كل ده منعاً إننا نأذيتهم.. هُما أصلاً في حالهم.. لكن التعرض لهم
بيخليهم في حالنا!

البيت كان فيه زوج وزوجة حديثي الزواج عادل وناهد.. ووالد
الزوج.. كانت أول مرة أسمع كلمة غريبة جداً اسمها: الربط..

والي مايعرفهاش دي حالة غالباً نفسية بتصيب الزوج تمنعه عن القيام
بالعلاقة الزوجية، ويمكن تصيب الزوجة ويتكون أسوأ بكثير من حالة
الرجل.

طبعا اللي في سني نهايات ال ١٦ سنة كان الموضوع مش محرج خالص..
بالعكس كان الفضول ساحرني وعاوز أفهم أكثر..

قعد الشيخ مع الزوج اللي تردد يتكلم في وجودي، ولكن الشيخ قال
اتكلم عادي، وبدأ الزوج يحكي كلام غريب جداً عن رفضه لزوجته طول
ما هي قدامه، ومجرد ما يبعد عنها يبوحس إنه متقبلها جداً.. يرجع ثاني
يشعر بنفور تام.. ومع محاولات مستمرة بدأت هي كمان ترفضه لكن
الزوج همس ببعض الحاجات للشيخ لظفي وكان واضح إنه مكسوف
يتكلم قدامي عنها..

هز الشيخ لظفي رأسه معبراً عن تفهمه، وبعد كده طلب الجلوس مع
الزوجة.

وبدأت الزوجة تحكي إنها في أول مرة كانت عادي لكن المشكلة إنها في

يوم صحيت من النوم وراحت المطبخ بالليل لاقت التلاجة مفتوحة وحد واقف يشرب.. بتقول إنها كانت متأكدة إن عادل كان نايم فضلت واقفة متخشبة مصدومة وحاسمة إني اتخرست عاوزة أصوت مش عارفة..

وقفته قدام التلاجة ومديلي ضهره وثباته راعبني..

عاوزه أنادي على عادل جوزي مش قادرة

عاوزه أجري أهرب رجلي اتشلت

لحد ما هو قرر يتلفت ويص لي.. هو شخص قريب لشبه عادل جوزي لكن عينيه حمرازي الدم.. بشرة داكنة جداً.. انعكاس ضوء التلاجة على رأسه ووشه مخلبه كأنه خارج من جهنم.

ابتسم وسانه بانتي بيضا جداً خلته يخوفني أكثر.. وفتح بقة ومانطقش، فتح بوقه وفضل ساكت على كده وعينه مشتعلة باللون الأحمر، وبدأت أسمع صوت يتردد حوالي: أنا جوزك مش هو..

مش فاكرة اللي حصل بعدها..

غير لما فقت وعادل قالي إني صرخت وصحي لقاني واقعة في المطبخ..

بعدها بأقل من أسبوع صحيت بردو علي صوت حاجة بتخبط في الحمام؟ فضلت أصحني في عادل لكن كان نايم زي الأموات وقالي: نامي وبطلي شغل المجانين بتاعك ده.. زهقت منه ودخلت المطبخ وأنا متأكدة إني هلاقي حاجة غريبة فلإذا بي ألاقي نفس الشخص واقف ومشغل خلاط العصير ويعمل عصير زي ما عادل جوزي دايمًا يعمل..

أول ما حس بوجودي اتلفت لي، بس المرة دي كانت تشكّل بيئة عادل تمامًا وشكله ما يخوفش نهائي.

وابتسم وقال: خير يا ناهد.. أعملك عصير معايا؟!!

صرخت وطلعت أجري لقيت باب الأوضة مقفول، حاولت أفتحها
مافتحش، فضيلت أخبط يا عادل.. العفريت بره.. العفريت بره يا عادل..
الباب اتفتح لوحده، دخلت بسرعة لاقيت السرير فاضي وعادل مش
موجود..

سمعت من ورايا صوت بيقولي: يا ناهد يا بتي أنا عادل والله، اتلفت
ورايا صوت وأغمى عليّ تاني.. واكتشفت إن اللي كان في المطبخ هو عادل
فعلاً.. أما اللي كان نايم جنبي هو مين!! ما أعرفش .
يوم وراي يوم بدأت يجيلي نفور شديد من إني حتى أشوفه.. ولعلمك هو
كان عنده مشكله فالحال من بعضه..

الشيخ لطفني: لا الحال مش من بعضه ولا حاجة.. عادل بنسبة ٧٥٪
سليم المشكلة عندك انتي.. انتي يا بتي مرصودة وفيه غالباً جن هو اللي
عمل فيكي كده ووصل جوزك للمرحلة دي.
ناهد: يعني إيه!

الشيخ لطفني: لا هنشوف.. نادي لجوزك ووالده..

خرجت ناهد ورجعت ومهما معاهم وقعدوا وبدأ الشيخ لطفني يتكلم.
الشيخ لطفني: بصوا في الغالب إن ناهد المشكلة عندها هي، أنا هفرا
عليكوا انتوا الاتنين وهشوف بعيني.. بس اللي هلاقي عليه جن راصد
هيكون عقابه شديد، وبدأ الشيخ لطفني يزعق ويبرق عينيه بأمر الله لما
هنعرف مين فيكوا مرصود هناذي بأمر الله الراصد هناذيه أوي.. سامعين؟!
هيندم وهيرجانا نسيه يمشي لكن مش هنسيه.. سمعني.. هنحرقه..
هنحرقه!

عادل: ربنا يقويك يا شيخ لطفني.

أما ناهد، فقامت ووقفت: أنا عندي صداع وعاويزة اخرج.

الشيخ لطفني: اقعد... اقعد بقولك.. ولما أنت جبان كده بتدخل حاجة كبيرة عليك ليه؟

ناهد بصت للشيخ وللشيخ بصة كلها غضب وقربت جداً منه.

الشيخ لطفني: قُلت اقعد.. انت هتكون أقوى من مين يعني.. عدى علينا زيك وأسوأ..

قعدت ناهد وبدأ الشيخ يقرأ آية (يفرقون به بين المرء وزوجه لآخر الآية)

ناهد وقعت على الأرض وفضلت تسد ودنها وتصرخ بهستيريا، نزل الشيخ لطفني جنبها وقرب أكثر من ودنها الشمال وقرأ (سورة الفلق) وقرب من ودنها اليمين وقرأ (سورة الناس).

ناهد سكتت خالص وهديت تماماً فشالها عادل وقعدا على الكنية وبدأ الشيخ لطفني يكلمها:

- حاسة بيايه دلوقتي؟

ناهد: مش عارفة..

الشيخ لطفني: حاسة إنك هادية ودماغك رايقة أو بمعنى أصح.. فاضية.

ناهد: آه بالظبط وكان في وش في دماغي وراح.

الشيخ لطفني: وعاويزة تنامي..

طيب بصوا وركزوا معايا..
ناهد كان عليها جن عاشق وده له أكثر من مصدر، ممكن يكون من
الحمام وده مستبعد إنك اتسيتي في الحمام..
لكن ممكن تكون خطيتي على حاجة أو شربتني حاجة.. وده يرجع
أكثر..

حاولي تفتكري معايا يوم شربتني حاجة عند حد وتعبتي جداً بعدها أو
يوم لقيتني ميه مدلوقه على باب شقتك؟
أو جالك مكالمه حد بيقول فيها كلام انتي مش فاهماه؟
افتكري يا بتي واستعيني بالله .

ردت ناهد: لا أنا هقول لحضرتك حاجة.. يوم الفرح حصل حاجة
وما أعرفش هل أنا سيئة الظن ولآ إليه..

كنا بنرقص، وكنت عرقانة، فلاقيت سوزان بنت عم عادل قامت من
على التريزة وطلعت مندبل من شنطتها ومسحت لي وشي بالراحة وخذت
المنديل وقعدت تاني..

ناهد: فاكريا عادل لما كنا بتفرج على شريط الفرح انت نفسك علفت
لكن أنا معلقتش

عادل: فعلا هي قامت عملت كده بدون مناسبة وقعدت تاني.. بس
مقدرش أظلم حد..

ناهد: واضف لمعلوماتك يا شيخ لظفي إن سوزان كانت هتمون
وتتجوز عادل..

الشيخ لظفي: طيب بصي يا ناهد الجن أنا طففته لكن هيرجع

تاني، وممكن يكون أشرس لكن أنا هطلب منك كذا حاجة تحصين كده
لو عملتيهم مش هيعرف يدخل تاني.

وبالنسبة لسوزان دي حرصوا منها لا تاكلوا ولا تشربوا منها أو معاها
. خدي الحاجات دي اشريها كل يوم - وكلي ٧ بلحات يوميًا لمدة أسبوع .
صلوا جماعة .. وهنجيلكوا كذا مرة وكله هيقى تمام بأمر الله .

مشينا وبدأت أكوّن أكثر خبرة .. وتكررت بالفعل الزيارات، وكل مرة
كنا نروح كنا نلاقي الجن العاشق ده رجوع ويطرده ويرجع زي ما تكون
معركة باردة بينه وبين الشيخ لطفى .

لحد آخر مرة ناهد فضلت تعيط وتقول: سييه .. سييه .. أنا تعبت .
ولكن الشيخ في الآخر يا إما فعلاً أنقذهم أو الأيحاء خيل لهم إنه عاجلهم!
أصل أنا برضولسه جوايا بعض الشكوك ..
واتعالجوا واتعالج غيرهم .

وفضلت تلميذ نجيب للشيخ لطفى .. وبابا كان متقبل الموضوع
خصوصًا إني بقيت ملتزم بالصلاة جدًّا .. وفضلت معاه لسنوات يمكن
لحد ما بقى عندي ٢٠ سنة .. وبقيت الشاب اللي ترعرع في كنف الشيخ ..
وبقى أي حد يعوز الشيخ لازم يرجع لي .

تعرفوا إن البعض سمّاني الشيخ نادر ..

في الفترة دي وقبلها، كنت دخلت الكلية وقربت أتخرج وبدأت أكتب
عن تجاربي مع المواقف دي متضمنة وجود الشيخ لطفى ، وبما إني إعلام
قسم صحافة كنت بدأت أوثق كل تجاربي معاه بشكل أكثر احترافية .

كنت بدرس في القاهرة وحياتي رايح جاي شبه يوميًا كنت لازم أفضل

موجود في البلد عشان ما أسيش الشيخ لظفي أبداً صدقاتي محدوده في
جامعتي مثلها كانت في مدرستي - أنا شخص غير اجتماعي محب للعزله..
الصبح بدرس ومساءً بتعلم من الشيخ كل يوم حاجة جديدة.

لحد ما حصل حاجه قلبت الأمور رأساً على عقب كنت في جلسة مع
الشيخ لظفي كنا تحديداً مع شاب بعد وفاة والده فضل يروح القبر لحد
ما قالوا إنه اتمس.

والحالة طولت، وأثناء جلسة العلاج والده قال:

- والله يا شيخ لظفي كل اللي حضرتك قلت عملناه وعملنا أزيدت
لما رُحنا العزبة الغربية وقابلنا الشيخ الوقاد!!

الشيخ لظفي قام وقف وقال

الوقاد؟! أعوذ بالله؟!

والد الشاب: إحنا هنعمل إيه بس!

الشيخ لظفي: تعملوا إيه! لو هتروحوله تاني أنا منسحب!

والد الشاب: لأ ولا هنروح له تاني ولا هنعبه، الواد أصلاً في النازل

من يوم ما نزل التربة!

إيه؟ ده مش صوت الشيخ لظفي.. ده صوتي

رد عليا والد الشاب: آه والله يا أستاذ نادر وعملنا أكثر من كده وربنا

يسامحنا على اللي عملناه.. ده الراجل ده خلص على كل اللي حلينا يا ابني.

نادر «أنا»: عملتوا إيه تاني؟

الشيخ لظفي: إيه؟ أنت عاجبك الموضوع

نادر: لا أنا بسأل بس أول مرة أسمع اسم الوقاد ده!

الشيخ لطفني: لوجبت سيرته تاني يبقى كل واحد من طريق!

للدوجة دي الشيخ لطفني كارهه وغيران منه!

نادر: خلاص يا سيدنا أنا بس محتاج أفهم.

الشيخ لطفني: لما نخرج.

خلصنا الجلسة وخرجنا

الشيخ لطفني: قبل ما تسأل، الوقاد ده بالبلدي «دجال» عارف يعني

إيه دجال؟

الوقاد ده لا شيخ ولا يمت بصله للمشيخة - ده ساحر مسخر جن

كافر.. بيعالج بطلاسم وشمس المعارف الكبرى.. وآخر حاجة بيستعملها

هي كلام ربنا وكمان بيحرفه!

نادر: أنا عاوز تفاصيل..

الشيخ لطفني: تفاصيل إيه بقولك بيعمل كل حاجة حرام تتخيلها

لا قرآن ولا إنجيل ولا أي كتاب سماوي يرضى باللي بيعمله يا ابني ده

نجس.. والناس بتكرهه هو ابنه..

ابنه من وهو عيل صغير الكل بيخاف منه! وحكايتهم غريبة..

الوقاد ده شر ماشي على رجليه يا نادر.. اللهم بلغت اللهم فاشهد.

نادر: طيب أنت اتضايقت ليه من سيرته، ما الدنيا مليانة ناس وحشة

عادي.

الشيخ للطفني: عشان احنا بنمشي بكلام ربنا وده ماشي بكلام الشيطان!

نادر بخت شديد: مش غيره، زملاء المهنة يعني؟

الشيخ لطفني بغضب: سلامو عليكموا..

سابني الشيخ لطفني ومشني وكان واضح جداً إني ضغطت وزمقتني
مني وضايقتني.. بس الحقيقة أنا مش عاوز أضايقه أنا عاوز أعرف منه
أي معلومات عن الوقادده، اللي علقني أكثر رد فعله ووشه اللي اتقلب
أول ما سمع سيرته!

الفصل الرابع

الوقاد

رُوحَت بيتي وأنا دماغِي بدأت تغير خط سيرها تمامًا.

أنا زهقت بصراحة، وكنت بدأت أَمِلُ تمامًا وأحس إن الأمر أصبح متكرر ومتوقع كل اللي هيحصل في أي جلسة علاج.. أنا محتاج أجدد! نمت.. وقبل ما أنام، كتبت شوية حاجات خاصة يبحث في الكلية، وكان القرار. الصبح هروح لأبوي الروحي.. طبعًا كلكوا عارقينه.. عم مختار.

رُحَت الكلية وطول ما أنا قاعد سر حان وعندي شغف وقلق وخوف خلصت يومي سريعًا ورُحَت أثبت حضورِي سريعًا لوالدي ووالدي.. لكن والدي قالي نادر أنا عاوزك ضروري.. قولتله طيب ممكن لما أرجع.

والدي: يبقى اللي سمعته صح.

نادر: سمعت إيه يا حاج مصطفى.

والدي: أنت زعلت الشيخ لطفى فعلاً؟!

نادر: أنا؟!!

والدي: أيوة الشيخ لطفي جه الضهر، وقال خلوا بالكوانادر زعلني
منه. بس ما قالش السبب.

نادر: والله يا حاج مصطفى ما حصل أي حاجة، كل الحكاية إنه بيزعل
لما بسأل كثير.. وعلى العموم أنا هصالحه ما تعلقش.

والدي: آه الله يرضي عنك، الراجل ده بيني وبينه عمار ومش عاوزين
نخسره أبدًا.. ده كفاية بنت خالتك مروة والي عمله لها!

ابتسمت لوالدي وكلت لقمة بسرعة جدًا ومما مستغربين أنا متسرع
كده ليه.

طرت على أبويا الروحي (الحاج مختار).. رُحت له البيت، فتح ليا ابنه
الباب ودخلت أستناه لحد ما خرج من الحمام..

اتبسط جدًا إنه شافني لأنه كالعادة زي ما كلنا حافظين ييشوف في
طفولته وحاليًا شبابه الضائع..

ما علينا سألني: اتغديت ولا لا، قلت له الحمد لله..

الحاج مختار: يا حاجة الغدا يلا عشان أتغدا أنا ونادر.

نادر: يا حاج بقولك اتغديت.

الحاج مختار: لازم تتغدا عندنا رز معمر النهارده وبَط.

في خلال دقائق الوليمة كانت اتفرشت.. وعشان أريح دماغي كنت
معا.. ما شاء الله عليه شهيته مفتوحة جدًا جدًا.

الحاج مختار: خير بقي يا نادر شكلك عاوزني فيه حاجة مهمة.

نادر: الشيخ الوقاد..

الحاج مختار الأكل وقف في زوره وفضل يكح ووشه اتقلب.. رد فعله
زادني شغف وإصرار وخوف.

الحاج مختار وصوته خارج بالعافية: ماله.. مين اللي عرفك بيه مش
ممكن يكون عم لطفني.. مين.. انطق.. هو الشيخ لطفني اتجنن.
نادر: عاوز أعرف مين ده، ومين ابنه الصغير.

الحاج مختار: ابنه الصغير؟! هو ما عندوش غير واحد وزى الشحط.
نادر: طب ممكن أعرف عنه منك والله انت عارف كتير شكلك كده.

الحاج مختار سباب الأكل واتعدل في قعدته وبدأ يحكي..
بُص يا نادر أنت سُفت الشيخ لطفني وإيمانه وقربه من ربنا طبعًا..
نادر: آه..

الحاج مختار: أهو ده عكسه تمامًا..

ده واحد أعوذ بالله مسخر جن ويقولوا أكثر من واحد، ويعمل كل
حاجة بالسحر ويدخل بالمصحف الحتام. وكَفَر عشان يبقى خدام إبليس..
ويكفره ده بقى فعلاً خدام إبليس وبقى بيقدر يأذي الناس بكل طريقة..
مفيش حد في العزبة الغربية بيتجوز إلا ما يروح له قبل الفرح بأسبوع
عشان ما يربطوش.. العزبة بقت مهجورة ومكروهة بسببه.
كل واحد عنده محل لازم كل مدة يودي له فلوس عشان ما يطفش
الزباين من عنده..

لما ينزل يمشي، الناس بتحاول تختفي من وشه، لو قُلتك إن الأذى
اتحط كله في بني آدم واحد يبقى هو الواد وابنه.
نادر: تعرف عنه أي حكايات؟

الحاج مختار: أبوة في حكاية مشهورة جداً بتاعه مراته حفيظة.

حفيظة كانت لا تترى، لا تسمع، لا تتكلم، عارفة جوزها يعمل إيه وماهاش دعوة، لحد ما بدأت تحضر معاه الجلسات بتاعه التحضير، وبدأت تشتغل زيه وبدأ ابنهم الصغير كمان يشرب الشر.

حفيظة كان كل همها ابنها على خلاف الوقاد يبحب بس يجنن الناس بأهميته.. يقولوا إنهم قلبوا على بعض.. في يوم لقوا حفيظة مرمية الفجر قدام تربة وليسها متقطع.. حاول الناس يفهموا منها كانت بتقول كلام مش مفهوم.. راحوا بيها لبيت الوقاد طلع هو وابنه وطرردوا الناس وقال أنا طلقته مش عاوزها عندي!

والأهم من ده التربة اللي لاقوها مرمية قدامها دي تربة عثمان الكبير وده واحد كده عيلته كانت كلها سحرة زي الوقاد.. والوقاد خلص عليهم موّت اللي موّته بالسحر وطفّش الباقي وجنن منهم برضو، إشمعن حفيظة راحت هناك محدش يعرف..

وهل هو اللي رماها هناك برضو، محدش يعرف بس اللي حصل إيه هو طلقها ورمها وعایش هو لوحده وابنه يسافر ويرجع له.

المشكلة إن الناس كانت بتكرهها من كتر عمايله فهاحدش رضي ياخذها ودوها مستوصف.. يقولوا إنها حكّت حاجات غريبة وقالت لازم تموتوا الوقاد ده ضيعني وضيع ابني.

حكّت عن مصايب هحكيلك اللي فاكراه منه.

الوقاد كان لازم يدفن الأعمال في الأكفان.. كان يوصل العمل لكن

اليتين الجداد..

كان ييؤهم أي حد يروح له إنه بيته فيه آثار وينهب منه الآف الفلوس
كان ييفرق أي اتنين متجوزين سهل جدًّا.

يعني نصاب وساحر ومشعوذ وكافر.

يا نادر كان بي... قاطعته:

- يا عم مختار أنا مش عاوز خطوط عريضة أنا عاوز تفاصيل يا عم
مختار من فضلك.

الحاج مختار: والله يا ابني ده اللي أعرفه

إوعى تسأل الشيخ لطفى

نادر: لأ.. شيخ لطفى مين! ده اتجنن أول ما فكرت بس أسأل.

نادر: طيب هو لسه شغال الوقاد ده؟

مختار: هو برغم إنه كبير إلا إنه شغال جدًّا..

والشيخ لطفى ياما عالج ناس ضحايا من الوقاد.. بس أنا سمعت
حاجة والله وأعلم صح ولا لأ.

نادر: حاجة إيه.

مختار: يقولوا إن الوقاد حذر لطفى من علاجه لحالات الوقاد والشيخ
لطفى ماسمعش كلامه فموت له مراته.. ده اللي سمعته لكن الحقيقه إيه
الله أعلم يا نادر يا ابني.

نادر: طيب أنا عاوز أحضر جلسة.

مختار: لأ مش هينفع لأسباب كتير.. أولًا: إن السكة دي أذى.

ثانيًا: إن ده مش شيخ مش هيسمح لحد يقعد يتفرج على شغله،
وبعدين يا نادر أنت دلوقتى مش نادر العيل بتاع زمان، أنت بقيت شاب
كبير وكمان معروف. فضلت أتحميل عليه بدون فائدة فزهقت وقُمت.

نادر: خلاص أنا هتصرف .. سبته وتوجهت ناحية العزبة الغربية
ويدأت أسأل عن مرات الوقاد.

ردود أفعال الناس كلها دون استثناء ما بين غضب، استياء، قلق.. وخوف،
كلهم قالوا مانعرفش هي فين!

فيما عدا واحدة مت قالت: من وقت ما طلعت من المستوصف وجوزها
رافض يدخلها البيت وهي في «مندرة البلد» (المقصود بها دار المناسبات العزاء
وكتب الكتاب، وساعات يلتقي فيها أهل القرية في أمسيات دينية وليالي
رمضان وأيام العيد).. فسألت بتعمل فيها إيه فعرفت إنها بتتصرف
المندرة يومياً ويتخدم على الناس اللي فيها في مقابل مبلغ مالي تقدر
تعيش منه..

بس خلي بالك دي ناصحه جداً ومتعلمه كمان وبحالات، ساعات تلاتيها
عاقلة وساعات تانية مجنونة.

خدت بعضي ورُحت على المندرة لاقيت بابها متوارب، خببطت ودخلت
لاقيت واحدة محنية على الأرض بتكنس.. وعمالة تكلم نفسها بتقول:

- يا ويلكم منه.. يا ويلكم من نسله.. يا ويلكم من ابنه!

قصدت أكح عشان تاخذ بالها مني فبصت لي، لاقيتها سيده مش عجوزة
سناً لكنها عجوزة صحياً جداً.. طلبت منها أقعد أتكلم معاها.

حفيظة: لو عندك عزاروح لشيخ البلد ادفع له حجز المندرة.

نادر: لا معنديش عزا..

حفيظة: يبقى عندك كتب كتاب، هو برضوا

نادر: لا.. اتفضلي دول وطلعت من جيبي ١٠٠ ج، كنت شايلهم لوقت

عوزة، شانتهم وشها التحول وقالت تحت أمرك.

نادر: عاوز أقعد معاكي قعدة طويلة شوية.. أنا عاوز أعرف كل حاجة
عن جوزك!

وشها قلب ١٨٠ درجة..

حفيظة: الوقاد! أنت مين! وعاوز إيه!

نادر: أنا صحفي وعاوز أكتب عنه وأجيبك حقك.

وعندي حاجة كده في الكلية مطلوب أكتب عن حاجة غريبة ولو
ساعدتيني يبقى كتر خيرك هي حاجة كده زي الواجب كده.

حفيظة: بحث يعني.. أنت فاكرنى جاهلة ولآ إيه.

نادر: لآ والله.. ما أقصدش.

حفيظة: ولا يهملك ياما سُفنا من أشكالك!

نادر: طيب هتساعديني؟

حفيظة: جاهز أنت؟

نادر: جاهز لإيه؟!

حفيظة: لو عرف مش هيسيبك «أسلوب حفيظة كان متزن جدآ على
غير ما الناس قالوا»

نادر: ما تقلقيش.. هتحكي؟ ولا أشوف حد تاني يحكي لي وأديله
الفلوس؟

حفيظة: محدش يعرف أد اللي أعرفه ولا حد شاف اللي أنا سُفته.

الوقاد لما اتجوزني كنت في حالي وشايفة وعارفة اللي بيحصل ومليش
دعوة.

هو ينزل البدر وم يفضل فيه كل ليلة من المغرب لحد قبل الفجر
وأنا مابتدخلىش في اللي بيعمله.. ياما سمعته بالليل وهونايهم بيكلم ناس
وأسمعه بيتكلم بأصوات مش صوته..

بس كان فيه كذا مرة خلوني أطلب الطلاق في أول ستين جواز..

أول مرة كنت صاحبة بالليل أروح أشرب.. لقيته واقف في المطبخ قدام
التلاجة فاتحها وواقف متخشب..

الصراحة خفت منه بص لي ويرق وقال: إيه اللي مصحكي دلوتسي
يا ولية؟

قلت له: جري إيه يا وقاد قايمة أشرب

الوقاد: انتي خدتي الإذن؟

حفيظة: إذن إيه؟

الوقاد: الإذن مني؟ يلا غوري..

سبته يا ابني ورجعت الأوضة جري

في مرة ثانية صحيت على زعيق عالي أوي فضلت قاعدة على السرير
خائفة أقوم، وبعدين لما الصوت زاد قمت من فرشتي..

نادر: كان صوت إيه؟

حفيظة: صوته هو، وصوت ناس بتصرخ وصوت ققط و كلاب
وحش أوي.

نزلت من على السرير فتحت باب الأوضة ومشيت ورا الصوت لحد

ما وصلت للحمام كان الباب متوارب لكن الحمام نوره مطفي لكن خارج
منه نور زي ما يكون فيه حاجة مولعة جوّه.. نورها عمال يزيد ويقل
لوحده.

أنت عارف وقفت شوية خايفة أقرب لحد ما سمعت صوته بيعيط
ويبتالم.

وصلت لباب الحمام ووقفت.. سُفت منظر غريب

الوقاد واقف قدام مراية الحوض وحاطط شمعة مولعة تحت وشه،
وعمال يقول «احضروا.. احضروا»..

الشمعة كانت بتحرق في وشه، وعمال جلد وشه يفور من نارها ونقط
دم عماله تنزل كتيرة على رقبته وهدومه .

أنا رقت بالصوت قام متلفت لي.. ماكانش وشه الي أعرفه، ومش
حكاية إنه، محروق ده واحد تاني غير جوزي وقام حادفني بالشمعة.

الشمعة لما حادفني بيها ولعت أكثر في الهواء، وأول ما جت عليّ وقعت
من طولي من الخضة.

لما قُفت لاقتني نايمة على باب الحمام.. قومت بسرعة لاقيته قاعد على
السريبر مستيني وقال لي لو اتكررت تاني مش هعرف أمنعهم عنك.

تكررت حوادث كتيرة مكنتش خلاص بتدخل فيها لكني طلبت
أنطلق وكان رده موافق بس بعد طلاقنا بأسبوع ابدثني عدي الي هيموتوا
عندك وأولهم أبوكي..

سكتت وعشت.. لحد ما حملت.. أول ما عرف فريح جدًا وقال لي أول ما
توصلي للشهر الخامس عرفيني.

خُفت من طلبه الغريب ده وبقيت على أذ ما نفسي أشوف ابني على لذة
ما أنا خايفة من الشهر الخامس !
يا ترى ناوي على إيه يا وقاد؟!

طول الشهور الأولى من الحمل كانت الحياة معقولة.. لكن الوقاد زرد
من جلسات علاج الناس وقالي أنا بعمل فلوس لابني.

بدأت الشهر الخامس وتعمدت أخبي وما أقولش.. وكنت في ليلة
نايمة قلقنت على صوت بينادي عليّ باسم أمي! فبصيت حواليّ لفتني نايمة
على مرتبه في البدروم اللي ممنوع أنزله!

وحوالين المرتبه شموع كثيرة مولعة وحوالين كل شمعة على الأرض
مرسوم دايرة بيضا.. وجنبهم مجموعة كويبات، والوقاد كان قاعد على
مكتبه مبسوط وهو يبص لي وقالي:

«دلوقتي ابني هيتجهز!»

حفيظة: حرام عليك سيب ابني هتعمل فيه إيه؟

الوقاد: هجهزه للورث..

حفيظة: أبوس إيدك يا وقاد.. بلاش ابنك.

طلّع كتاب شمس المعارف اللي بيستعمله على طول، فتحه وقال منه
كلام يخوف أول ما قاله جسمي كله اتشل وما بقتش قادرة أتحرك ولا حتى
أتقلب على جنبتي..

حفيظة: أنا مش قادرة أتحرك يا وقاد.

الوقاد: لما أخلص هتتحركي عادي.. وقام وقعد جنبتي على المرتبة..

وقام ماسك الكتاب بإيده الشمال، وماسك بطني بإيده اليمين وقعد
يكلم ابني كأنه سمعه.. ويضغط.

حسيت بمغص ووجع شديد جداً في بطني.. وحسيت بألم شديد
وانقباضات كأني هولدا.

حفيظة: يا وقاد هولدا.. هولدا ارحمني.

وقاد: اسكتي خالص..

وفضل يضغط بإيده على بطني وابني يتحرك جداً بسرعة.. بدأت
أحس بتزيف..

رمى الكتاب على الأرض وفضل ماسك بطني، وبإيده الثانية مسك
كوباية من اللي حوالي، وقال بصوت عالي:

«الأم.. الأم.. الأم»

وقام صب الميه على وشي.. ميه سودا ريجتها وحشة جداً يا دوب بحرك
وشي بصعوبة عشان أعرف أتنفس.. جسمي اتكثف.

وبعدها خد كوباية ثانية وزعق: «الابن.. الابن.. الابن».

وقام صابب اللي فيها على بطني.. والله يا ابني سُفت بطني بتدخن،
وحسيت إن جلدي يتسلخ وُسفت الهدوم بتقطع من على بطني لحد ما
سُفت إيد صغيرة بتطلع من بطني! سودا مرعبة ضوافرها مفزعة..

الإيد بدأت تخرج أكثر.. سودا تماماً ليها ضوافر أو حوافر زي
الحيوانات.. بدأت رأس تخرج من بطني وخرج الجنين.. خرج ابني.. كتلة
محرقة من الفحم.. وبدأ يتحرك على بطني.. قطع حبله السري ويص لي..
كانت عينيه بيضا تماماً مفيهاش أي نسي! وبدأ ياكل الحبل السري..

وفتح بوقه وإذا به لدية أسنان وأنياب.. أيوة أسنان وأنياب عند
الجنين.. أيوة جنين مفتح عينيه.. أيوة جنين له ضوافر.. ويدأيزحف على
بطني.. متجهاً لوجهي..

لاقيت الوقاد بيقوله:

«استني يا وريث ماتر ضعش دلوقتي لما تشرب السحر كله»

«استني يا ابن أبوك!»

فضل يزحف وبدأ يقرب من وشي، كان أبشع وش سُفته في حياتي
وطلع لحد ما وصل لوشي!

ويقى وشه في وشي وفتح بوقه وصرخ.. صوته حاد مؤلم عامل زي
الصوت اللي بسمعه في ورش لحام الحديد..

تُهت وحسيت بحد ماسك بوقتي وفُقت غالباً كنت بهلوس أو حاجة
مش عارفها لاقيت الوقاد فاتح بوقسي بالعافية وجايب كويابة وبدا
يشربني اللي فيها بالعافية..

ويقول: الأم والابن

الأم والابن

من الأم للابن

ومن الابن للام

وشربني بالعافية.. كاني شربت ميه نار قطعت في مصارينني وفضل بقول
نفس الكلام.. حسيت بجسمي كله بيولع للدرجة إن نافوخي هينفجر.
بعدها اغمى عليّ.. وصحيت لاقطني في السرير! وهو قاعد.. وقالني:

«أنا بجهز ابني.. وأفضلك تجهزيه معايا.»

حالي اتبدل وبقيت واحدة تانية، وبمزاجي بقيت بساعده في كل اللي
يعله ما أعرفش إزاي!

بحضر له الأعمال وأقعد مع الستات وأخذ الفلوس
وأرتب القعدات.. وبدأت أكون زيه ويمكن أسوأ لحد ما جه الشهر
التاسع.

واللي كان كله كوايس عن موت ابني!

لحد ما ألم الولادة جه!

وكنت متفقة معاه يوديني مستشفى المركز، بعني على أمي ومارضيش

بروح..

ودخلت الطوارئ، ومنها لغرفة العمليات اللي قالوا إنها ولادة عاجلة
وهحاولوا يولدوني طبيعي عشان أمي اترجتهم بلاش «ولادة شق البطن»
زي ما قالت لهم.. وأنا كنت خايقة أشوف اللي سُفته قبل كده!

الدكتور اداني حقنة وقالي أهدي وادعي ربنا..

بدأت أدوخ لكن سُفت ممرضة واقفة بتبص عليّ من بعيد باستغراب
وبدأت تقرب مني.. وبصت على بطني

المرضة: يا دكتور الطفل حركته زايدة وباينه أوي.. حضرتك شايف؟

الدكتور: اكشفي بطنها طيب.

المرضة: أهوه! إيه ده! دي متعورة يا دكتور!

الدكتور: إيه ده! ده مكان ضوافر! فين جوزها؟

المرضة: دي بتتعمور من جوا.. يا ساتر يارب.

الدكتور: هنضطر نولدها قيصري مشرط بسرعة.

أنا عاوزة أصرخ وأقولها أنا صاحبة.. لسه مانتمش.. استنوا..

الدكتور: زودي البنج بس بسرعة يلاً.

الدكتور مسك المشرط وبدأ يفتح وُشفت تاني نفس الأيد الصغير
بصوابها بحوافرها بتخرج برّه بطني.

نفس لوئها المفزع

ويدأت بطني تتزف مكان الجرح.. لكن كان دم أسود بشع!

والمرضة بتقول للدكتور:

- إيه ده يا دكتور إيه ده؟ ده مش شبيهها خالص.

والدكتور منهمك في ولادتي وما بيردش.

الدكتور: حطي على وشها فوطة مش لازم تتفرج يعني!

حطوا على وشي قماشة فبقيت مش شايقة لكني سامعه..

المرضة: هو جوزها غالباً أسود؛ لأن الطفل أسود أوي.

الدكتور: عادي كلها ألوان من طين خلقه ربنا.

المرضة: دكتور هو ضوافره عاملة زي القطط كده ليه؟

الدكتور: سبحان الله، يبقى دي سبب الخريشات اللي عندها، دي ظلمة

غريبة جداً..

المرضة: يا ماما إيه ده.. حاسب يا دكتور حاسب.

الدكتور: إيه ده.. أعوذ بالله.. أعوذ بالله.

بعد كده أصوات صراخ ممرضة ثم الثانية ثم صوت الدكتور زي
الحيوان المذبوح اللي يطلع في الروح.

ومن بعده الممرضة: ابعده عني.. ابعده عني.. ابعده عني..

وصرخات كتير.. أعقبها صمت رهيب..

عاويزة أمدّ أيدي أشيل الفوطة أيدي متخدرة

عاويزة أصرخ صوتي مش راضي يطلع..

بدأت في اللحظة دي أستغفر ربنا وأطلب منه يساعني، حسيت إن كان

جوايا قطعة من إبليس وتخلصت منها..

ولكن يا ترى القطعة دي راحت فين بعد ما دبحت كل الموجودين في

أوضة العمليات!

هتوت مين تاني!

حسي الله ونعم الوكيل فيك يا وقاد!!

بدأت أحس بجسم صغير بيتحرك على بطني متجه ناحية وجهي لكنه

توقف عند صدري وبدا يرضع زي أي طفل أوحى كائن حي..

كنت بتألم حاسه بسنان حاده بتقطع في!

ده غير إن أنا برضع إيه.. برضع ابن إبليس!

يارب.. يارب.. ارحمني من اللعنة دي.. يااارب

وسمعت صوت العقاد بيتكلم: من الام للابن.. من الام للابن.

وُشفت من ورا الفوطة خيال كبير يقرب مني ومن وشي تحليلاً
وكشف وشي.. غمضت عينيّ فإذا بصوت الدكتور:

- خلاص يا ستي حمد الله على السلامة.

فتحت عينيّ لاقيت الدكتور يبص لي ومبتسم..

حفيظة: أنا ولدت؟!!

الدكتور: الحمد لله ولدتني وابنك بيرضع كمان منك أهوه.. مش حاسة
ولآ إيه؟!!

حفيظة: وأنت عايش؟

الدكتور: نعم! وضحك..

حفيظة: طب والمرضات ما اتدبحوش.

الدكتور: واضح إن البنج عامل شغل عالي معاك مع إني سامع إنك
وجوزك مخاويين ومايفرقش معاكوا الكلام ده.

حفيظة: ممكن تقرب ابني من وشي أشوفه.

رفع الدكتور ابني ولاقيه ولد عادي والحمد لله مافيهوش أي حاجة،
وقالي هناخده ونرجعهولك على طول، أبوه عاوز يشوفه

صرخت: لا.. لا.. أبوه.. لا.

الدكتور: اهدي بس اهدي.

وخذ ابني وأنا منهارة وطلع بيه برّه عشان يوديه للوقاد .

صحبت لقيتني في السرير وابني في السرير بتاع الأطفال والوقاد موطني
عليه..

وقام وقف ويص لي وقال لي:

- من النهارده دورك تراعي ابنك لحد ما يستلم الميراث.. لو أدبتي الدور متفضلي عايشة معانا، لو فشلتى مكانك الشارع وسط الأغنيا، هريمكي مع عثمان.. مطلوب منك تساعدينى وتساعدي ابني وتكوني خادمة مطبعة.

كنت بسمع الكلام وأنا مش عارفة أرد أقول إيه..

تاني يوم خرجنا وروحنا البيت، كان الوقاد كل دقيقة بيجي ييص على ابنه، وراح سجّل اسمه من غير حتى ما يسألني عاوزة اسمي ابني إيه.

ماكانش مسموح ليّ أنفرد بابني ساعة على بعضها، كل شوية بيجي الوقاد ويرفع ابني قدام عينيّ ويقولوا قربت قربت..

ويرجع ليّ ويقولوا ما تنسيش أبدا اتفاقنا..

ومن بكرة تقومي تقابلي الأغيا وأنا عاوز فلوس أكثر، قوليلهم إنهم لو مادفعوش أكثر هلعنهم..

تاني يوم كنت في استقبال الضحايا بعد توقف دام ٣ أسابيع كان الوقاد موقف شغله فيهم فجالنا اليوم ده يجي ٢٠٠ راجل وست وطفل كلهم واقفوا على دفع الفلوس.. الوقاد عمره ما كان بيتعب من كتر الزباين بل بالعكس كنت بين كل حالة والتانية أدخله ألقه أكثر قوة وبدأ الكل يصدق إنى مخاوية أنا كمان.. وبصراحة بدأت آخذ من الناس فلوس وأحوش لأنى قررت قرار هو الحل الوحيد ليّ أنا فيه.

قرار بالهروب

هجمع مبلغ كبير وهاخذ ابني وأهرب لبلد ما يعرفش يوصلنا أبدا فيها..

وبدأت أشتغل بحماس أكثر.. وأحوش أكثر..

وفي ليلة كنت برضع ابني فدخل عليّ الوقاد بالليل وقال: أنا مستغرب من حماسك وشغلك الكثير.

حفيظة: ما أنا بنفذ اللي انت طلبته مني.

الوقاد: لا الحكاية مش كده.. أنا ممكن أسلط عليكى واحد من تحت الأرض يخليكي تنطقي تقولي انتي بتفكري في ايه.. بس الوقاد هيعرف لوحده.. وأوعدك أول ما أعرف لو طلعتي خاينة همدفك حية يا حفيظة.. عند عثمان اللي خدته من جنيّة كانت متجوزاه ماقدرتش تنقذه مني!

اترعبت وأنا مش عارفة هو عرف حاجة ولا إيه..

كل طلبات ابني كان بيجيها قبل ما أطلبها.. أول ما حاجة تخلص ألقياها تاني يوم على التراييزة من غير ما أطلبها ولما سألته مرة.. ضحك وقال الوقاد مايتسئش يا حفيظة!

الوقاد مايتخانש يا حفيظة!

الجملة دي كهربتني، وحسيت إنى اتفضحت لكنه هو لو عارف هيسكت عليّ ليه.. هو مجرد كداب بيكذب على الناس ولما بيصدقوه مُما اللي بيخلوه يتحكم فيهم!

أنا هكمل وهاخد ابني وههرب.. إن شا الله أسافر برّه مصر كلها. المهم أهرب من الجحيم ده!

واستمرت الحياة كده وبدأ ابني يكبر ولما جه سن دخولة المدرسة رفض دخوله المدرسة بقيت أبوس إيديه ورجليه..

صرخ وقال لو ماسكتيش يا حفيظة هلعنك وهبعتك عند عثمان.

صرخت أنا فيه: ارحمني وارحم ابنك سيبه يروح المدرسة زي أي عيل
مش كفاية إنك عازله عن باقي العيال في الشارع و الواد بقى عامل زي
الأخرس.

الوقاد: من بكرة هيروح مدرسة أبوه يا غيبة.

حفيظة: لأ كفاية مش لازم ابني كمان تضيعه كفاية أمه.. أنا عايشة زي
الجارية قضيت عليّ ومش هسمحلك تقضي على ابني!

نزل قلم على وشي وقعني على الأرض.. ويرجله ضربني في ضهري.

الوقاد: معادك الليلة يا حفيظة.. الليلة كل حاجة هتعدل.. زودتها
أوي يا حفيظة.

قُمت بالعافية ودخلت الأوضة.. ابني طبطب عليّ وهو كعادته ساكت
مايعرفش يتواصل زي باقي العيال اللي أدّه.

خذت ابني في حضني ونمت..

صحيت على صرخة ابني.. قومت بسرعة لاقيت الوقاد واقف في
الأوضة وحواليه اتنين سود طوال ورفيعين جداً مش عارفة أشوف مين
دول.. وابني مخبي وشه في رجلين أبوه! وعمال يعيط. جيت أقوم من على
السرير نزلت رجليّ عشان أقوم أنقذ ابني حسيت بإيدين شدتني من تحت
السرير لورا فاتقلبت على وشي ولقتني بتشد لتحت السرير بقيت أمسك
في أي حاجة لحد ما وقفت الإيدين عن مسحني تحت السرير لكنها كانت
مكفاني عشان ما أخرجش..

وإذا بالوقاد يططلب على ابني ويسلمه لواحد من الاتنين، سُفتهم
بوضوح وشهم طويل مسحوب ونحيف عينهم جا حظة بره شعرهم طويل
لابسين عبايات سودا سنانهم متفرقة عن بعضها ولكنها شبه الأنياب..

أول واحد مسك ابني مسكة من دماغه وضغط، ابني فضل يصرخ
ويتنطط على الأرض فإذا بالتاني هو كمان لمس دماغ ابني فسكت ابني
ووقف متخشب زي الناييم..

نيموه على الأرض ووقفوا حوالية..

وبدا الوقاد يتكلم:

«لقد حان وقت المرحلة الثانية من توريث الابن

يا معشر قبيلة حلفاء الوقاد.. آمركم مثلما أمرتموني من قبل

أطلب منكم مثلما طلبتم مني من قبل..

حققت لكم غاياتكم كثيرًا.. والآن عليكم تحقيق غايتي..

الابن يرث الأب

الابن يرث الأب

الابن يرث الأب

أزبلوا كل ما في قلبه من خير

أزبلوا كل ما في قلبه من حب للبشر

امسحوا كل ما في تفكيره من صفات البشر

آمركم بالعهد بيني وبينكم أن تسلموني ورثي المرصود وليس البشري.

الوقاد: وانتني يا حفيظة يا جاهلة هتفضلي فاكرة كل الكلام ده بالنص
بالأمر عشان تحكيه للبؤساء اللي زيك بعد ما دورك يخلص.. عمرك ما
هتسبي حرف منه.. بالأمر! عمرك ما هتسبيه!..

أنا كنت بشوف كل ده ومشلولة ولساني ودموعي هي اللي حيلتي..

قَلْبُ الاتنين ابني على الأرض على جنبه الشمال وهو مستسلم ليهم،
وأول واحد فيهم طلع من عبايته رباط أسود زي الشاش لكنه أسود،
وبدأوا يلفوا رجلين ابني وكتفوه من عنده صوابه لحد الركبة وكملاوا
لحد وسطه وابني مستسلم ليهم تمامًا برضو..

كملاوا لف ابني بالشاش الأسود ووصلوا لبطنه وضموا درعاه
لجسمه، وكملاوا لف ولفوا رقبته ووصلوا لوشه ولفوا دماغه بالشاش
الأسود وطلع الثاني حاجة زي مشرط وفتح مكان بوق ابني فسمعت
ابني بيتنفس بصعوبة، وجاب الوقاد إبريق فضي اللون وحطه قدامه وملاه
سائل أصفر من إزازه معاه وطلع زعفران أنا عارفاه عشان يستعمله في
التحضير دايمًا وخلطة في الإبريق الفضة..

وحط الإبريق على بطن ابني، ووقف جنبه وقعد يزعق ويقول دلوقتي
دلوقتي..

فقام الاتنين العفاريات وقفوا حوالين جسم ابني واحد على يمينه
والثاني على شماله ومسكوا دراعات بعض وبدأوا يقولوا حاجات مش
مفهومة وبرقوا لبعض جامد وفضلوا يقولوا الحاجات الغريبة..

وكل واحد جرح وش الثاني بالمشرط الي استعملوه قبل كده، وبدأ ينزل
من وشهم دم لكنه أسود داكن جري الوقاد فتح الإبريق بسرعة، وبدأ
الدم ينزل فيه بغزارة، والإبريق لسه ثابت على بطن ابني والدم بينزل
بغزارة في الإبريق..

وبعدھا بعدوا الاتنين عن بعض، وكل واحد فيهم قعد على الأرض زي
اللي داخوا وقعدوا.. من التعب..

الوقاد شال الإبريق من على بطن ابني وهزه وحطه على الأرض، وبدأ
يشاور للاتنين، واحد منهم قعد عند رجلين ابني من تحت ومسكهم كأنه
بيثبتهم.. والثاني قعد عند راسه ومسكها وبرضو كأنه بيثبتها في الأرض..

وقام الوقاد وبدأ من عند رجلين ابني يصب من الإبريق الفضة على
جسم ابني، وبدأ ابني يترعش رعشات خفيفة لكن العفريت كان مثبت
رجليه تمامًا وانتقل من الصب على رجله لبطنه وزادت رعشة ابني..

وجه عند القلب وقرب الإبريق من قلبه وصب كثير وبدأ يزعق:

يموت القلب.. يموت القلب.. يموت القلب يا ورثي.

ووصل عند دماغ ابني وصب بغزارة ودخلت الميّه جوه بوق ابني
أكيد.

ولكن بدأ ابني يتنفض وكان الكهريبا مسكت في جسمه..

بدأ الاتنين العفاريت يكتفوه أكثر..

وابني يتنفض ويصرخ بصوته الطفولي، ولكن الصوت اتغير وتخن
ويبقى صوت يخوف.. صوت ألم وحشرجة واختناق ممزوج بصوت مفرغ..
من شرقة ابني للدخول الميّه لبوقه وزوره..

كل ده بيحصل والإيديين مسكاني من رجلي وأنا نائمة تحت السرير على
بطني ودموعي هي كل اللي حيلتي!

فضل يصب لحد ما الإبريق خالص.. وابني خالص هو كمان وحركه
وقفت تمامًا..

وبدأ الاتنين يشيلوا ابني ويمطوه على السرير من فوقى وبدأت تقط
بته تنقط من فوق السرير ما أعرفش هي فيه إيه هل ده دم ابني ولا
السائل اللي غرقوا بيه جسمه..

كانت بتنزّل مش كتيرة لكني شايفها..

وسامعة صوت ابني بيزوم بنفس الأصوات الغريبة..

وبعدا بدأت قطع من الشاش الأسود اللي كانوا مكفين به ابني تقع
ندامي على الأرض واحدة ورا الثانية لحد ما اتعمل قدامي كوم كبير منها..

بعدها الوقاد وطى ويص لي تحت السرير وابتسم وقال لي:

خلاص دلوقتي ماتقدريش تفكري تعملي أي حاجة ولا تهربي ولا حتى
نظّعي وريشي برّة البيت، هو انتي فاكرة إني مش عارف إنك كتي بتسرفي
الفلوس من ورايا وناوية على إيه!

انتي فاكراي ماعرفتش خيانتك!

انتي متوقعة إني مابتبلغتش من خدمي يا حفيظة، وكان قدامي أحرقك
من أول ما فكرتي لكن كل شيء له أوان عقابك هتاخديه بس من وريشي
في الوقت اللي هو يحدده كتي هتهربي فين يا مسكينة.. أنا موجود في كل
حظة يا غبية..

أنا عارف وسايك بمزاجي!

فكري تاني تعملي ده.. و اللي هيلوع فيكي وقتها مش أنا ولا خدامي
من الجن.. ابنك يا حفيظة.. ابنك.. وهيكون فوراً

هو اللي هيكمل اللي أبوه بداه..

ابني هو اللي ورث العهد من صغره

ابني هو اللي هيقف الدنيا عند رجليه

الكل هيعمله حساب.. أي نعم بيعملوا لي حساب.. لكن حساباه مر
هيكون مختلف.. هيمشي في الشارع الكل هيجري يستخبي في
البيوت.. هيتجوز من بنات الجن.. هيكونوا خدام له.

هيعدي على المقابر الجن نفسه هيدخل جوّه كل تربه وهيستخبوا جرّه
الأكفان، اسمه هيفتكره الكل كبير وصغير! إنس وجن .

فضل يتكلم عن اللي ابنه هيعمله، ووقتها بص ورايا وقال فك أسرها!
لقيت الإيدين اللي مكته رجليا سايتهم .

وهو قام ومشي ناحية الباب وفتحه وخرج.. وخرج وراه العفريتين
بتوعه..

وقتها اتحركت من تحت السرير بصعوبة، وحاولت أقوم أشوف ابني،
رجليّ كانت متكفة مع إن مفيش حاجة مسكاها.. جيت على نفسي وقمت
عشان ابني اللي لاقيته نايم عريان على السرير وجسمه كله خطوط سودا
وحمر بالطول وبالعرض وهباب مكان الشاش الأسود على معظم جسمه
ونايم، شديت البطانية لقيته بيها وقعدت على السرير وخذته في حضني
وفضلت أحاول أفوق فيه وأعيط على اللي جوالي وجراله.

قعدت يمكن ساعة أفوق في ابني يا أستاذ..

وفاق وياريته ما فاق..

نادر: مش فاهم..

حفيظة: فتح عينيه وكان مستغرب فلاقيه قام وقعد وقال: «جري ليه،
انتي بتعيطي ليه؟! وبعدين فين أبويا..»

أنا عاوز أتعلم وأكمل علامي منه.. أبويا فين؟ ١٩،

حفيظة: يا ابني أنا أمك، أبوك ده حرام عليه، رينامش هيرحه ولا
بسامحه.

ابن الوقاد بغضب شديد: إوعي تكلمي على أبويا كده تاني، انتي
ناهمة.

حفيظة: حاضر يا ابني.. حاضر.

وقام ابني ولبس هدومه ونزل عند أبوه تحت وسمعت أبوه يهليل إنه
نجح وابنه بقى زيه. بس اللي ماتعرفوش كمان إنه بقى أسوأ منه.

نادر: إزاي؟

حفيظة: ابني بقى ملازم الوقاد في كل جلسة وأتعلم بسرعة غريبة وبدأ
يكبر بطريقه غريبة..

نادر: يعني إيه؟

حفيظة: يعني ابني كبر قبل أوانه.. ابني بقى شاب في ستين تلاته
بالكبر والوقاد كبر برضو بطريقة غريبة زي ما يكون الوقاد خد من عمره
واداله!!

نادر: بس الكلام ده ماينفعش.

حفيظة: يعني أنت سبت كل اللي حصل وشايف دي إنها ماتنفعش..
الوقاد بحوره واسعة وكبيرة ويسخر بدل الجن ألف.. يعملوا له كل اللي
هو يفكر بس فيه.. وابني بقى زيه.

نادر: بس أنا عاوز أعرف اتطردت إمتى تحديداً من البيت؟ وليه؟

حفيظة: كان ده في ليلة سودا ويوم ماطلع لوش شمس.

نادر: حصل إيه؟

حفيظة: أنا تعبت يا أستاذ، ولازم أكمل تنضيف المنذرة عشان أجيب فلوس آكل بيها وبعدين ال ١٠٠ ج اللي أنت دفعتهم هيجيوا إيه ولا إيه.

نادر: انتي عاوزة فلوس تاني ولا إيه؟

حفيظة: بكرة يا أستاذ هكملك اللي حصل وتجيب معاك قدهم مرتين!

نادر: نعم عاوزة ٢٠٠ ج! أجيبهم منين يا ست انتي!

حفيظة: ماليش فيه أنا.. يلا أمشي..

نادر: خلاص كفاية اللي سمعته مش عاوز تاني!

حفيظة: بشوقك.. بس ماتبقاش تمشي في الشارع تسأل ابني يغطس يروح فين ويرجع تاني لأن محدش يعرف غيري وماتسألش برضو عن مرات ابني!

نادر: إيه ده هو التجوز!

حفيظة: ما أعرفش.

نادر: يا ستي انطقي ماتسبينيش كده.

حفيظة: مستنياك بكرة يلا مع السلامة.

وفجأة حسبت إن حفيظة تحولت بقدره قادر لشهرزاد اللي بتحكي لشهريار حدوتة كل يوم ويتيجي عند أهم جزء وتسييه معلق عشان السياف مسرور مايطيرش رقابتها.. لحد ما كملت معاه ألف ليلة وليلة وأصبح مايستغناش عنها..

يا ترى حفيظة هتفضل تعمل في كده أد إيه؟! وبعدين أنا هجيلها
الفلوس منين؟!

ولو جبتلها ال ٢٠٠ ج بكرة أكيد هيكون فيه ٢٠٠ ج غيرهم لبعده بكرة..
و ٢٠٠ لبعده وبعده وبعده.

مشيت وأنا معايا كمية معلومات غريبة وحكايات وأحداث مرعبة
غير كل اللي عشتها قبل كده مع الشيخ لطفي الله يمسيه بالخير.

مشيت وأنا في دماغي أكثر من نقطة

أولهم: هجيب فلوس منين؟

ثانيهم: يا ترى بكرة هو آخرك يا حفيظة؟

ثالثهم: إزاي ابنها اتجوز!

رابعهم: بيروح فين ويرجع!

ماهاش مفر لازم آجي بكرة وأتصرف في الفلوس لأن الموضوع كده
متعلق عند كذا نقطة مهمين جدًا..

روحت البيت ودخلت أكلت بنهم ولكن تركيزي ماكانش في الأكل
لدرجة إني ماسمعتش أبويا وهو بيقولي كنت فين كذا مرة وفُقت وهو
داخل أوضته وبيقول إنشاله ما رديت!

خلصت أكل ودخلت الأوضة ومددت على السرير ونمت.. نمت
بعمق شديد جدًا وكأني مانمتش من سنين.

نمت عشان دماغي تقف شوية والصبح يحلها ألف حلال.

الفصل الخامس

«الكابوس»

ألم شديد يتسلل لراسي، ويحاول أفتح عيني بصعوبة ومش عارف،
محاولة والثانية بدأت أفتح عيني.. أنا فين؟

أنا قاعد على كرسي متكف مش عارف أقوم.. المكان مضلم جدًا،
الصداع بيحاصرني بشكل سخيف..

لمبة نورت في السقف.. لمبة قديمة نورها بيحارب عشان يخرج من
وسط التراب اللي مغطيها..

نور اللمبة كان كفييل إني أشوف إيدي متكتفة في إيدين الكرسي.. لكنها
متكتفة بقماش أسود زي الشاش وملفوف بإحكام على ذراعاتي!

حاولت أحرك إيدي لكن مفيش فايذة!

في عز انهماكي بفك إيديا سمعت صوت فجأة يقول: أنت عاوز إيه؟

نادر: مين اللي بيتكلم؟

مصدر الصوت: أنا أيامك السودا اللي جاية.

نادر: أنا فين؟

الصوت المجهول: عندي.

نادر: أنت مين أنا مش شايفك.. وعاوز مني إيه..

بدأ الشخص يظهر من الضلمة ويقترب مني.. كان كتلة ضخمة لكن الضلمة مش موضحة حاجة وكان بيقترب ببطء شديد.. دقات قلبي كانت أسرع من خطواته وأصواتها بتعلو..

الصوت المجهول: إيه خايف؟

نادر: أنت مين وعاوز مني إيه؟!

بدأ يقرب أكثر وبدأت ملامحه تظهر.. وجه لراجل، عينيه كلها غضب ابتسامة ساخرة على شفائفه..

لكنه في الآخر كان بني آدم يعني...

صاحب الصوت: أنت جاي عندي ليه؟

نادر: جيت عندك إزاي.. أنا كنت نايم وصحيت لقتني هنا..

صاحب الصوت: بتدور عليّ وبتلفّ ورا ليه؟

نادر: أنت مين أنا ما أعرفكش أصلاً.

صاحب الصوت: الوقاد.. الوقاد.. يا ضحية الفضول.

نادر: الوقاد؟!

صاحب الصوت: أيوة الوقاد.. وأديك قابلتني..

نادر: أنا مكتش عاوز أقابلك.. أنا بس كنت عاوز أعرف.

الوقاد: يا ويلك مني أنت وحفيظة.. أنا بحذرك وبنذرك.. أنا عمري ما بنذر حد.. بطل الي بتعمله لو عاوز تعيش يا فضولي.

نادر: ولو ما بطلتش؟!!

الوقاد: خلاص نشوف سوا.

الأوضة كلها نورها على وزاد جدًّا ولقيت ساند على الحيطه داير ما يدور الأوضة أشخاص قصيرين شعرهم طويل حجمهم زي الأطفال لكنهم مش أطفال.. دول أشباه بني آدمين!

بدأوا يتحركوا ناحيتي من كل ناحية والوقاد واقف مربع إيديه يبصر بسخرية وترقب للي بيحصل.. بدأت أحاول أفك إيدي من على الكرسي.. دون جدوى.

ملا محهم اتضححت أكثر، الشعر كثير على أجسامهم سنانهم كلها زي الأنياب، بعضهم كان يمشي لكن أغلبهم نزل على الأرض وبدأ يجبي على إيديه ورجليه زي الأطفال اللي بيبدأوا تعلم الحركة..

كانوا يبصروا صوت خافت أشبه ما يكون بالهمهمات، ولكنه موحد وكأنه ترنيمه كلهم حافظينها.. ولكن مع اقترابهم أكثر الصوت بدأ يعلا تدريجيًّا لكنه عمال يعلا وهما يقربوا أكثر لحد ما وصلوا لي عند رجلي وأنا متكفف في الكرسي بدأت أزقق بدأ مجموعة منهم يطلعوا على جسمي بدأ الكرسي يترنح بي..

بدأت أصرخ: ابعدوا عني.. ابعدوا عني.. ابعدوا..

أصبح صوتهم لا يطاق صوتهم تحول لحاجة أشبه بالصغير الحاد اللي بينخترق وداني ونخي، حسيت بدم بيخرج من وداني.. زاد ترنح الكرسي..

وقعت بيه وبالي طالعين فوقى.. وقعت لورا ورامي ارتطمت بالأرض
بمتهى العنف.. بدأت الصورة قدامي تكون مشوشة لكني شايف
أشباحهم وهي بتطلع فوقى وأنا واقع، وبدأت أحس بآلم خفيف زي شك
الدبابيس في كل أنحاء جسمي لكني بغييب عن الوعي وسمعت صوت
جاي من بعيد جدًا بيقول: دي قرصة وذن يا فضولي.. لكن المرة الجاية
يا ويلك من الوقاد يا ويلك.. شُفتهم وهُما بيرجعوا لورا وشُفت حيطان
الأوضة ألوانها بتبدل وألونها بتتحول لألوان تانية، وبعد ما كانت سودا
بدأت قطع أثار تظهر فيها والشبايك تظهر..

الأوضة تبدلت لأوضة تانية أعرفها كويس لأنها ببساطة أوضتي!

في اللحظة دي فقدت الوعي تمامًا لمدة معرفش أد إيه..

لكني صحيت على صوت والدي.

الوالد: نادر يا ابني قوم إحنا بقينا بعد العصر كل ده نوم؟!!

نادر: فعلاً.. صباح الخير يا حاج.

الوالد ساخرًا: صباح إيه بقى.. ده أنا بيتهيألي لو سبتك هتكمل نوم

لبكرة.

نادر: معلى أصلي كنت تعبان جدًا.

الوالد: يا ابني عاوزك تركز في آخر سنة في دراستك عشان أنت مش

عاجبني.. والبحث المطلوب منك ماعملتش منه حاجة.

نادر: ماتقلقش يا حاج ده أنا هعمل حنة تحقيق صحفي هيقى مشروع

تخرجي وبحث ميداني كمان.

الوالد: يارب يبقى على أذ مشروع تخرجك وبعدها خلاص!

نادر صمت لمدة لحظات: يعني إيه.

الوالد: أنت فاهمني كويس.

نادر: لأ يا حاج هو تحقيق صحفي وبعدها خلاص.

أنا معرفش والدي يقصد إيه ولا وصل له إيه؟ لكن كلامه خلاني أقول لنفسي أنت كذبت عليه طب هتكذب على نفسك،

أنت أصلاً ماكانش في بالك إن ده يكون متعلق بدراستك أصلاً.. هر في الحقيقة فكرة حلوة جداً..

أيوة أنت مش ده غرضك يا نادر..

طيب أنا عاوز إيه؟! وناوي على إيه?!

رجعت للحوار تاني بصوت والدي وهو يقول: إيه ده يا نادر?!

نادر: إيه!

الوالد: ودنك نازل منها دم وناشف شكلك اتخبط فيها.. ونزفت إمبراح.

حطيت إيدي على ودني بسرعة وطلع في إيدي فعلاً الدم ناشف.

وقلت بدون وعي: ماكانش حلم.

الوالد: هو إيه؟

نادر: أصل وداني كانت وجعاني جداً قبل ما أنام.

الوالد: خلاص نروح لدكتور كامل بتاع الأنف والأذن والحنجرة ده
هايل وأبوه صاحبي ولو عنده زحمة هيدخلنا على طول..

نادر: مش مستاهلة يا حاج، خلاص لو تعبت تاني نروح.

الوالد مستاء: اللي يربحك يا ابني.. أنا رايح أنا وأمك بيت خالتك
نظمن عليهم.

نادر: أخبار مروة إيه؟

والدي: والله كويسة بس تقريباً في حاجة بينها وبين جوزها.

نادر: طبعا الكروثة اللي حصلت في الجوازة كانت لازم تختم بمشاكل.

خرج والدي ووالدي وأنا لسه قاعد في السرير أفكر: هل الدم ده
تقمص من الحلم ولا إيه؟

شلت الغطا عشان أقوم من على السرير وكانت الصدمة.. إيه ده!

البنطلون مليات بقع دم.. ده مش البنطلون بس.. ده التي شيرت كمان
بقع دم صغيرة كتير.. قمت بسرعة وقفت قدام المراية وقلعت هدومي
وشفت جسمي اللي كان عبارة عن مصفاة.. جسمي كله خروم أو مكان
لأنياب صغيرة جداً اتغرست في مناطق كتيرة منه.. ومكان كل خرم بقع
الدم اللي طلعت على هدومي!

بصيت لا إرادياً على السرير لاقيت عليه.. بقع دم متفرقة..

لكن عيني لمحت حاجة تانية تحت السرير!

وطيت بسرعة تحت السرير.. شاش لونه أسود عارفه كويس لأنني كنت
ملفوف بيه.. شاش مرمي تحت السرير.

ليه ده!

هو ماكانش حلم!؟ والتحذير كان حقيقي.. واللي كان بيعضواي دول
كانوا حقيقة.

طب والعمل!

أنا عاوز أعرف الباقي! بس لو رُحِت لحفيظة تاني هتكون غالباً نهايني!
طيب ما أنا تلميذ الشيخ لطفني، وعارف كويس إزاي أحسن نفسي من
شره.. هو أنا نسيت اللي اتعلمته من علم الشيخ لطفني عشان واحد
كافر.. قدير يخوفني بكوايبس.. طب ما أنا ياما سُفِت أعمال وسحر وجز
في حضره الشيخ لطفني..

فوق يا نادر أنت أقوى من الوقاد..

أبوة أنا اقوى بديني.. قُلت لنفسي كل ده عشان أشجع نفسي أروح تاني
لحفيظة أكمل.

بس المشكلة دلوقتي.. الست دي عاوزة ٢٠٠ ج، وأنا معيش فلوس
ولسه واخذ من والدي فلوس كتب كتير وآخر فلوس كانت معايا اديتها
لها.. أنا لازم أروح لها حالاً عشان أخلص الحكاية الغريبة دي.. وأكيد هي
عندها تفسير لي حصل لي.. لا لازم أروح لها ده خصوصاً بعد الموضوع
اللي حصل بجليني لازم أروح لها بشكل عاجل دلوقتي أكثر من الأول.

الفصل السادس

العودة للأب الروحي

قُمتُ خذت دش سخن وكان مؤلم جداً مع كمية الجروح اللي في
جسمي دي!

ودخلت المطبخ حضرت فطار كويس عشان أنا مش عارف هرجع
إنسى!

خذت الفطار ورُحت للسفرة لاقيت فيه أكل موجود... إيه ده احنا
صحيح مش الصبح ده والدتي رينا يكرمها سايبالي الغدا..

كلت وشربت شاي ثقيل وقُمت غيّرت هدومي، وكان الراديو شغال
في الصلاة وشغال برنامج لاقيت الضيف يقول للمذيع: ((الحاجات اللي
زي دي بفضل يكون معايا فيها جهاز التسجيل.. بدل ما أنسى أي حاجة..
لعلمك وأنا بفرغ شريط التسجيل بلاقي حاجات مكتش مركز معاها
وأنا بسجلها)).

الفكرة نورت في دماغني!

الجملة دي زي ما تكون رسالة مبعوتة لي.. أنا فعلاً لازم أعمل كده..

أنا عندي جهاز تسجيل كاسيت صغير ما يستعملوش، دورت عليه لآيت
وطلعت كذا شريط أغاني بتوع أبويا قُلت مسجل عليهم وهخيههم لأن
لو عرف هيموتني.. وانتوا كمان ممكن تموتوني لما تعرفوا أنا أخذت شريط
إيه..

دارت الأيام لأم كلثوم - من غير ليه محمد عبد الوهاب - قارئة الفنجان
عبد الحليم حافظ ..

قُلت هبقى أشتريله غيرهم.. كان من غير ليه وقارئة الفنجان لوهم
أخضر، وعليهم الشعار بتاع صوت الفن ودارت الأيام رمادي وعلب
الشعار بتاع صوت القاهرة للصوتيات والمرئيات..

اخترت شريط أم كلثوم.. وجبت بطاريتين وحطتهم وجربت الكاسيت
لايته شغال، جربت أسجل عليه لآيته تمام..

قعدت على ترايزة السفارة وبدأت أحكي كل اللي حصل في مقابلتي
مع حفيظة.

المغرب آذن وأنا بحكي.. ووقفت عند لما سبت حفيظة.. أما الحلم
فقُلت هعمله شريط له لوحده.. يمكن أشوف أحلام تانية ويبقى ليها
شريط مستقل، وآخر حاجة سجلتها إني خارج دلوقتي رايح المنذرة أقابل
حفيظة المقابلة التانية..

خدت الكاسيت، وكنت خلصت الوش الأولاني من الشريط، وقلبت
الشريط عشان أسجل على الوش الثاني وحطيت قارئة الفنجان في جيبي
وأنا بحطه سرحت شويه في اسمه.. مش يمكن تكون حفيظة دي بتنصب
علي! طب والي حصل في الحلم!

خرجت من البيت وزجلي عارفة طريقها.. عارفة رايحة فين كويس!

أوبمعنى أصح رايحة لمين؟!!

ايوة.. أبويا الروحي..الحاج مختار..

لايته واقف في الشارع مع رجلين من البلد قدام بيته وييلح عليهم
بفضلوا للعشا.. كعادته الكريمة.

لكن أول ما شافني ابتسم! أما أنا فحسيت من كتر الأحداث إني زي
ما أكون ماشفتوش من سنة..

رحب بيّ وساب الناس وألح عليّ الدخول.. لقتني بقوله: عم مختار
من غير مقدمات أنا عاوز فلوس.

مختار بلهفه: حاضر يا ابني عاوز كام..

نادر: هرجعهم لك علطول والله.

مختار: يا ابني هو أنا سألتك هترجعهم إمتى؟ أنا سألتك عاوز كام،
وبعدين أنا مش هاخذهم، أنت زي ابني!

نادر: لأ طبعًا هرجعهم، بس أصل اتزنقت ومحتاجهم ومكسوف أقول
لوالدي عشان لسه واخذ منه فلوس الكتب والكلية.

مختار بقلق: أومال الفلوس دي عاوزها لإيه.

نادر: إيه؟!!

مختار: عاوزها تعمل بيها إيه؟!!

نادر: عاوزها تعمل بيها حاجة مهمة بالنسبة لي.. هقضي بيها مصلحة
يا عم مختار.

مختار: إيه المصلحة دي يعني؟

نادر: خلاص يا عم مختار مش عاوز حاجة.

مختار: ماتتحمقش عليّ.. وقولي إن اللي شاكك فيه مش صح!

نادر: شاكك في إيه؟

مختار: من وقت ما سألت عن الوقاد وأنا مبقتش مطمئن.

نادر: ومال الوقاد بالفلوس؟

مختار: نادر.. أنت رايح للوقاد؟!!

نادر: أروح له بفلوس ليه يعني؟

مختار: رايح تقوله إنك عيان عشان تعرف تدخله.

لوقلت لكم إن الجملة دي كانت بالنسبة لي زي الوحي اللي نزل عليّ،
مش هتصدقوا أنا انبهرت بيها لدرجة إنني ابتسمت وماردتش.

مختار: براحتك يا نادر، أنت عاوز كام، وأنا مش هسألك عاوزهم في
إيه.

نادر: ٢٠٠ جنيه، وأوعدك هجيلك أحكيلك على كل حاجة وشكرًا يا
أجدع عم مختار في الدنيا كلها.

خدت الفلوس وطيران على المنذرة داخل دخلة الفاتحين.. أول ما
دخلت لاقبت ناس كثير داخله وناس طالعة.. إيه ده.. ده في عزا اضطريت
أدخل أعزي وأنا مش عارف ده عزا مين!

طول ما أنا قاعد عينيّ مش ثابتة رايحة يمين وشمال ويدور عليها هي فين؟!
اتفاجئت بأبوريا في وشي وقعد جنبني ويص لي بابتسامة لا تناسب المكان
والموقف اللي احنا فيه.

والدي: والله وبقيت صاحب واجب وبتحضر عزا أهل البلد.

نادر: آه طبعًا.. أو مال.. ده واجب.

والدي: طب لما أنت عارف مش كنت تقولي بدل ما سببت أمك واقفة في الشارع ودخلت.

أنا عرفت واحنا عند خالتك بموضوع الوفاة ده.

نادر: وأنا أعرف مين إنك هتيجي تعزي في العزبة.

والدي: ما أنا جيت أهو!

نادر: خلاص يا حاج آدينا جينا احنا الاتنين.

والدي: عاوز مني حاجة أنا هقوم عشان أمك واقفة بره.

نادر: لا اتفضل أنا قاعد غالبًا كده للصبح.

والدي: نعم!

نادر: إيه في إيه.. قصدي لحد بعد العشا.

والدي: ماتاخ روح شوف أحوالك ومذاكرتك.

نادر: حاضر يا حاج مع السلامة بقي.

ناس داخله، وناس طالعة وفنجان قهوة ورا الثاني، وأنا عامل زي الطفل التايه اللي بيدور على أمه.. زهقت وحطيت وشي بين إيديا وبصيت في الأرض.. لحد ما سُفت رجلين حافية مشققة التراب كاسيها.. واقفة قدامي.. رفعت وشي بالراحة.. لا قبتها واقفة في وشي..

حفيظة: بتدور على؟

نادر: طبعًا مش فيه بينا معاد؟

حفيظة: وفيه بينا اتفاق..

نادر: آه.. وأنا جبت الفلوس زي ما طلبتي.

حفيظة: خلاص يبقى هنقعد مع بعض.

نادر: إمتى طيب؟

حفيظة: بعد ما العزا يخلص هجيلك.

نادر: شكله مطول وأنا زهقت.

حفيظة: ولا مطول ولا حاجة.. المهم ما تخرجش بعد ما الناس تمشي،
خليك قاعد بأي حجة إنك مستني أبوك راجعلك تاني..

نادر: يارب بس يمشوا.

حفيظة: قوم أهو أصلًا الناس بدأوا يمشوا.

نادر: أقوم فين؟

حفيظة: ارفع راسك ويص حواليك.

رفعت راسي لاقيت الناس اللي كانت قاعدة واقفة في طابورين بيعزوا
أهل المتوفى وماشين.. لكن حفيظة مالقتهاش ولا ليها أثر ولا كانت واقفة
قدامي مكان ما كانت بتكلمني.. ازاي في لحظة كده اختفت!
قُمت وفت أبص عليها مالهش أي أثر!

دخلت جوة طابور وعزيت ورجعت دخلت المنذرة من جديد وقعدت
والناس عمالة تقل واحد ورا التاني لحد ما فُضيت ولاقيت واحد من أهل
الميت جاي ناحيتي.

سلامو عليكموا أنا محمود.

نادر: أهلاً وسهلاً.

محمود: حضرتك العزا خلیص والناس مشیت.

نادر: أنا قاعد مستني والدي هيعدي عليّ.

محمود: شكلك غريب مش من العزبة.

نادر: الحقيقة آه بس العزا واجب علينا طبعاً.

محمود: كتر خيرك ما يلزمش أي حاجة أساعدك بها.

نادر: لا والله كتر ألف خيرك..

محمود: طيب أستاذن.

نادر: بقول لحضرتك هو في ست عجوزة غلبانة بتبقى قاعدة هنا عاوز

أدبها حاجة لها.

محمود: مين حفيظة!

نادر: آه.. لا.. أنا معرفش اسمها إيه.

محمود: بص هي ماتعرفش غلبانة ولأ تعبانة الله يسهلها.. جاهلة ولأ

متعلمة.. غريبة الست دي.

نادر: طب هي فين؟

محمود: وقت العزا أهل أي ميت بيطردها من المنذرة.

نادر: بيطردها؟

محمود: آه.. ولية شؤم وعيلتها زيبا.. إن كان هي ولأ المخفي جوزها

ولا المصيبة ابنهم.

نادر: آه ما هي قالتلي..

محمود: قالت لك! هي مين.

نادر: لا أقصد حاجة ثانية.

محمود: خلاص بقى خليها تكملك مدام قالتلك قبل كده بس نصيحة لوجه الله.. حفيظة تاريخها أسود و هتبيع أي حد وأي حاجة عشان ابنها. مهيا عمل فيها.. هتبيعك أنت وأنا ومليون غيرنا.. بس المهم تشرف ابنها وجوزها يدخلها البيت تاني .

دي عيلة كلها سودا، جوزها بندعي كلنا ليل ونهار ربنا ياخده ويريجنا من شره وأذاه.. ولولا الحُرمانية كانوا أهل البلد سابوها في التراب لما لقيوها قدام تراب عثمان.. ما هو ده أنيل منهم بس غار ومات خلاص.. الدور والباقي على الوقاد وابنه يارب يولعوا هُما كمان.

بُص.. أنا ما أعرفش أنت طبيعة كلامك معاها إيه و ليه! بس شكلك محترم.. فخلي بالك.

نادر: حاضر.

محمود: أستاذ أنا، وما تقلقش هتظهر لك فجأة زي ما بتختفي كتير فجأة.

نادر: أنا متشكر جداً يا أستاذ محمود.

ومشي محمود وفضلت قاعد في المنذرة والساعة عدت تسعة ونص وأنا لوحدي مستني الهانم تشرف..

لحد ما سمعت صوت خطوات هادية ولقيتها داخلة.. وجاية ناحيتي لكن عينها كان فيهم غضب مرعب جداً..

الفصل السابع

شر نهاية!!

ابتسمت لها ابتسامة مصطنعة.. وقُمت ووقفت وصلت لحد عندي
وقعدت على المصطبة اللي كنت قاعد عليها وقالت: اقعد.

نادر: أتأخرني انتي عليّ يا ست حفيظة.

حفيظة بحده شديدة: أنت ازاي تتكلم عني.. أنا سمعت كل حاجة.

نادر: أنا ما حكتش حاجة من اللي قولتيهولي خالص.

حفيظة: أنا بقول اتكلمت عني مع محمود ابن آمال ليه.

نادر: ما أعرفش إن ده هيضايقتك.. معلىش.

حفيظة: ماتتكررش تاني يا نادر.. أحسنلك!

نادر: حاضر.. اتفضلي وطلّعت من جيبي ١٠٠ جنيه.

حفيظة: إيه دول! مش أنت قُلت جيب المطلوب.

نادر: ده نصه قبل ما نبدأ والباقي لما نخلص.

حفيظة: لا ناصح.. أنا لو عاوزة ما أحكيش مش هحكى.

نادر: طب ممكن نتكلم في المفيد ومانضيعش الوقت.

حفيظة: قول إيه المفيد؟

رفعت كُم القميص وقولتها تعرفي تقوليلى إيه ده!

حفيظة مسكت دراعي وفضلت مركزة معاه وقالت:

- دي عضه.. لا عضات كتير.. منهم.

نادر: هُما مين؟

حفيظة: الحرس..الوقاد له حرس وظيفتهم يخوفوا أي حد يفكر يتعرض له ولو حتى بالكلام ياما جولي أول ما طردني.. بس هُما في الأول يبجوا يخوفوك بس في أولها كده عض! ومش هتلاقيهم عرفوه بده أصلاً.

نادر: وإذا قُلتك إنه هو جه بنفسه جه وحذرنى.

حفيظة: هو! إزاي يعني!

نادر: أيوة الوقاد كان معاهم وهو اللي حرّكهم وربطني وهددني.

حفيظة: بس إزاي يجيلك.

نادر: والله زي ما بقولك كده.

حفيظة: بُص من عِشرتي معاه، فيه جن من المسخرين بياخذ شكل وهيئة الوقاد وده بموافقة الوقاد.. فهو ده اللي أنت سُفته.. ولعلمك الوقاد مايعرفش حاجة عن الموضوع.. الجن ده بيتصرف من دماغه، وكان الأول بيرجع له يحكي له لحد ما الوقاد قاله شوف شغلك من غير ترجع كل شوية تحكي لي.. ده سمعته بودني في مرة وكان بيزعق له جامد.

نادر: طب والعض ده كله؟

حنيفة: مش هيجولك تاني.. ما عندهم حاجة يعملوها تاني.

نادر: أنا مستغربك جداً.. شويه أحس إنك جاهلة وشوية أحس إنك متعلمة أحسن مني.. شوية أحس إنك غلبانة وشوية أحس إنك ماتقليش في الشر عنه.. انتي مين في دول؟!!

حنيفة: أنت تفرق معاك في إيه.. هات ال ١٠٠ جنيه.. أنت هتفضل ماسكها كده كتير؟!!

خذت ال ١٠٠ جنيه الأولانية واشترطت إني اسمع وما أقطعهاش، ما اتضايقتش من الكاسيت وبدأت تكمل:

أنت كنت عاوز تعرف أنا اتطردت إزاي!

الوقاد وابني بقوا عصابة وأنا بقيت مجرد خدامة بتأكلهم قفلت على نفسي باب أوضتي.. حاولت أرجع أساعده زي الأول منعني وقالي خدتي بدل الفرصة كتير.

لحد ما في يوم كنت نايمة صحيت على صوت واحدة ست.. أيوة واحدة ست في البيت.. أنا اتجنتت وعقلي طار.. الوقاد جايب واحدة في البيت.. أنا برضو في الآخر ست!

قُمت من على السرير أمشي ورا مصدر الصوت لحد أوضة الوقاد لكن لاقيت الصوت مش جاي منها!

الصوت جاي من أوضة تانية! أوضة ابني! بقيت واقفة أقول يا نهار أسود واحدة في أوضة ابني.. ابني اللي كبير بالسحر والشرالي لسه شايفاه لحد دلوقت عيل.. واحدة في أوضته.

قربت من الأوضة.. الصوت سكت شوية وبدأت أسمع همس هموت
وأفتح باب الأوضة وأدخل زي أي أم وألطفش ابني بالقلم لكنني خائفة..
الصوت رجع تاني.. بس المرة دي صوت الوقاد اللي سمعت صوت
بوضوح يقول:

«أهب لك ورثي.. أهب لك ابني»

وسمعت صوت ست فعلاً لكنها كانت بتطلع صوت مرعب جداً
مش مفهوم.. واتكلمت برضو كلام مش مفهوم.

لكن الكلام اتغير.. وبدأت أفهم كلامها.

الولاء كل الولاء لابن آدم المنشق عن نسل آدم.

الطاعة كل الطاعة لابن حواء المنشق عن نسل حواء.

وسمعت صوت ابني يقول:

«وأنا قبِلت الزواج من ابنة مارِد النار والأرض.

ابنة الحاكم - المطاع - ابنة النار - ابنة الأرض.»

يا خبر أسود: ابني بيتجوز!

وأنا واقفة برّه زي الغربية.

ورجع الوقاد اتكلم:

«أهب لك ورثي - أهب لك ابني.»

فردت هي: الهبة وصلت إلى أبي وأمرني بالحضور.. لأزوجك نفسي

ورد ابني: وأنا قبِلت زواجك.

الوقاد: بحق أول من انشق عن الرحمة والنعيم.

بحق من ترك الجنة لكبريائه العظيم.

بحق من غوى آدم وتركه في عذاب اليم.

بحق من رفض السجود للطين.. قبلت.. قبلت.. قبلت.

أنا سمعت كل الكلام ده ما استتش، قُمت زاقه الباب ودخلت سُفت
ابني واقف لابس جلاية سودا وأبوه زيّه.. وُسُفتها كانت حلوة عادية لكن
بجرد ما شافتني فتحت بوقها وكشرت و سنانها خرجت برّه وزعقت بصوت
زي الكلب ووشها اسودّ وطلع فيه شعر كثير لحد ما بقت فعلاً كلب
وظلعت تجري من الأوضة ووقعت أنا على الأرض وخرجت هي تجري.

بعدها حسيت بضرب الوقاد لي وهو يصرخ: قطعني الجلسة يا
ملعونة.. مش معرف أجوزة أي جنية تاني بدأت أضرخ أنا كمان وأقوله:
أحسن أحسن..

قطعني طقوس الزواج يا ملعونة.. قضيتي على وريشي!

أما عن ابني فكان قاعد على السرير ساكت مايتحركش وسايب أبوه
بضرب فيّ..

الوقاد بصر لي وقاله شيلها ارميها برّه.. دي ضيعتك.. أنت اللي منعتني
نرميها برّه من الأول.. كده مالكش جواز من بنات الجن أبداً وهي
السبب..

قام ابني من على السرير وعدانا وخرج.. أبوه وقف وفضل يزق فيّ لحد
باب البيت وأنا أبوس إيديه يسبني وفتح الباب وأنا أحلفه بأي حاجة
أفضل بسببها جوة البيت.. لحد ما جه ابني أخيراً نطق: سببها..

الوقاد: نعم..

ابني: بقولك سييها.

الوقاد: بعد كل اللي عملتهولك بتقولي سييها!

ابني: قولتلك سييها.

الوقاد زقني ورماني على الأرض وقاله اشبع بيها!

وطلع أوضته.. فضلت أعيط.. ابني سندن ووداني أوضتي وفضلت
أقوله نهرب يا ابني

ماردش عليّ وقفل باب أوضتي وراه ومشي من غير ما يعلق.

كانت ليلة صعبة عليّ جدًا كملتها عياط وندم على كل اللي عملته من
ذنوب طول عمري ونمت من التعب..

وصحيت على هوا بيخبط في وشي فتحت عينيّ لقتني.. لقتني في شارع
عارفاه كويس شارع الترب.. وإيديّ ورجليّ متكتفين ومرمية على الأرض..
وواقف قدامي وقاد وابني.. وبدأ ابني يتكلم: بوظتي كل حاجة.. بوظتي
لي حياتي.. بوظتي لأبوي كل اللي كان ناوي يعمله ليّ.

قولته: خلاص يا ابني مش هتدخل تاني.

قالي: ما انتي مش هتدخلي تاني عشان خلاص مالكيش مكان وسطنا تاني.

الوقاد: خلاص يا حفيظة، إوعي تكوني فاكرة إنك ممكن تقلمي ورشي
عليّ، ده شارب الترياق.. هو انحرم من جواز آه لكني هجوزه واحلة
زيك يعمل فيها زي ما عملت فيكي وتكون جارية زيك.

حفيظة: خلاص يا وقاد اللي تطلبوه هعمله.

الوقاد: مش عاوزين منك حاجة تاني.. إحنا حتى مش هنموتك.
حفيفة: انتوا هتيسبونى مرمية هنا في التُّرب لو حدي للصبح.
ابني ضحك بصوت عالي: هنسيك آه.. لو حدك لأ.

ولانتة جاب فأس كبيرة وعلى باب تربة فضل يدق ويقول: إحنا
بنفلق نومكوا اخرجوا.. إحنا بناذيككم اطلعوا.. إحنا بتحداكم..

يا معشر الموتى.. يا معشر الأرواح.. يا آل عثمان.. وفضل يدق بالفأس
ويدأ الباب يتكسر.. ومعاها اتكسر طوب كثير من طوب التربة.. ودخل
الوقاد وبدأ يخرج جثة قديمة عبارة عن هيكل عظمي وكفن شايفها
بسبب نور القمر وربما قدام التربة برّه

وابني نزل عليها بالفأس وأنا هموت من الخوف وأصرخ وأقوله:

- لا يا ابني بلاش الميتين بلاش دول.. ابني كان جوة عينيه نظرة
مجانين..

وفضل يقول ورونا هتعملوا إيه بعد ما خلص شال أكوام العضم
ورماها جوة التربة، وقام زاققني ومخلي وشي مقابل للتربة وقال مع
السلامة.. الوقاد قال لي: ابقي قوليلهم إنك ماعملتيش حاجة، وإنك مراتي
وأم الوريث.. بالمناسبة دي جثة «عثمان»
وعثمان الكبير نفسه..

يعني أنا موته وجيت قلقت عضمه..

ويدأ الوقاد يضحك بهستيرية

وخذ ابني ومشي.. لا ابني إيه بقى.. أيوة ابنه.

فضلت أصرخ وأستجد ولكن مشيوا والمكان سكت تمامًا وأنا جسمي

عمال يترعش ويتنفض من الرعب والبرد المحيط بيّ و عينيّ مركزة جوه
التربة الضلّمة اللي اترمي عضم الجثث فيها.. وبالمناسبة عيلة عثمان دي
زيهازي الوقاد بتوع تحضير زيه لكن مات منهم ٣ فجأة دفنوهم وسابوا
البلد.. فيه ناس قالوا إن الوقاد هو اللي موتهم.. المهم إنهم اتدفنوا هنا
وأنا قدام تربتهم حالاً. ومدفون معاهم كبيرهم، قالوا الوقاد موته واتنين
انتحروا بعده، والله أعلم.

بحاول أقوم مش قادرة ماقداميش غير إني أفضل مكاني لحد ما الصبح
يطلع.. والناس تمشي في الشارع وأصرخ ويسمعوني لأن واضح إن التربي
من حظي مش موجود الليلة، لكن بدأت أشوف في القبر في الضلّمة جوة
حاجة نورت نور صغير واتظفا بعدها نور تاني واتظفا.. بعدها بدأت الملح
حركة جوة الضلّمة..

بدأت أوسع عينيّا عشان أشوف أكثر.. ومش عارفة.

لكن فجأة سُفت في وشي على مدخل القبر المتكسر شخص خارج
زاحف من القبر و جلد وشه دايب وكمل زحف وقرب مني.. ومدّ يديه
ومسك طرف جلايتي فضلت أصرخ وأحاول أزحف لورا وهو يشد
فيّ لكن كان ضعيف، مقاومتي كانت أقوى منه بكثير فزحفت لورا فعلاً
وماقدرش يحركني لكن يديه فضلت متبّنة في هدومي..

وخرج باقي جسمه.. جثة بني آدم متحللة، ويحاول يقف مش
عارف، لحد ما خرج واحد تاني زيه ومسك في هدومي هو كمان وبدأوا
يشدونني لحد التربة، فضلت أقاوم وأصرخ.. لحد ما سمعت صوت
ورايها لاقيت حاجة طويلة جداً مش عارفة أوصفها لك.. هي عاملة زي
ما تكون ست لكن شعرها منكوش وطويلة أوي ورجليها عاملة زي
رجلين الحيوانات ووطت عليّ وبدأت تشم فيّ: وقالت قولي للوقاد الرد
جايلك ومش متحملة.. ويرجلها زقتني زقة خدت اللي كانوا يشدونني

واتزقينا كلنا جوة التربة.. مع الزقة بصيت وأنا جوة القبر سُفت رجليها
بس ومشيت.. وأنا فضلت جوة التربة سامعة صوت نكش حوالي في كل
مكان..

ما تحملتش الموقف وأغمى علي لكن وأنا غايبة عن الوعي سمعت
كلامهم ارموها برّه.. الأم ستتقم لأينا بعدها فقت لقتني في المستوصف
وبعدا جيت هنا؟

وكل يومين ألاقه جاي هنا يهددني ويقول إنه يقدر يعمل أكثر من
اللي عمله بس ما قولتلوش على اللي العفريته قالتة!! خليها تحرقه يارب!
بس من أول مرة أنت جيت مجاش.. مسيره يجي.. حتى سألتة عن
ابني قالي إنه لو ابني جالك هيعمل فيكي أكثر من اللي عمله المرة اللي
فانت.. هو مابقاش ابنك خلاص.. هو وريشي دلوقتي..

خلصت حفيظة كلامها وعرفت منها كده حاجات كثيرة عن العيلة
الملعونة دي.

حفيظة: أنا ما عنديش حاجة تانية أحكيها.

نادر: آه خلاص أنا حتى هقفل الكاسيت أهوه.

حفيظة: طب هات باقي الفلوس.

نادر: لما تقول لي إزاي أدخل البيت عند الوقاد وابنك.

حفيظة: نعم.. تدخل فين! أنت اتجنت!

نادر: هدخل عاوز أشوف أكثر من إني أسمع.

حفيظة: ما أعرفش أدخلك.. هو أنا عارفة أدخل!

نادر: طيب أنا لو عملت عيان ورُحت له!
حفيظة: ما أعرفش! هيكشفك.. بيقدر يعرف
نادر: ما هو لازم حل.

حفيظة: شوف حد عيان وعليه جن وُخده وروح وكده هتبقى أنت في
السليم ومعاك حد بجد عيان!

نادر: خدي باقي فلوسك الساعة اتأخرت ولازم أمشي!
حفيظة: خلي بالك الوقاد غضبه وانتقامه صعب.

أرض الترعَة

كانت الساعة تقريبًا ١٢ بالليل لما سبتها، ومشيت وأنا لسه دماغي مش مقرر هعمل إيه بالضبط!

مشيت في الشارع أقلب كل اللي حكته في دماغي..

أد إيه الست دي دماغها توزن بلد ومش جاهلة..

أد إيه مش سهلة و اتعرضت لمواقف رهيبه إلا إنها قوية.. ابتزتني عشان تبيع اللي عاوزه تقوله.. أيوة اللي هي عاوزة تقوله.. لأني متأكد تمامًا إنها خبت حاجات كتير.. وحكت اللي هي عاوزة تحكيه بس.. موضوع إنها ظهرت وسط الناس واختفت فجأة ده معناه إيه برضو؟

أسئلة كتير وأفكار متداخلة فُقت منها وأنا في شارع الترعَة بين بلدنا والعزبة الغربية.. فُقت على صوت حاجة بتقع في الترعَة.. حاجة كبيرة وعملت صوت.. وقفت بصيت من بعيد على الترعَة أشوف في إيه؟

صمت تام.. كملت مشي بعدها سمعت حاجة زي ما تكون بتعوم في الميه جنبني.. وقفت الصوت سكت.. رجعت كملت مشي الصوت كمل.. وقفت وقلت ما بدهاش مشيت ناحية الترعَة.. كان في شجر غاب حاجب الرؤية.. الرؤية دي بالمناسبة يا دوب نور القمر..

مشيت جوة الغاب ده وبقيت أزقه بالراحة يمين وشمال عشان أوصل للترعَة لحد ما وصلت.. منسوب الميه كان منخفض زيادة عن اللزوم فباين الحاجات اللي في قاع الترعَة ما بين حيوانات ميتة على زباله على شولة بتاعة سهاد.. بس فيه وسط كل دول حاجه كده مكورة وكبيرة وبارزة عن كل الحاجات اللي حواليتها في أرض الترعَة..

لكن عشان هي مش زي أي حاجة غرقانة في التربة اتحركت وبدات
تقوم.. أو تحديداً اتفردت.. وقفت واتفردت وطولت طولت طولت لحد
ما بقت حاجة مش طبيعية.. ست نحيفة جداً طويلة شعرها منكوش
ومش قادر أشوف ملامحها من العلين.. اللي كاسيها..

اتحركت ببطء ناحيتي.. بدأت أنا كمان أتحرك بظهري ببطء شديد
جوة الغاب واحدة واحدة.. وقفت هي، لكن أنا كملت تراجعني بظهري
بهدوء شديد.. في لمحة لقيتها جاية بسرعة رهيبة ناحيتي، سرعتها شلتي
مكاني اتلخبطت وقعت على ظهري ومالحقتش أعمل أي حاجة لأنني لقيتها
واقفة عند رجلي.. طولها مش طبيعي ورجليها مش رجلين بني آدمين
نفس الوصف اللي وصفته حفيظة.. بدأت أقولها أنا ماعملتش حاجة.. أنا
ماعملتش حاجة.. يارب انجدني يارب.

نزلت بجسمها زي الأفعى ووشها قريب من وشي وشفت وشها وش
أسود مخيف عينها صفرا مشقوقة طولياً وشها ملبان طين.

أنفاسها حارقة لا تحتمل.. وقربت من وشي جداً غمضت عيني وبدات
أتشاهد وشريط حياتي كله مر بسرعة في عقلي وفُتت على صوتها في وداني
بتقول: بلغ الوقاد إني مخلص عليه بنفسني..

لما سمعت الجملة جالي شجاعة غريبة وحسيت إني مش أنا المستهدف
وقولتلها هو انتي مين؟ فتحت عينها على الآخر وصدر منها حرارة
شديدة جداً أذتني.

وقالت: جنية عثمان.. مراته

أنا مراته..

في اللحظة دي افكرت حكاية جواز ابن الوقاد اللي باظت بسبب
حفيظة.. عثمان بقى اتجوز من جنية فعلا!

كملت كلامها وقالت لي: دخلني عنده.. دخلني عنده.

بحذر وقلق قولتها: أدخلك إزاي؟!

ردت: هو محصن بيته.. دخلني أنت بالحجاب.. دخلني بالحجاب.

واختفت تراجع بسرعة وعاد للمكان كله هدوؤه.

قُمت وقفت وطلعت أجري زي العيال الصغيرة لحد ما خلصت
شارع الترعة .

وأول ما دخلت البلد تظاهرت بالهدوء وأنا ماشي في الشارع لكن
هدومي اللي اتملت تراب وطين من وقعتي في الغاب كانت ملفتة للكمام
واحد القليلين اللي كانوا ماشيين في الشارع وشافوني وبرقوا..

وصلت البيت وكانوا نايمين.. دخلت خدت دش دافي كنت محتاجه
جداً وطلعت دخلت المطبخ وعملت كوباية شاي ودخلت أوضتي.

وجبت الكاسيت وورق وقلم وجبت اللي سجلته من الأول وبدأت
أسمع وأسجل ملاحظاتي..

نمت على المكتب من كتر التعب وأحلام وكوايس كثيرة متداخلة
لاردتني، ولكن أوضحهم كان حلم لبنت صغيرة خبطت على باب
أوضتي وقعدت معايا وقالت لي ماتنساش حجاب الجنية! دخلها!

قولتها يعني إيه؟

البنت: عثمان الكبير كان أقوى من الوقاد لكن الوقاد فضل يمارس كل
أع السحر والشعوذة لحد ما قضى على نص العيلة وموت عثمان.. والجنية

مش عارفة تتقم منه، حاطط طلسم حوالين بيته يمنع دخولها.. لكن
الحجاب بيحك الطلسم وتقدر تدخل..

نادر: طب ما تأذيه وهو برّه البيت.

البت: هي عاوزة تخنقه جوة بيته زي ما عمل في جوزها.

نادر: طب وابنه؟

البت: هتدخل وهو برّه لأنه أسوأ من أبوه.. ومسكت إيدي وقالتلي

ألف سلامة.

نادر: وأنا إيه استفادتي لما أعمل كده.. هو ما عمليش حاجة.

البت: لأ عملك وهيعملك وهتضمن عدم غضب الجنية.

نادر: ده اللي هو إزاي يعني؟

بدأت البنت تبص بغضب شديد وبدأ جلد لها ينسلخ من على جسمها
وخرج منها جسم أسود طويل نحيف عيونه صفراء مرعبة سنانه حادة
مريية جسمها كله متفحم وطولها نحيف.

كنت قاعد على الكرسي وهي واقفة قدامي زي العملاقة!

وبصوت عامل زي أصوات كتير خارجة من الجحيم قالت: دخلني
عنده.. دخلني عنده وفضلت تكرر في الجملة .

لحد ما صحيت وأنا مخنوق وقُمت من على السرير تعبان جداً.

لكني افكرت !

الشاش الأسود بصيت تحت السرير مفيش له أي أثر .

فتحت الأوضة وخرجت أسأل ماما اللي قالت لي شاش إيه أنا
مادخلتش أوضتك من امبارح.. سبتها ودخلت الأوضة قلبتها مفيش أي
حاجة.

لا فوق السرير ولا تحته ولا كان في أي حاجة!

حاجه جت في بالي ما أعرفش إزاي ومنين.. قفلت باب أوضتي
بالمفتاح وقلعت القميص والبنطلون ووقفت قدام المراية زي ما توقعت
كل آثار الجروح واللي كان موجود كله اختفى تمامًا!

هل البنت هي السبب أو الجنية دي من باب الرشوة يعني ده عشان
أنفذ المطلوب.. طب وإذا أصلًا نفذت.. هو فين الحجاب ده أصلًا!!
باب الأوضة خبط وحد حاول يفتح قُلت: ثواني ولبست بسرعة
وفتحت لاقيت والدتي داخله وشكلها متضايق جدًا.

نادر: خير مالك في إيه؟

والدتي: يعني مانتش عارف!

نادر: عارف إيه يا ماما؟ في إيه؟

والدتي: أبوك قالي.

نادر مقاطعًا: يوووه يا ماما.. هو بابا ليه مكبر كل حاجة.

والدتي: مكبر.. هو كده أنت شايفه مكبر!! ما اتعودتش منك تكون
سليبي كده يا نادر.

نادر: يا ماما سليبي في إيه؟ هو أي كلام يتقال وخلص نصدقه؟!

والدتي: خلاص يا ابني.. أنا غلطانة.. كنت فاكرة إني معرف آخذ
وأذي معاك في الكلام، ولكن واضح إن كلام أبوك صح.

نادر: وبأبا قال إيه؟

والدتي: قال إن حالك اتغير وبقيت غريب وإنك مخبي حاجات كبيرة
عنتا.. ده حتى استغرب لما شافك في العزا.

نادر: طب ده كده معناه إني وحش!

والدتي: يا ابني أنت بتقضي الغرب واجب وتيجي على اللي يخلصنا
تسيه!

نادر: هو إيه اللي يخلصنا ده.. أنا مش فاهم حاجة.

والدتي: مرروة بنت خالتك!

نادر: مرروة مالها؟

والدتي: هو إيه اللي مالها أو مال انت بترد عليا في إيه من الصبح!
هو مش أبوك قالك!

نادر: قالي! قالي إيه! آه آه عندها مشاكل مع جوزها تقريبا..

والدتي: مشاكل! يا ابني مرروة طالبة الطلاق أو مال أبوك قالك إيه!

نادر: يا أمي أنا مش فاهم.

والدتي: يا ابني أنا عاوزاك تاخدها توديه للشيخ لظفي لأن ابارح لما
ضغطنا عليها فضلت تلطم وتصوت وعملت حركات غريبة.

أبوك بقى لما قولتله نادر ياخذها ويوديه أو نجيبها هناتاني والشيخ
يجي قالي الشيخ لظفي زعلان متا وإنك أنت السبب.. هو أنت زعلتني
حاجة يا نادر!؟

نادر: والله أنا ولا زعلته ولا أي حاجة.. خلاص أنا معدني عليها
وآخذها وأروح للوقاد.. أنا ما أعرفش ازاي نطقت الاسم وهو مكنش في
بالي ولا كنت عمري هفكر في كده.. أنا كل تفكيري إني كنت أعمل عيان
وأروح له.. ده إذا رُحت!

الكلمة طلعت من بوقي ودخلت دماغني.. تفكيري كله اتشل لثانية
وبعد ما حصلي عاصفة من الأفكار المترابطة بالسيناريو!
اللي هيحصل مروة عيانة فعلاً يعني أنا مش هكون بكذب.

هقدر أدخل وأعرف كل حاجة.. هبقى حققت كل اللي أنا عاوزه
وعملت مشروع تخرُّجي ووصلت لأقصى درجات طموحي في عالم
الغيبات.. إيه ده.. ده أنا لو مرتبها مكانتش هتطلع بالدقة دي أبدًا!

كده اصطدنا خمس ست عصافير بحجر واحد.. قطع تفكيري كلمتين
من أمي: طب وأنا.

فُقت فجأة من السرحان اللي كنت فيه وبصيت لقيت البت الصغيرة
تاني وأمي مش موجودة.
قولتها وانتي إيه.

البت: رتبت كل حاجة ونسيتني!

نادر: أنا مانستكيش ولا حاجة بس بس.. تداخل صوتها مع صوت
أمي وتبدلت ملامحها للامح أمي.

والدتي: خلاص يا حبيبي شوف هتروح إمتي وأنا هاجي معاك.

نادر: لا.

والدتي: خلاص خد والدك.

نادر: لا.. أنا مش صغير أنا هروح لوحدي.

والدتي: خلاص يا حبيبي.. رتب أمورك وشوف هتروح إمتى وأنا
هبلغ خالتك ومروة مش معترضة على فكرة..
أنا هقوم أكمل غسيل..

وطلعت أمي وجبت ورقة بسرعة وقلم وكتبت خطوط عريضة ليلى
هيحصل كله.. ماعدا ما يخص الحجاب لأنى لسه ماقررتش هعمل إيه..
وسبت الورقة على المكتب وقلت لازم النهارده أفصل تمامًا وأخذ إجازة
من الأحداث المتلاحقة دي شوية..

وبكرة أقرر هعمل إيه..

خرجت من البيت ورُححت بيت خالتي.. مروة لو نسيتوا هي بنت
خالتي اللي الشيخ لظني المفروض عاجلها بالرقية وكده والحقيقة إنها بقت
كويسة و اتجوزت و المفروض إن الحياة بقت تمام لكن واضح إنها مش تمام
ولا حاجة.

أنا مش هنسى يوم جواز مروة.. أمها كانت بتعمل حاجات غريبة
جدًا.. كل دقيقة تروح ترقبها.. وكل ما حد يسلم على مروة تجري تمسح
إيد مروة بالمناديل و أي بنت تيجي تبوس مروة تشدها وتقول لها بلاش
علشان المكياج هيوظ.. كان منظرها كوميدي جدًا والناس كلها كانت
بتريق عليها.. لكن الأهم من ده غير إن منظرها مسخرة لأن كان منظر
مفضوح جدًا.. ومحدث ما فهمش خالتي بتعمل كده ليه.. والتعليقات كنت
سامعها بوداني.. ما بين: «معلش ماهي طلع عينها على بال ما جوزتها»

«الولية اتجنتت»

«هي فاكرة إن بنتها مفيش غيرها ولا إيه»

«اعذوروها ما البت طفقت عرسان ياما»

«دول بيقولوا إنها عملة عمل للعريس»

و كلام كثير من العينة دي

المهم اتجوزت وأديني رايح اشوف إيه حكايتها؟!!

وصلت بيت خالتي وخبطت ووقفت شوية برّه سامع حوار بين خالتي و مروة و صوت بيعلا فخبطت تاني.. الباب اتفتح ولقيت مروة

مروة: نادر انت إيه اللي جابك؟

نادر: نعم؟

مروة: نعم الله عليك.. بقولك إيه اللي جابك؟

تدخلت خالتي في المشهد: اتفضل يانادر يا ابني معلى اصل مروة

اتجنتت تاني

مروة: أيوة اتجنتت و أنت جاي بقى يا عم الشيخ تنقذها صح؟ صح؟

نادر: مروة اهدي شوية، في إيه..

مروة: ما فيش حاجة.. ارجع للي باعتينك و قول لهم أنا هتطلق يعني

هتطلق.

نادر: حااااضر ممكن أدخل طيب؟

مرورة: هو إيه واحدة عايضة تطلق لازم تكون يا ملبوسة يا مجنونة
عندكم؟!

خالتي : ادخل يانادر يا ابني..

دخلت و مرورة قعدت على الكرسي و بدأت تحكي على خلافات زوجية
عادية جدًا و ارد جدًا إنها تحصل بين أي اتنين متجوزين و و ارد برضو جدًا
إنها تحصل و و ارد إنها توصل للطلاق.. مابين إهمال و تجاهل و حاجات
بتحصل في أحسن العائلات زي ما بيقولوا..

مرورة: ليا حق أتطلق ولا لا ؟

نادر: أيوة بس أنا سمعت منك بس..

مرورة: يعني أنا كدابة؟

خالتي: أيوة يا ابني كلامك عين العقل، أنت لازم تسمع من جوزها
كمان دي مش مدياله فرصة.

مرورة: لاء لاء.. ماتقعدش مع البني آدم ده.

نادر: طيب انتي إيه يرضيكي؟

مرورة: أتطلق..

نادر: حاضر هطلقك بس هنعمل مشوار سوا.

مرورة: كفاية مشاوير ..

نادر: ماما قلت لي إنك مش معترضة.

مرورة: أنا مش معترضة.. بس الحكاية إني مش عاوزة أرجع له.

نادر: معلى خديني على قد عقلي يا مروة.

مروة: على العموم الشيخ لظفي راجل محترم...

خالتي: مقاطعة الحوار.. راجل بتاع رينا و هو اللي مجوزك.. قومي البسي هدومك و أنا هغير و نروح بيت خالتك و نادر هيروح بييه.

أنا سمعت الكلام فلاقت كمية كوارث طالعة منه فقاطعت خالتي:

- لا ياخالتي و لا هتلبسي هدومك و لا هنروح عندنا البيت و لا أنا هروح أجيب الشيخ لظفي أساساً..

مروة: يعني إيه؟

نادر: الشيخ لظفي أنا كلمته و قالي هاتها و تعالى أنا مش هقدر آجي المرة دي خالص.

خالتي: طب هاجي معاكم.

نادر: لاء هو اشترط محدش يجي غيري.

خالتي: نعم؟ ليه يعني؟

نادر: هو أنا مش اد المسؤولية ياخالتي!

خالتي: لا مش القصد.. بس المرة اللي فاتت مكنش النظام كده يا نادر يا ابني.

استمر الحوار والقعدة طولت جداً.. و في الآخر أنا انتصرت، ودخلت مروة تلبس هدومها، و أنا قعدت أفكر في الخطوة اللي أنا خدتها.. هو أنا مستوعب بعمل إيه؟ هو أنا عارف أنا مقبل على إيه؟

أنا واخذ بنت خالتي موديا فين؟ ولين؟

أنا رايح للغول برجلي!!

يا ترى هو هيقابلني اذااي؟

يعرفني وهيكمل انتقامه، ولا مايعرفش أي حاجة حسب رواية
حفيظة!؟

أسئلة كثير وخبطة كثير و دوامة أفكار قطعها صوت مروحة وهي
بتقول: يلا يا نادر أنا جاهزة.

الفصل الثامن

من غير ليه

خرجنا ومشينا في الشارع ندردش سوا و أنا دماغي معاها في كلام و
كلام تاني مش سامعه ومشينا وروحنا العزبة ومرورة غالبًا مش واخده بالها.
ورقفت في الشارع و سألت على بيت الوقاد.. الراجل اللي سألته بص
لي بصة رعب وهلع و قالي الشارع اللي بعد اللي جاي..
رجعت لها فقالت لي هو إيه الوقاد ده؟!
قولتلها وقاد!.. وقاد إيه؟!
مرورة: أنا سمعتك بتقول للراجل فين بيت الوقاد..
نادر: اه.. هبقى أحكيك..

وكملنا مشي و دخلنا الشارع اللي المفروض البيت فيه.
مشيت أبص يمين و شمال أدور على البيت لحد لما لاقيته وعرفته
لوحدي.

بيت تلات أدوار قديم شبايكه طويلة جدًا.. الناس بتيجي عنده و
تلاقيها سرعت مشيتها و كأنها بتهرب منه.. بيت كئيب في شكله من برّه.

و اتأكدت أكثر إنه بيته لما لاقيت الباب بيتفتح و خرج منه اثنين سنان
ساندين واحدة تالته، و عمالين يقولوها ما تقلقيش بإذن الله شهر و متحملي
زي ما سيدنا الوقاد قال.

مروة بصت لي وقالت: الوقاد.. الوقاد.. أهو الاسم اتقال أهوه..

قربنا من الباب فالست الي كانوا ساندينها قربت مني، و قالت لينا:

- بلاش.. بلاش.. الي بيجيله مرة ما يعرفش يبطل.. بلاش..

تجاهلت كلامها وخبّطت على الباب..

انفتح الباب و لاقيت واحد عنيه بيضا تمامًا، واضح إنه كيف.. فضل
واقف ساكت ..

مروة انفزعت و مسكت فيّ.

بعد صمت لدقايق.. الراجل قال: انتوا مين و عايزين إيه؟

نادر: إحنا جاين للوقاد.

الراجل المجهول: الشيخ الوقاد تقصد.

نادر: آه..

الراجل المجهول: بس انتوا اتأخرتم.. تعالوا بكرة..

مروة: طب كويس يلا بينا يا نادر

الراجل المجهول: استنوا. و قفل الباب.. و رجع فتحه.. سيلنا قال

اتفضلوا.

دخلنا.. و خليني أوصف لكم المشهد بالضبط..

بيت قديم و أنت ماشي على أرضه الخشب بتصدر أصوات طرقة
تمزق، و على يميني و شمالي أبواب أوض مقفولة من تحتها فيه نور طالع
من تحت الباب.

ما عدا أوضة واحدة لقيت الراجل وقف عندها و اتلفت و بَص لنا و
قال: استوا جوة لحد لما الشيخ يأذن.

دخلنا الأوضة كانت عبارة عن أوضة مضلمة برغم إن فيها لمبة قديمة
و شبايكها مقفولة مكتومة مفيهاش هوا.. كنب كتير على الأرض بنسبه
عندنا الكنب البلدي.. فهمت من المنظر إن دي أوضة الانتظار.

فعدنا و بدأت مروة في استجواب طويل بقيت بتجاهل معظمه.. القعدة
استغرقت حوالي عشر دقائق.. و ظهر الراجل عند باب الأوضة.. و قال
خدنوا الإذن اتفضلوا.. بس جهزوا الهدية الأول.

نادر: هدية إيه؟

الراجل المجهول: هدية التعارف.

نادر: بس أنا ما أعرفش و الله إننا كنا لازم نجيب هدية معانا.

الراجل المجهول: هدية إيه اللي تجيها.. الهدية يعني فلوس.. الشيخ
ياخد ٣٠٠ جنيه في الأول، و ممكن ياخذ تاني لو الحالة محتاجة.. ولو
محتاجش مش هياخذ تاني.. و ممكن يرجعك فلوسك كمان.

نادر: بس أنا مش معايا المبلغ ده.

طلعت مروة من شنتتها الفلوس و اديتهم للراجل

رفعهم قدام عنيه البيضا و كأنه شايفهم و شاور لنا اتفضلوا تعالوا.

وخرجنا من الأوضة ورجعنا في الطرقة اللي جينا منها الأول.. أوضة
على الشمال خبط عليها واستنى.. وخبط مرة ثانية وثالثة ورابعة لحد سبع
مرات واحنا ساكتين.

وبعد الخبطة السابقة فتح الباب وشاور لنا ندخل..

دخلنا وقفل الباب وهو فضل بره ومشى، لقينا المنظر المعتاد بتاع
الأفلام الأوضة عبارة عن دخان وروائح غريبة مزيج من أبخرة غريبة
وريححة خشب قديم وزيت محروقة.. هي عموماً ريححة تقلق ومش مريححة.
وفي وسط كل ده كان قاعد على كرسي.. قاعد بيص لنا بتركيز وكأن
بيقرا أفكارنا.. أنا واقف ومرورة واقفة ورايا وماسكة في زي الأطفال، قرنا
وقلت له السلام عليكم إحنا معلىش مانعرفش المواعيد.

قاطعني وقال: خلاص انتوا دخلتوا.. اقعدهوا على الكنبه اللي قدامي
دي.

قعدها على الكنبه في مواجهته.. كان قاعد قدامنا والأبخرة طالعة من
مبخرتين كبار وراه واحده على يمينه وواحدة على شماله.
أما قدامه فكان تربيضة مربعة كلها كتب وورق وخيوط ومصحفين
ثلاثة على اعتقادي يعني.. ومقص.. وحاجات غريبة.

مكتش حابب بيان إني مركز أوي معاها..

مرورة اتكلمت فجأة وقالت: هو انت مين؟

رد وهو بيضحك وقالها: انتي جاية عندي ومش عارفة أنا مين؟

مرورة: هو اللي جابني وماقاليش.

بص لي بصره كلها استغراب وقال: أنا الشيخ الوراق ماسمعتيش عنني

قبل كده ولأيه.

مرورة: لأ أول مرة أسمع من شويه واحنا جاينين.. نادر كداب.. كذب على أمي وخالتي وعليّ أنا كمان وقال هيو ديني للشيخ لطفى.

الوقاد: ضحك بصوت عالي ساخر.. لطفى.. انتي هنا عندي.

بص لي وقال: وأنت بقى ماتخافش زيارتك مش هتكون على الفاضي.

أنا مش عارف أعمل إيه ابتسمت ابتسامة باهتة.

الوقاد: أحكي لي يا بنتي.. خير.

بدأت مرورة تتكلم وأنا مديت إيدي بالراحة وكنت جايب معايا الكاسيت الصغير ومجهز شريط «من غير ليه».. ضغطت على زر التسجيل.. ومرورة فضلت تحكي وهو يسمع لحد ما خلصت.

قالها: موضوعك سهل وهيخلص الليلة بس هتتعبى معلىش شوية.

مرورة: يعني إيه أنا عاوزة أتطلق.

الوقاد: لأ مش المهم انتي عاوزة إيه.. خُدامي هُما اللي هيحددوا.. مدّ يده على المكتب وفتح كتاب وقطع منه ورقة صغيرة وطلعها قدام بوقه وكأنه بيوشوشها.. طلع كوباية نصها مليان ميه من تحت الترييزة وحط الورقة فيها.. وفضل يهز الكوباية لحد ما الورقة شربت الميه، وبعدها قام من على الكرسي وقرب منّا.. وادى مرورة الكوباية وقالها اشربي ده.

مرورة بصت لي فشاورت لها إنها تشرب وتعمدت أقولها بصوت عالي: اشربي يا مرورة أكيد الشيخ ساحر الميه دي (عشان أخليه يتكلم).

بص لي وقالني: أبوة ساحرها.. وكأنه بيتحداني.

شربت مرورة الكوباية وقام زائق الكوباية على بوقها وقالها ابلعي الورقة.. ابلعيها.. ابلعيها.

وبعد ما خلصت قالها: اصبري شوية وهنكمل.

وقام باصص لي بصة طويلة ما فهمتهاش. قعدنا دقيقتين.. كان الوقاد
بيقلب في الكتب وطلع كتاب وقعد يقلب في صفحاته وجابه ورجع لنا
وقالها اقري الكلام ده..

بدأت مروة تقرأ اللي شاورها لها عليه.. بصوت واطي.. قُمت قولتها
علي صوتك يا مروة.

الوقاد بص لي بغضب شديد وقال: أنت جاي معاها ليه.

- خُفت وماردتش..

بدأت مروة تقرأ من الأول:

الحاضرون لإنجاز المهام

الحاضرون لمحو الأثام

الحاضرون لطمس الأوهام

الحاضرون يصحبهم الألام

الحاضرون لإنجاز المهام

الحاضرون لمحو الأثام

الحاضرون لطمس الأوهام

الحاضرون يصحبهم الألام

وفضلت تعيد فيهم يحي خمس مرات..

وفجأة سكتت ويرقت عينها على الآخر وفضلت تبص ورا الوقاد

وتقوله لأ قولهم يمشوا.. قولهم يمشوا

الوقاد: كام واحد حضر؟

مروة: كثير كثير قصيرين وشعرهم طويل وسنانهم تحوِّف الأوصاف
اللي مروة قالتها دي هي (نفس الأوصاف دي أنا عارفها كويس وشُفتها
قبل كده في الكابوس)

الوقاد: ماتخافيش منهم دول جاين يساعدوكي.

مروة: لأ أنا متكتفة مش عارفة أتحرك.

الوقاد: قولتلك ماتخافيش سيبيهم يشوفوا شغلهم.

مروة: ابعدوا عني.. ابعدوا عني.. يا نادر حوشهم وابعدهم عني.

نادر: مروة دي تهيئات أنا مش شايف حاجة من اللي بتقولها دي.

مروة: لأ دول جاين ناحيتك أنت كمان.. اهرب يا نادر.. اهرب..

(مروة صوتها اتحول لصوت تخين أجش مفرع)

اهرب يا نادر اهرب.. هتهرب وتروح فين يا مسكين أنت جيت

بنفسك لحد هنا.

إحنا حذرناك.. حذرناك.. حذرناك.

الوقاد اتحرك بهدوء وراح قعد على الكرسي، أما مروة ففضلت تتشنج
وأيديها خشبت وصراخها لا يتوقف.. وأنا في منتهى السلبية كل اللي عاوزة
إني أكمل تسجيل.

مروة صراخها زاد وبدأت تقول بتحرق بتحرق.

صرخ الوقاد بانتصار: طبعًا هتتحرق أنا ما بحذرش جنني قبل ما
أحرقه.. أنت هتتحرق حالًا.

مرورة: لأ.. حرام.. ارحمني.. ارحمني.

الوقاد: إلى الجحيم.. إلى الدرك الأسفل.. إلى الجحيم.

مرورة: صرخات متتالية بدون توقف.. وبدأت تشاور على صدرها
وتبص لي وتقولي: هموت يا نادر.. هموت يا نادر.

وفضلت تشنج ولاقيته وقف معاه كوباية فيها سائل أحمر وغالباً دم
وقربها من بوقه وقال: مثلما حضرتم لخرقه.. أطلقوه للجحيم.. وأعيدوها
لنا..

مثلما حضرتم لخرقه.. أطلقوه للجحيم.. وأعيدوها لنا.

وقام راشش الكوباية على وش مرورة دفعة واحدة.. مرورة قامت وقفت
زي التمثال والدم مغرق وشهها ومفيش ولا نقطة نزلت على هدومها..
السائل ده تجلط ومسك في وشها بقى عامل زي ماسك أحمر مفروود على
وشها.

قرب الوقاد جنب ودنها الشمال.. وقال: عتيد.. عتيد أتم المهمة

جراز - زام - راش - المغادرة.

وفضل يعيد فيها.. وبص لي وقالي: اقرأ في ودنها اليمين آية الكرسي
والمعوذتين وزعق لي وقال: يلاً انجز قوم اعمل اللي قولت لك عليه.
قُمت وقفت ومرورة لازالت كالتمثال بس هو عمال يقول الحاجات
الغريبة دي في ودنها الشمال بصيت على وشها لقيت عينها الشمال بتبريش
بسرعة جداً واليمين متجمدة زي باقي جسمها..

قربت من ودنها قالي الوقاد بين كل سورة والثانية قول رقيب ٣ مرات

عملت اللي قال عليه بدأت بآية الكرسي وقُلت بعدها رقيب ٣ مرات

بعدها (قل هو الله أحد) والفاصل رقيب ٣ مرات

بعدها (الفلق) والفاصل رقيب ٣ مرات

بعدها (الناس) ونفس الفاصل

ومن شغلي مع الشيخ لطفي عارف أدعيه كثير بدأت أقولها:

رب أعوذ بك من همزات الشياطين وأعوذ بك ربّي إن يحضرون

أعوذ بكلمات الله التامات من شر ما خلق

كنت بقولهم بصوت واطي جدًا - الوقاد زعق وقال: قول الي قولتلك

عليه بس..

رجعت أعيد الي هو قال عليه بدون تجويد مني..

بدأت ألاحظ إن عين مروة اليمين بدأت كمان ترتجف ببطء ثم بسرعة زي الثانية لاحظت إن صوابع إيدها بتترعش.. سمعت صوت صرخة مكتومة خارج من مروة بدأ يعلا يعلا لحد ما فتحت بوقها وسمعت أكثر صرخة حادة سمعتها في حياتي لدرجة إنني حطيت أيدي علي وداني!

الوقاد: كمل.. كمل - وفضل يقول الحاجات بتاعته بصوت عالي، وكملت أنا لكن صوتي بدأ يعلا أنا كمان لأنها عمالة تصرخ لكنها لسه واقفة متخشبة في مكانها ووشها غرقان الدم الغريب الي لزق فيه.

لكن صوتي كان كل ما أعليه صوت الوقاد يعلي عليه.. فبدأت أعلي عليه فلاحظت إن ده مضايقه لكنه ماعلقش وصلنا لمرحلة إننا حرفيًا (بنصرخ احنا الاتنين) وتخطينا مرحلة الزعيق.. وبدون سابق إنذار مروة وقعت على الأرض.. وتوقف صراخ مروة.. وساد المكان صمت رهيب.

شيلتها من على الأرض وقعدتها على الكنبه.. وبصيت له قالي: سبها
هتفوق دلوقتي ورجع للكرسي بتاعه وبدأ يقفل كتبه من جديد ويعيد
رصها على التراييزة بهدوء شديد..

سمعت صوت تكة مميز أنا عارفه كويس.. صوت يبين إن الوجع
الأول من الشريط اللي بسجل عليه «شريط محمد عبد الوهاب من غير ليه»
خلص وبالحسابات كده ممكن تقول إننا كده استغرقتنا نص ساعة مثلاً..
مع إني حسيت إننا بقالنا خمس ساعات بسبب اللي حصل ده!
أنا مش هدعي حاجة ما حصلتش أنا ماشفتش غير اللي حكيت لكم
عليه!

لكن اللي مروة شافته حكيت جزء منه، وأكد لما تفوق هتكمل الباقي
ويعرف شافت إيه بالضبط..

كنت عاوز أطلع الكاسيت وأقلب الشريط لكن الوقاد نظراته لي كلها
شك، وبعد اللي مروة قالته كنت متوقع إنه يتقلب علي.. لكنه برضو
ساكت ومكتفي بنظراته لي..

هل ده معناه إن خدامة دول مابلغهموش!

هل ده معناه إنه لسه مايعرفش أنا هنا ليه!

ولا هو عارف كل حاجة وساكت لسبب هو الوحيد اللي عارفه!

ممكن يكون الانتقام.

ممكن يكون الفضول.. عاوز يشوف آخري..

هتجنن من التفكير وأحب أقولكم حاجة زادت الموضوع عندي لخطبة

بزيادة

إن مش ده الوقاد اللي سُفته في الكابوس.. هو شبهه لكن مش هو!
قطع تفكيري صوت الوقاد وهو يقول:
مش يمكن القرين!؟

الجملة نزلت على وداني زي الصاعقة.. يا خبر أسود أنت سامع
أفكاري ولآ إيه؟

الوقاد: القرين أيوة ممكن يكون اللي مكره مروة في جوزها.. وارد
الحدوث.

نادر: آه.. آه ممكن.. هي هتفوق إمتى!؟

الوقاد: شوية ماتقلقش..

رجع الوقاد يقلب في ورقه فانتهزت الفرصة ومدت إيدي بالراحة
طلعت الكاسيت وقلبت الشريط وضغط الزرار.. ورجعت تاني لهدوثي..
وفجأة.. لقيت حد بيغني جزء من الأغنية اللي اعتبرتها تعويذة النهاية
بالنسبة لي وعمري ما هنسي الجزء ده كان يقول:

زي ما رمشك خد ليالي

وحكّم وأمر فيها وفي

ولا قيت بيتي بعد الغربة قلبك ده وعيونك دي

ولا قيت روحي في أحضان قلبك

أحلم وأصحى وأعيش على حبك

حتى في عز عذابي بحبك

عارف ليه من غير ليه يا حبيبي بحبك

اللي كان بيحصل وقتها والأغنية دي شغالة كالاتي:
في الأول حالة صمت وذهول.

بعدها أنا متأكد إن الصوت ده مش من عندي

بعدها أدركت الكارثة أنا مضغطتش زرار التسجيل أنا ضغطت زرار
التشغيل والأغنية اشتغلت

بعدها مديت إيدي أتحمس زرار الغلق مش لاقيه.. لاقيته بعد رحلة
بحث طويلة ضغطت عليه.. لا يستجيب.. مرة واتنين وتلاتة

حتى الكاسيت قرر إنه يتأمر ضدي ويفضح أمري..

آخر حاجة طلعت الكاسيت وضغطت زرار stop

سيكوا من كل ده..الوقاد!

الوقاد كان قاعد يتأمل اللي بيحصل وهو مبتسم

أنا عرقان ومتلخبط وعندي هلع.. وهو مبتسم

بدأت أقول أي كلام:

- البتاع الكاسيت اشتغل لوحده

- أصلي قعدت عليه فاشتغل

- أصلي بتمشى بالليل ويحب أخده معايا يسليني

أنا آسف إنني نسيت أقفله وأنا داخل

كلام كثير مفكك عمالة أتلعثم وأنا بقوله.. والوقاد لسه باصص لي..

فسكت لأن واضح إن الكلام ممنوش فايده، وبعدها أنا سكت رجع

الوقاد يبص في كتبه وورقه وكل شوية يبص لي بصة مريية لمدة ثانية..
في اللحظة دي سمعت صوت آهات مروة.. بدأت تفوق.. شكلها
وهي بتفوق بوشها الدموي ده يخوف جداً..

نُمت وقفت وبدأت أخبط على وشها عشان تفوق أسرع..
فاقت وفضلت ساكنة باصة لي بصة كلها أسئلة..

وبعدها بصت للوقاد وقالت له:

أنت عملت في إيه؟

الوقاد: عملت اللي انتوا جاين عشان أعمله.

مروة: يعني إيه؟

الوقاد: حرقنا هولاك خلاص.

مروة: هو مين؟

الوقاد: اللي كان لابسك.. روعي البيت وعاوز أشوفك «بكرة في نفس
الميعاد»، أو بعد بكرة بالكثير عشان نمنع دخول غيره.

نادر: طب وجوزها هترجع له إمتى.

تجاهل الوقاد كلامي وكمل كلامه لمروة: هتروحي تاكلي وتنامي
وأوعي تستحمي الليلة نهائي.. جسمك هيتأذى..
بكرة ممكن..

ومنعوت تروحي الليلة برضو.

وأبي حاجة هتحلمي بها اكتبها عشان ماتنسيهاش ولما تيجي لي تحكيها لي
وما تجمش لوحدك، تعالي انتي والأستاذ.. وبص لي بصة مرعبة خلت

جسمي كله يترعش.

الوقاد : ادخلي الحمام في الأوضة اللي قدامي اغسلي وشك قبل تمشي.
سندت مروة وخرجنا من الأوضة فتحنا الباب لقينا الراجل الكفيف
اللي دخلنا واقف اتحرك وفتح باب الحمام .. دخلت مروة وبعدها بثانيتين
صرخت جريت خبطت على الباب وصرخت فيه إيه؟

ردت قالت لي: وشي وشي يا نادر إيه اللي عليه ده!

اطمنت وقلتها معلى اغسله بس دلوقتي وبعدين هفهمك.

سمعت صوت رهيب وكأنه جاي من أعماق الجحيم بينادي عليّ
باسمي طبعاً صوته هو.. دخلت أوضته بص لي وهو مبتسم

الوقاد : مش نادر برضو.

نادر بحذر : آه.

الوقاد : مش عاوز تسألني عن حاجة.

نادر : لأ إحنا هنعمل اللي أنت قلت عليه.

الوقاد : أنت فاهم سؤالي كويس، طب أغير السؤال :

مش عاوز تقولي أي حاجة يا نادر

نادر : لأ مش عاوز.

الوقاد : خلاص براحتك.

دخلت مروة وهي بتترنح من الصدمة أول ما شافها قالها:

معادكم بعد بكرة مش بكرة.. أصل ابني جاي من سفرياتة بكرة

وهقعد معاه.

لقتني بسأله بسذاجة : هو ابنك بيسافر ليه؟

الوقاد: ابني بيسافر يعالج زي أبوه في كل حته في مصر.

نادر: يعني مايقعدش هنا خالص.

الوقاد: لأ يقعد، بس نادر يا نادر!

نادر: هو متمكن زي حضرتك كده.

الوقاد: أكثر أكثر.. بس شبهي في ملامحه.. ده وريشي.

نادر: ووالدته؟

الوقاد قام وقف وبرق عينيه: أنت بتسأل في حاجات كثير وفضولك

هيقضي عليك..

سمعت الجملة كانت نفس الجملة في الحلم.. كان بيقولي يا فضولي.

خدت مروة ومشينا واحنا خارجين الراجل الكفيف قال لنا تجيبوا

بعد بكره ٢٠٠ ج.

فقلت له: الله ٢٠٠ جنيه ليه.

قال لي: أوامر سيدنا.

سبناه ومشينا وبدأت أحكي لمروة كل اللي حصل وهي غايبة عن

الوعي منها، وأنا بحكي افتكرت وقولتها:

- انتي بصيتي لي وزعتي وصوتك اتغير!

مروة: أنا مش عارفة أي حاجة من اللي أنت حكيتة أصلا من أوله،

أنا كل اللي فاكره إن الدنيا دارت بيّ ودُخت وحسيت بألم رهيب في صدري

وليديّ اتكثفت، وبعدها ألم في وداني لا يحتمل وسمعت صوتك بتقرأ قرآن

وصوت تاني عمال يقولي كلام غريب.

نادر : طيب انتي ناوية على إيه؟

مروة : ناويه على إيه ازاي ، هعمل اللي قاله.

نادر : يعني هتيجي هنا تاني!!

مروة : أنت غريب جدًا.. أنت اللي جيتني هنا ودلوقتي مستغرب!

نادر : لا مش قصدي بس قُلت هترفضي تكلمي.

مروة : مش هخسر حاجة، وبصراحة أنا عاوزه أعرف الراجل ده

بيعالج إزاي .

نادر : يا شيخة! انتي لحقتي!

خلاص بعد بكرة هعدي عليكى بعد المغرب هكون جايب معايا

الفلوس ونروح له تاني.

مروة : لا طبعا أنا اللي بتعالج وأنا اللي هحاسب.

نادر : بطلي غباء، أبويا هيزعق أصلاً لو عرف اللي بتقوله ده.

مروة : يزعق مايزعقش أنا محدش يصرف عليّ أنا مش شحاتة.

نادر : طيب اقفلي الموضوع ده مش وقته المهم نفذي اللي طلبه بالحرف

وحكاية الأحلام دي برضو وجوزك؟

مروة : جوز مين يا حاج.. أنا بكرهه أكثر من الأول ولو كان عليّ

عفاريت الدنيا كلها والأخ ده طلعهم برضو هنتطلق.

نادر : وأمك هتقولي لها إيه؟

مروة : هقولها إنه كويس.. الراجل ده فيه حاجة بتشدك ليه جدًا.

مروة : بس أنت مخدتش بالك من حاجة!

نادر : حاجة إيه؟

مرورة : الراجل كان بيص لك بصات غريبة شوية.

نادر : لا.. عادي يعني.

مرورة : لأ مش عادي طبعًا.. أنا بعد ما فقت حسيت إنكوا في بينكوا
تلق قديم والراجل كل ما يقول كلمة بيص لك.. ولما أنت تتكلم بيتجاهل
كلامك كأنك من غير زعل يعني نكرة.

نادر : طب يا أخني يا محللة.

واخنا ماشيين في شارع الترعة بقيت سامع صوت الميه تاني كأن حد
يعوم مع خطواتنا.. تجاهلته وخصوصًا إن مرورة واضح إنها مكتش
سامعاه.. فاعتمدت إن ده غالبًا تهيؤات ولو حتى مش تهيؤات أكيد مش
هروح أبص في الترعة.. لأن لو حاجة موجودة فأنا عارف كويس جدًا..
إيه الموجود.. وعاوز إيه!

ووصلنا خلاص، دخلتها بيتهم ووالدها قابلتنا وبدأت تسمع اللي
حصل من مرورة وشوية حاجات كده متفرقة مني.. بعدها استأذنت
ومشيت. طول ما أنا ماشي في الشارع حاسس إن في حد ماشي ورايا..
لكن لما أبص ما الأقبش أي حد!

لقيت ورجعت تاني أجيب الشارع من أوله يمكن أشوف حاجة، لكن
في آخر الشارع كانت واقفة طفلة صغيرة.. واقفة ببات ما بتحركش..
طفلة أنا عارف كويس هي مين.

مشيت في الشارع وبدأت ألاحظ إنها بتطول كل ما أقرب من نهاية
الشارع لحد ما وصلت لنفس الشكل المرعب: نحيفة جدًا طويلة جدًا..
كنت تقريبًا وصلت لنص الشارع، بدأت تتحرك بنفس الطريقة بالظبط

بسرعة خاطفة.. اتلفت عشان أطلع أجري.. لاقيت الطفلة في وشي.. وبكل
براءة الأطفال قالت لي: مفيش وقت بعد بكرة آخر فرصة تدخلني..

بعدها طلعت تجري.. وعدى من جنبي الخيال الأسود الطويل بسرعة
وعداها هي كمان!

روحت وأنا عمال أفكر أدخلها ازاي والبتاع ده مش معايا اللي هدخلها
به ولو دخلتها هو هيعمل في إيه.. أنا ماليش دعوه بحد!

وصلت البيت لاقيت والدي ووالدي مستنيني عشان برضو أحكي
لأنهم سمعوا خطوط عريضة من خالتي وعاوزين التفاصيل! بقى مني أنا!
فضلت أجيب كلمة من الشرق على كلمة من الغرب وأنا بأكمل
عشان مش عاوز أحكي اللي قالته مالوش لازمة.. شكروني جدًا وأشادوا
بموقفي الرجولي.

والدي ضحك وقال لي: أو مال إيه حكاية الأغنية دي.

نادر: أغنيه إيه دي؟

والدي: مروة بتقول إنك في عز القعدة شغلت أغنية.

نادر: هي كانت سامعة! أو مال ماقلتش يعني!

والدي: ويتقول إن الشيخ الجديد اللي أنت ودتها له كويس إنه
ماطر دكوش رايح تشغل أغاني عند شيخ يا نادر.

نادر: وماقلتش ليكوا اسم الشيخ كمان؟

والدي: آه الشيخ محمد.. بس مين ده يا نادر؟

نادر: الشيخ محمد آه.. ده شيخ كويس زي لظفي.. بس أشطر.

والدي: رينا يكرمك يا ابني.. دي البننت مبسوطه اوي وأمها بتقول

إنها بعد جلسة القرآن اللي جاية شكلها كده هترجع لجوزها.
اتبسطت جدًا إن مروة قررت من نفسها ماتقولش اسم الوقاد وتألف
حكاية وأي اسم.

كمان هي فهمت إن ده مش شيخ ولا حاجة.. ده واحد ساحر مسخر
جن ويبأذي أكثر ما يفيد.. بس واضح إنه هيفيدها فهي قررت إنه طالما
منستفيد يبقى الأفضل تكمل من سكات معاه.

خلصت أكل ودخلت الحنّام أغسل إيديا لاقيت ماما واقفه قدام باب
الحنّام ويتسألني وهي ماسكة حجاب.. «آه حجاب، مش حجاب البنات
اللي يلبسوه على شعرهم لأ.. حجاب بتاع المشايخ.. ويتاع واحد زي
الوقاد يسموه عمل أو سحر».

والدتي: إيه ده يا نادر لاقيته في هدومك وأنا بغسل.. كويس إنه ما
اتفلسش.

نادر: إيه ده؟

والدتي: ما أعرفش أنت كنت هتاخده معاك للشيخ ولأ إيه.
ووالدتي واقفة بتكلم لمحت حد عدى بسرعة من وراها حد قصير
شعره طويل أعرفه كويس.. الطفلة.

ففتحت بوقتي من الخضة..

والدتي: مالك يا نادر؟

نادر: لأ مفيش أصلي افتكرت واتضايقت إننا ماخذناش الحجاب ده
للوقاد؟

والدتي: الوقاد مين؟ أنت قولت الاسم ده قبل كده..

نادر: أقصد الشيخ.. الشيخ ده اللي لسه جاين من عنده.

والدتي: ما أنا قلت كده برضو خُدهُ أهو طيب.

نشفت إيديَّ وخذت من أمي الحجاب ده ودخلت أوضتي.. الحجاب
عبارة عن مثلث ورقي صغير متفخ.. لونه بني.. ورقه قديم جدًا.

طبعا مش محتاجة ذكاء هو ده اللي هتدخل بيه العفريته بيت الوقاد
وهيفك التحصين اللي مش عارفة تخترق بيته بسببه.

كده الصورة وضحت أكثر.. وظهور البنت مابقاش في الأحلام بس.

بس أنا برضو مش عارف أقرر، ما أنا لو ماعملتش كده واضح إنها
هتوريني الويل، ولو عملت كده الوقاد هيعمل في إيه.. ولو خلصت عليه
وماالحقش يعمل فيا حاجة.. الجن اللي مسخرهم هل هيسيون في حالي..
وابنه اللي راجع ده هيكون عارف وهيتقم لأبوه ولا إيه هو كمان!

إيه اللي دخلت نفسي فيه ده!!

كان عنده حق لما قال لي فضولك هيخلص عليك.. لازم آخذ قرار
حاسم في موضوع العفريته ده!

حطيت راسي على المخدة علشان أنام ونمت على جنبي اليمين لاقبت
صوابع بتخبط على شهري.

جسمي كله اترعش.. صوابع بتخبط كأن حد بيقلبي اتلفت تي عاوزك
في حاجة..

صوابع صغيرة.. ففهمت إنها الطفلة.. فاتلفت لكن كانت العفريته
قاعدة ورايا بشكلها الأسود وشعرها المنكوش وسنانها المخيفة.

بصت لي وقالت: آخر فرصة.. آخر فرصة.

أنا حميك منه.. أنت هتساعدني.

لكن لو غدرت محدش هيحميك مني !
قُتلها: أنا ماليش دعوة باللي بينكوا !
قالت لي: كاسر الطلسم معاك، وهدخل بيه وأنا هدخل وراك..
فضلت ساكت وقلت: أنا بحلم.. بحلم.. يارب أصحى يارب أصحى..
صرخت: وقالت لأنت صاحي والجاي هيكون الكابوس.
وقامت طارت من على السرير واخترقت مراية الدولاب اللي اتشرخت
بعدها لكنها ما اتكسرتش.
شدت الغطا عليّ واستخبت تحته ونمت.. نمت من التعب بعد اليوم
الصعب ده.. نمت هروب من التفكير اللي مايبتهيش.
نوم ثقيل متعب.. قُمت منه الضهر زهقان وقرفان ومش طابق أكلم
أي حد أول ما قُمت بصيت على مراية الدولاب سُفت شرح فيها جايها
من فوق لتحت.
قُمت خرجت من الأوضة وغسلت وشي اتوضيت واصلت..
وظلعت قعدت في الصلاة.. والدتي عملت لي فطار.. فطرت وفضلت
طول ما أنا قاعد هي تتكلم وأنا أهز رأسي.. لحد ما زهقت مني وقالت
إنها متقوم تكمل تجهيز الغدا..
الباب خبط فتحت لاقيت حد مش متوقع زيارته.. الحاج مختار.
دخل بعد ترحيب كبير مني.. ووالدتي عملت لي الشاي المعتاد
وسابتنا ولاقيته عمال يتفحصني وأنا أتهرب من عينيه
نادر: في إيه يا عم مختار؟

الحاج مختار : أنت مش عارف في إيه؟

نادر : آه.. حضرتك جاي عشان الفلوس.. أنا عارف إني مفروض ما أتأخرش وأرجعها لك.

الحاج مختار : نادر بطل استعباط.. أنا قولت إني مش عاوزهم.

نادر : لأ.. ازاي دي فلوس حضرتك.

قاطعني بصوت عالي: نادر بطل كلام ملوش لازمة.

نادر : في إيه يا عم مختار.. بجد أنا مش فاهم..

مختار : حالك مش عاجبني.. خدت بنت خالتك وديتها فين إمبراح.

نادر : إيه!

مختار : إيه مش سامعني! خدتها وروحت فين.. مين الشيخ محمد ده!

نادر : والدي لحق يقولك؟

الحاج مختار: هي بقت كده! متضايق إني عرفت.. طيب على العموم مش والدك.. دي خالتك اللي قابلتني الصبح وهي رايحة السوق وحكت لي وعمالة حتى تدعيلك.

فقلت أعرف منك وأهو بالمرّة أروح له وأرجع أدعيلك أنا كمان يا بركة.

نادر : عم مختار أنا مش فايق لتريقتك خالص.

مختار : طيب هقولك كلمتين ودول هيكونوا آخر كلمتين في الموضوع ده تمامًا.

الوقاد غير لطفي.. الوقاد يعني سحر وأعمال وتسخير جن وكفر وشرك والعياذ بالله.

الوقاد مش سهل يتضحك عليه ده لو أنت رايح من باب الفضول..
أما لو رايح وعابز تتعلم منه فيبقى يا ألف خسارة عليك وعلى ثقتنا كلنا
فيك.

نادر : ماتقلقش عليّ أنا عارف أنا بعمل إيه كويس.

مختار : يبقى متضيع..البنّي آدم ده ماينفعش معاه الثقة دي أبدًا

لا هو ولا مراته ولا حتى ابنه.. ولو حطك في دماغه محدش هينجداك
منه غير حد بيعمل نفس أساليبه وإنك تخاوي جن أنت كمان يحصنك
وبجيبك منه. الوقاد حط عيلة في دماغه قضى عليها.. مع إنه كبيرهم كان
منجوز جنية من تحت الأرض.. ويقولوا عنها عاوزة تتقم لجوزها بكل
الطرق.

كل كلام مختار بيأكلدي إني ماشي صح جدًا، ومفيش أي حاجة من اللي
بنحصل لي أو هام..

خلص عم مختار كلامه

نادر: حاضر يا عم مختار، اطمئن، وزّي ما وعدتك هحكملك كل حاجة
في الوقت المناسب.

قام عم مختار ومشّي وهو متضايق من تلميذه النجيب وهو بيكبر
ويتمرد عليه وبيأخذ قراراته من نفسه، وكمان مايعرفوش هو بيعمل إيه.

الفصل التاسع

الهامسون

دخلت أوضتي وطلعت الشريط وجبته من الأول، وبدأت أسمع
وجبت ورقه وقلم عشان أسجل ملاحظات واتفاجئت إن في ملاحظات
كثيره وجديدة لازم تسجل..

بدأ الشريط يظهر الكلام فيه واحنا قاعدين في أوضه الوقاد والحوار
المبدئي اللي دار بينه وبين مروة اتفاجئت إن طول ما مروة بتكلم سامع
أصوات كثيرة كلها عاملة زي ما تكون ناس كثيره بتتنفس جنب صوتها.
وفي وقت مروة كانت عيطت لمدة بسيطة وهي بتحكى فسمعت
الأصوات دي بتتحب هي كمان وأصوات بكاء غليظة تخوف لكنها
بعيده.. لما عليت الصوت سمعتها بوضوح أكثر..

لما بدأت الجلسة وبدأت مروة تتألم وتصرخ بدأت الأصوات دي تعلوا
وتصرخ هي كمان.. إلا صوت واحد وسطهم صوت أنا عارفه كويس عمال
يقول خلاص خلاص.. الصوت ده صوتي! أبوة صوتي أنا ما أعرفش إزاي
بس صوتي قلتها مرتين وسكت.. وسمعت صوت خافت يقول اشربي يا
مروة.. اشربي.

وبدأ الوقاد يقولها تقرأ التعويذة بتاعة التحضير وبدأت أسمعهم بيردوا

عليها، هم مين مش عارف لكني سمعتهم الهامسون.. مروة أكيد وهي
بغرا مكتش عارفة دي إيه..

قالتها أول مرة من غير احد يرد عليها

- الحاضرون لإنجاز المهام

- الحاضرون لمحو الآثام

- الحاضرون لطمس الأوهام

- الحاضرون يصحبهم الآلام

وبدأت تعيدها

- الحاضرون لإنجاز المهام

فردّ الهامسون: حضرنا وتنجز

- الحاضرون لطمس الأوهام

رد الهامسون: حضرنا ونطمس بأمر سيدنا.

- الحاضرون لمحو الآثام

رد الهامسون: حضرنا وسنمحو الآثام.

- الحاضرون يصحبهم الآلام

ردوا عليها: حضرنا وسنديك أشد أنواع الآلام.

وعادت مروة الطلسم ده أو التعريضة وكل مرة تعيد يعيدوا ردودهم

فما كان

عادت مروة للصراخ وبدأت تقول: مشوهم.. مشوهم

ودار الحوار بينها وبين الوقاد الي حكيناها قبل كده حول عندهم

وأشكالهم.

وظهر صوتي: أنا مش شايف حاجة ودي أوهام.

الي حصل إن بعد الجملة دي حصل صمت شوية، وبعدها سمعت

صوت يخوف بيقول لمروة غالبًا: بشره بعذاب اليم.

فصرخت مروة : جاين عليك يا نادر، اهرب.. وتحول صوتها لنفس الصوت المرعب وهي بتقول هتهرب وتروح فين.. إحنا حذرناك.

- وقفت الشريط وبدأت أكتب ملاحظات عن اللي بيحصل.. مضمون ملاحظاتي إن أنا كنت مش شايف أي حاجة غير مروة والوقاد، ولكن من الواضح إن اللي كان بيحصل كان أكبر من كده بكثير والأعداد المتواجدة حوالي كانت كثيرة جدًا..

شغلت الشريط تاني وعادت صرخات مروة.. وظهر صوت الوقاد يقول طبعًا هتتحرق.

وإذا بصوت مختلف عن كل اللي فاتوا بيصرخ: بتتحرق.. بتتحرق.. حرام.. حرام.

والهامسون بدأوا يقولوا: إلى الدرك الأسفل.. إلى الدرك الأسفل.. إلى الجحيم.

صرخات كثير لمروة وبعدها كلام من الوقاد وصمت فجأة غالبًا كده بعد ما رش الدم على وشها..

ودار الحوار بتاع إني أقرأ قرآن جنب ودنها اليمين.. وبدأ هو يقول: عتيد عتيد عتيد

وسمعت صوتي، بدأت أقرأ آية الكرسي.. لسه بقول «الله لا إله إلا هو..» وبدأت أصوات الهامسون تعلا جدًا، وبدأوا يصدروا أصوات مفزعة وفضل صوت حاد مستمر زي صوت أجهزة الكشف على مستوى السمع اللي بتكون عند دكاترة الودان.. مزعج جدًا فوطيت الكاسيت، وبدأت أجري الشريط شوية لحد ما خلصت وسمعت صوته يقول لي: سييها هتفوق دلوقتي.

وبعدها صمت شوية وعاد الهامسون للكلام..

احترق العاشق.. احترق الجن العاشق

أنجزنا المهام.. محونا الأثام.. طمسنا الأوهام.. أذقناه أشد الآلام

أنجزنا المهام.. محونا الأثام.. طمسنا الأوهام.. أذقناه أشد الآلام

خلص الشريط.. أو الوجه الأول من الشريط وللأسف ما سجلتشي أي
حاجه ثاني.. قلبت الشريط عشان أجرب أسجل عليه وأطمئن إن الوجه
الثاني سليم.

ضغطت على زر التسجيل وبدأت أجرب وأقول أي كلام.. باب
الأوضة خبط قُمت فتحت لاقيت والدتي جايبه لي كوباية عصير، وقالت
لي إن خالتي كانت عاوزة تيجي معاكو المرة الجاية فقلتلها يا ماما هو احنا
هنعيده كل شوية مش هينفع..

خرجت ماما ورجعت قعدت على السرير، وبدأت أشرب العصير،
خدت بالي إن الشريط لسه بيتسجل عليه فقفلت وجبت الشوية دول من
الأول وشغلته سمعت الكلام كله اللي سجلته اطمنت إنه شغال ده حتى
صوتي خبط والدتي على الباب واضح جداً وأنا برده وأقول حاضر..

فإذا بصوت سمعته قبل كده من مروة متداخل مع حوارني مع أمي.

افتح الباب يا نادر.. افتح يا ويلك (الصوت كان واضح إنه بره
الأوضة)

سمعت صوت فتح الباب، وبدأت أسمعها ثاني :

لقد علم سيدنا.. لقد علم سيدنا

انتقامه منك هيكون شديد..

فات وقت الهروب.. اعتذر لسيدنا.. اعتذر

بعدها رجعت أغنية «من غير ليه» تشتغل..

قفلت الشريط وبحر الحيرة بيكبر ومش عارف آخذ برضو القرار.
ولما الجن احترق مش المفروض إن مروة كده خفت أو مال ليه عاوزنا
تاني نروح له.. وليه مروة ملاحظتش عليها تحسن ولسه مصره على
الطلاق!!

أكيد الجن بيساعدوا في الكذبة الكبيرة اللي الناس كلها بتقع ضحاياها
لازم أكون سبب في فضح النبي آدم.. بس ده مش معناه إني أرجع أروح
تاني!!

مر اليوم ده على كده، وعلى آخر اليوم كنت خدت القرار.. كفاية
لحد كده وهروح بعد يومين للشيخ لطفى ومحكي له وهشوف إيه ممكن
يتعمل وهقول لوالدي، ولو قرب مني، أهلي فعلاً هيموتوه..

خدت القرار وارتحت نسيباً واتصلت بالليل على الساعة عشره بمروة
وبلغتها إننا هنا جل المشوار عشان مضطر أسافر أجيب شوية حاجات من
القاهرة لمشروع التخرج بتاعي ويحث آخر السنة..

مروة بان عليها إنها اتضايقت جداً ولكنها قالت جملة واحدة! معلى
أنا هستناك لما ترجع يا نادر نروح ده إذا كنت ناوي فعلاً تروح.

كنت متوقع منها رد أعنف من كده بكثير.. وكنت متوقع خالتي تثور
وتتصل بعدها بوالدي تقلب الدنيا.. لكن لا ده حصل ولا ده حصل..
- غريبة.. بس كده كويس.. معنى كده إن قراري ده صح.

الفصل العاشر

انتقام زوجة «الكابوس الثاني»

قعدت في الصلاة أتفرج على التلفزيون لكن من ورا التلفزيون ظهر ظل أسود كبير امتد على الحيطه وتحرك على السقف بسرعة وسقط أمامي عبارة عن حافة شبه كرة كبيرة من الشعر.. لميت رجلي طلعتها على الكنبه وفضلت أتأمل الشيء ده.. كورة سوداء من شعر آدمي ساكنة في انتظار حركتها أو انفجارها في أي لحظة.. حجمها كبير مش صغير.

لحظات مرت عليا زي الساعات وأنا مابعملش حاجة غير إني يبص على الشيء ده التلفزيون بدأت إشارته تبوظ وتشوش..

الشيء ثابت وأنا مشلول.. عاوز أنادي على والدي صوتي مش خارج مني..

عاوز أقوم.. مش عارف أتحرك!

ومن ورا التلفزيون ظهرت الطفلة وبدأت تتحرك في هدوء في الصلاة رايحة جاية وأنا مش عارف ناوية على إيه.. لقتني بقولها: ممكن تمشي البتاعة دي عشان نتفاهم طيب..

ورجعت تمشي في الصلاة وتأمل في التابلوهات المتعلقة بيمين وشمال وتبص لي وتضحك..

قطع الصمت صرخة شقت سكون الليل صرخة جاية من جوة من
أوضة أمي وأبويا..

اتحركت غصب عني من صوت صرخة أمي.. مع حركتي ما الحقتش
أشوف فين الكورة السودا نطت في وشي..

اتنفضت خدت الكنبة ووقعت على ضهري على الأرض والكورة دي
في وشي.. بس لما وقعت هي بعدت ووقفت عند رجلي كانت الكورة دي
موجودة.. وطلعت على رجلي وبدأت تتحرك عليهم وجاية ناحية وشي!
وهي بتتحرك على رجلي بدأت أشوف ملامحها.. فعلاً هي كائن بشع
فعلاً كورة من الشعر أشبه ما تكون بالقنفذ لكن لها وش صغير غريب
وسنانها بارزة عاملة زي الدبابيس والإبر، ولها إيدين رفيعة ورجلين برضو
رفيعة مش فاهم إيه الكائن ده!

لكن كل اللي حاسس به دلوقتي ألم وحرارة عالية كل ما تلمس جزء
من رجلي وهي بتتحرك عليها..

سامع صوت أمي منهارده جداً جوة ووالدي عمال يزعتق ويقولها في
إيه.. فيه إيه؟!!

وعنيا مع الشيء ده اللي بيتحرك وبدأ يطلع على بطني ويتحرك بمتهي
البطى والألم عاوز اتحرك برودو بدون أي فايده.

وكمل مشواره خطوة خطوة لحد ما وصل لصدري ورفعت راسي
شوية عشان أشوفه.. كلمة بشع هي أقل وصف له..

وقف على صدري وبطل يتحرك لكن كان بيخرج منه صوت عامل
زي صوت التعابين والفحيح المرعب ده..

لكن جت الطفلة.. وقعدت جنب رأسي.. وقالت لي:

- أنت نويت تغدر.. وأنا نويت أعاقب.
أنت أخليت بالاتفاق.. وأنا هنفذ تهديدي.
كانت بتكلم بمتهمي البراءة.. محدش يصدق أبدًا إن التهديدات دي
خارجة منها.

نادر: أنا ما وعدتش بحاجة.. أنا مش هروح له تاني لا ليكي ولا لمرودة.

الطفلة: هتروح.

نادر: ليه؟

الطفلة: عشان أدخل.. لازم أنتقم لسيدي.

نادر: ما تشوفي حد غيري..

الطفلة: هشوف لو أنت رفضت وعقابي نزل عليك.. أكيد هشوف.

نادر: حرام عليك.. أنا غلظت إني رُحت من الأول.

الطفلة: وغلظت أكثر لما فكرت تغدري.. أنت عارف؟ أنا هعاقب

بينك كله.. أدخل شوف والدتك.. قبل ما تموت!

أول ما قالت الجملة دي.. الشيء الأسود نط على وشي حسيت بمليون
لايرة بتغرس في وشي.. مش شايف حاجة.. الجسم الأسود كله فوق رأسي
لكن الألم لا يتحمل.. فجأة جسمي اتفك وبدأت انتفض وإيدي اتحررت
فمسكت الشيء ده وبدأت أحاول أرفعه عن وشي بأي شكل لكن كان
ماسك في جلد وشي زي الخفاش ما كانوا يقولوا لنا زمان إنه لو مسك في
حد «ما يطلعش غير بالطبل البلدي»..

لكنه سابني فجأة نط من على وشي ولمحته بعيني بيجري ناحية الطريقة
اللي فيها أوضتي وأوضة أمي وأبوي..

وبعدها بشواني سمعت صرخة أمي.. نفس الصرخة اللي سمعتها من
شوية، وبعدها نفس كلام والدي وزعيقه ونفس سؤاله : هو في إيه.. فيه إيه؟
كان الشريط يتعاد من الأول!

بصيت قدامي ما لقتش الطفلة لقيت العفريتة الطويلة سوداء الملامح
بتاعة الترعة واقفة وشعرها المجعد يتمايل.. واقفة بتبص لي وعينها كلها
شر ووعيد!!

قُمت بسرعة وجريت للأوضة بتاعة والدي ووالدتي.. فتحت الباب
لاقيت أمي قاعده على السرير وأبويها جنبها ومبرقة عندها وفتحها على
الأخر والدموع نازلة زي المطرة..

وأبويها عمال ينجبط على وشها ويفوق فيها.. والدي كانت مصدومة
واللي على وشها ده آثار الصدمة..

نظيت على السرير وبدأت أساعد والدي وأكلمها:
ماما.. ماما.. ماما.. ردي عليّ.

والدي: ما أعرفش مالها.. أنا صحيت من النوم على صوت صرخاتها.
اتفزعت وبصيت لقيتها مش جنبي لقيتها واقفة قدام الدولاب وفتحها
وواقفة قدامه تصوت جريت عليها سكنت خالص وجبتها فعدتها على
السرير وعمال أنادي عليك ما بتردش.

نادر : مالك يا أمي سُفتي إيه؟

والدي وهي بتصرخ : ابعده عني.. ابعده عني.. أنت السبب.

نادر : في إيه يا أمي؟ في إيه؟

والدي : ابعده عني.. هنموت كلنا بسببه.. إديها اللي هي عاوزاه..

نادر : هي مين وأديها إيه؟

والدتي : وديها مكان ما هي عاوزة تروح..
أبويها : طيب اهدي وھيعمل كل اللي انتي عاوزاه..
والدتي : مش أنا اللي عاوزه.. هو عارف كويس مين؟

دخلها البيت

خليها تاخذ بتار جوزها

أنت معاك مفتاح دخولها

دخلها البيت.. حرام عليك.. دخلها البيت.

وفضلت أمي تعيد وتزيد في الكلام ده.. لحد ما تعبت ونامت.. وخرجنا
أنا والدي برّه والدي مش فاهم أي حاجة، لكنه سألني أنت فاهم؟
فقلت له: لأ إستنى لما تصحى ونفهم منها.. والدي كان بيتكلم واحنا
قاعدين في الصلاة سمعته في نص كلامه بيقول التلفزيون غالبًا باظ.. بصيت
لقبت صورة التلفزيون متجمدة على صورة بشعة، صورة الجنية المخيفة
زوجة عثمان والدي عمال يطفى التلفزيون ويشغله يرجع نفس الصورة.
وبعدها بقت صورة الكائن المدور المشعر اللي كان بيتحرك عليّ..
وسمعت والدي بيقول إيه الشكل ده أعوذ بالله!

وبعدين بص لي وقال: إيه ده مال وشك؟

نادر: مال وشي؟

والدي: مليون خربشه ودم مخدمش بالي منه قبل كده، لسه شايفه حالًا.

نادر: مش عارف يمكن قطة ولا حاجة!!

والدي: بس إحنا معندناش قطة!

نادر: يا بابا خلاص شوف أنت التلفزيون أهم.

والدي: أنا هشيل الفيشة خالص وبكرة نشوف له تصليح، أنا هدخل
أقعد جنبها ومش هنام للصبح.. شال الفيشة، وبعد ما دخل التلفزيون
اشتغل لوحده وجاب نفس الصورة .

فضلت قاعد في الصلاة وعنيا غفلت وصحيت على صوت أمي وهي
بتنادي على أبويا .

«يا مصطفى..يا مصطفى».. (كنا بقينا الصبح) ..

وقفت وروحت الأوضة لقيتها صحيت.. وبابا قاعد جنبها..

كنت داخل بحذر شديد.. لكن محصلش حاجة.. بصت لي عادي، وبابا
قالها حمد الله على سلامتكم.. وسألها مالك؟

قالت له خليني أهذا وأفوق وأحكيلك بعد كده على كل حاجة..

تطوعت إني أعمل أنا الفطار.. وعملت وفطرنا وكلنا على السرير
جنب والدي.

وبابا طلب منها نخرج نقعد في البلكونة.. وخرجنا وبابا جاب هو
الشاي وبدأ يصب لنا ويقول كلام هزار من باب تخفيف حدة التوتر اللي
كان باين علينا إحنا الثلاثة.

وقعد يفتح في أي مواضيع عن الأسعار وعن خالتي وعن كليتي لحد
ما والدي قاطعته: مصطفى أخوك شحاته جالي الله يرحمه في المنام وقال:
قولي لنادر يبعد عن الطريق ده.. وبصت لي.

وقالت لي: طريق إيه يا نادر اللي عمك يقصده!!

والدي كمان بص لي فبصيت لهم الاتنين وعملت نفسي مش فاهم
حاجة.

وبدأت افتح أي مواضيع تانية انتهت بسؤالي :

نادر : هو ده يا ماما اللي حصل إمبراح بس؟

والدي : أيوة صحيح هو ده بس؟

والدتي : لا بس أنا عاوزة أتطمئن عليك يا نادر.

والدي : طب قولي لي إيه بس حصلك إمبراح؟

والدتي : أنا إمبراح دخلت نمت بعدك يا مصطفى مفيش بساعة.. بس وأنا نايمة سمعت صوت طفلة صغيرة بتعيط فتحت عيني.. واستنيت شويه الصوت سمعته تاني بيتعاد.. ولّعت نور الأباجورة وقعدت على الريير وخُفت أوي لكن كان لازم أعرف.. وقفت قدام الدولاب مش عارفة أفتح ولا لا.. أصل الصوت كان جاي من جواه.

جيت لك أصحي فيك يا مصطفى «وناديت عليك وخبطت على كفك» ومفيش فايذة مصحيتش..

الصوت علي فرُحت تاني قدام الدولاب ووقفت.. مديت إيديا وأنا قلبي عمال يدق وحاسة إنه هيتخلع وينط برّة صدري.. مسكت المقبضين بنوع الدولاب وفتحته!

مكتتش شايفة أي حاجة.. عمالة أركز عينيا عشان أشوف من الضلمة اللي جوة الدولاب.. مش شايفة.. نور الأباجورة اتطفى وبقث الأوضة ضلمة كحل.. وأنا واقفة وفاتحة الدولاب ولسه إيديا ماسكة المقابض بنوع بابين الدولاب..

حسيت بإيد ساقعة متلجة بتمسك إيدي الشمال.. مسحبتها بسرعة لقيت إيد ساقعة زيبا أو نفسها مسكت إيدي اليمين.

سحبت إيدي.. وسمعت صوت حد بيتنفس.. صوت نفسه عالي..

ويدات أحس بهوا في وشي زي ما يكون حد بينفخ في وشي.

عاوزه أصوت مش قادرة، عاوزه أرجع لورا برضو مش قادرة.
نور الأبا جورة ولع لوحده فشفت اللي في وشي ست شكلها وحش أوي
طويلة، شعرها منكوش ووشها وحش أوي وخرجت بره الدولار، فتحت
بوقها سنانها كبيرة وطولت أوي بره الدولار شعرها منكوش وسنانها
كبيرة عاملة زي أمنا الغولة اللي كانت أمي بتحكي لنا عليها يا مصطفى..
نزلت جنب ودي اتكلمت مش فاكرة قالت إيه جيت أصوت لقتني
على السرير زي ما أنا.. بس تقريباً أنا كنت صوت فعلاً لأن أنت يا
مصطفى شفتك صاحي مخضوض وقاعد جنبني تشوف في إيه..
حسيت وقتها إني تعبانة جداً وعاوزه أنام تاني فحطيت رأسي على
المخدة ونمت..

سمعت صوتك يا مصطفى بتقولي: هو أنا قولت لك نامي؟!
اتلفت ورايا لقيت بنت صغيرة قاعدة فوقك يا مصطفى..
وسنانها وبوقها غرقانين دم.. قعدت على السرير عاوزه أعملك أي
حاجة مش عارفة.. وبعدين عند رجلك عند طرف السرير لقيت بتاعة
سودا زي الكورة كلها شعر وعينها تخوف قوي وقتها صرخت.. تاني..
أمي خلصت كلامها وسكتت خالص فأبويا اتكلم.
والدي: طب ليه زعقتي لنادر وشفتي شحاته أخويا إزاي؟
والدي: زعقت لنادر؟!
والدي بص لي باستغراب ورجع بص لها.
والدي: أيوة زعقتي وفضلتي تقولي ابعده.. ده حتى قولتي.
قاطعت أنا والدي لأنني فهمت إن ده كان كلام خارج منها غضب عنها
أو بمعنى أدق مش منها هي كانت رسالة من العفريتة لي وتهديد واضح
زي ما قالت إنها هتقضي على كل عيلتي.
قطعت أمي تفكيرني لما قالت:

بس عمك شحاتة بجد سُفته في المنام بالضبط زي ما يكون عايش جه
وقالي قولي لنادر يبعد عن الطريق ده وفضل يعيد في الكلام وسابني ومشني
وكان لابس أبيض في أبيض ووشه منور زي البدر، وكان واقف في جنينة
حلوة أوي يا مصطفى..

ومشي وفضلت أنادي عليه وأقوله أخوك عاوزك يا شحاتة أخوك..

ماردش

بس استنى

ده اتلفت وهو ماشي وقالي

قوليله بلاش يا نادر ماتفتحلهاش الباب..

وفضلت أنادي عليه وأجري وأجري وراه مالحتوش خالص.. بس

سابني لوحدي ومشني..

خلصت والدتي كلامها وأحلامها وماذكرتش الجزء الخاص برسالة
العفريتة لي ومش فاكرة عنه أي حاجة.. وكده الرسالة وصلت..

مش هتسينا في حالنا.. بس أنا برضو لسه ماقررتش، لأن أنا بين
خيارين كلاما مرن أنا ضحية صراع قوتين شر هفتح بينهم باب جحيم الله
أعلم لما يفتح هيحصل إيه؟! لكن ظهور عمي كان رؤية حقيقية بيحذرنا
فيها من فتح الباب ودخول الجنينة.

جبت ورقي وأقلامي، وبدأت أكتب كابوس أمي، وكل اللي حصل
وظبطت الشريط وسجلت عليه تاني من أول الوجه التاني جملتين عن اللي
حصل.. اهتميت أكثر بالكتابة كنت عاوز أضيّع الوقت فضلت أكتب،
وبعدها بدأت أحلل اللي حصل وأكتب أكثر وختمت كتابتي بجملته
واحدة.. قرار لا رجوع فيه.. لن أذهب ورن تليفون البيت وسمعت
صوت والدتي بتكلم مع حد عادي ولكن فجأة أمي صرخت!

سمعت أمي بتصرخ وكلامها مفكك

انتني بتقولي إيه.. طفشت.. مش يمكن راحت لجوزها! أول ما سمعت
الجملة دي أدركت إن الكلام على مروة.. خرجت من أوضتي بسرعة،
خطفت التليفون من إيد أمي وكلمت خالتي أكيد هي اللي كانت بتزف
لأمي خبر طفشان مروة

خالتي: سُفت يا نادر.. الحقني..

نادر: إيه اللي حصل؟

خالتي: ما أعرفش كنا العصر كويسين ويسألها حتى عنك قالت لي ما
أعرفش عنه حاجة.. دخلت نمت شوية صحيت مالقتهاش.

نادر: طيب خدت هدومها؟

خالتي: لأ مخدتش أي حاجة.. بس خدت مني قبل ما أنام فلوس.

نادر: طيب كلمتي جوزها؟

خالتي: كلمته عادي كده جسيت نبضه من غير ما ياخذ باله لقيته
بيسألني إيه الأخبار يا حماتي هنرجع لبعض إمتى؟ فعرفت إنه مايعرفش
عنها أي حاجة!

نادر: طيب اهدي بس وأنا هجيب بابا ونجيلك دلوقتي.. سمعت ماما
بتوشوشني: اسألها خدت كام؟ سؤال أمي غريب وأنا كررته بغباء وراها.
فردت خالتي: ٢٠٠ جنيه. وبعدها زعقت لماما: فلوس إيه يا ماما اللي

بتسأل عنها

دماغني لفت وخالتي كملت عليّ لما قالت لي: إمبراح بعد مكالمتك
سألته في إيه أصلي حسيتها اتضايقت قالت لي مفيش حاجة أنا هكمل
لوحدي، ما فهمتش كانت تقصد إيه يا نادر بإنها هتكمل لوحدها.. بس لما
فكرت فهمت إنها مش هترجع لجوزها تاني وأديها طفشت آهي وعملت
الي قالت عليه..

اديت أمي التليفون ودخلت أوضتي غيرت هدومي بسرعة، وحطيت
المحباب في جيبي.. أيوة المحباب.. وسبت الكاسيت وماخذتش أي حاجة
غير مصحف صغير.. وخرجت لاقيت أمي بتقولي هتعمل إيه استني أبوك
جاي في السكة.. قولتلها أنا هسبق خليه يروح بيت خالتي أول ما يجي.
والدتي: أو مال أنت رايح فين يا نادر؟

نادر: هروح مكان تاني شاكك إنها راحتته.

والدتي: فين فهمني.. أنا تعبانة وقلقانة عليك من وقت حلم إمبراح
وعمك قالي أقولك تبعد عن الطريق ده.. أنا مش فاهمة بس ده له علاقة
باللي بيحصل دلوقتي أنا قلبي حاسس بده..

نادر: ماما لو مارجعتش روجوالعمي مختار وقوليله نادر يقولك فكر
وافتكر أنا سألتك عن مين وهي عرف يلاقيني..

ماما: نادر على فكرة أنا ما سألتكش عن الفلوس وأنت بتكلم خالتك
صفية..

نادر: فعلا؟ يبقى هي عشان تعرفني مروة فين.. سلام يا ماما
سبت أمي وخرجت وطلعت أجري في الشوارع كنا تقريبا المغرب..
وطول ما أنا ماشي عمال أقول: انتي أكيد شيفاني ساعديني أنا رايح
أهو، انقذي مروة متسيهاش.. ساعديني لما أدخل ماتسيهوش يموتني.
عمال أقول يارب الطف بمروة.. ووصلت لشارع الترعة ورُحت عند
الغاب ودخلت جواه ووقفت قدام الترعة.. وبدأت أزعق انتي فين..
اختفتي فين.. أنا رايح أهو وهدخلك مفيش حاجة خصلت.. سبت
المكان وكملت جري في الشارع ووصلت للشارع الكتيب خبطت على
الباب كذا مرة لحد ما الباب اتفتح ولاقيت الراجل الكفيف.



الفصل الحادي عشر

(المواجهة الأخيرة)

كنت حاطط إيدي على جيب البنطلون الجيب إلي فيه الحجاب وكاني بحميه.. فكرت الراجل بنفسي فرد وقال لي انت مجتث معاها ليه؟ اتظمنت إن شكوكي صح فقلت له معلى كنت في مشوار قالي اتفضل..

دخلت ومشيت وراه ووصلني لأوضة الانتظار ماقتش مروة سأته عليها قالي في حضرة سيدنا.. قُلتله عاوز أدخل لهم.

قالي : لازم أخذ الإذن منه.. قفل عليا الباب وخرج

فضلت أبص حواليا وأقول دخلتي؟ أنت فين؟

فقدت الأمل وقررت أتناسى الموضوع ده نهائي وأخذ مروة وأمشي.

- القعدة زادت عن عشر دقائق فُتحت أفتح الباب لاقته مقفول من برا.. خبطت كذا مرة.. الراجل رد من برا.. سيدنا لسه ما أذنش، في اللحظة دي سمعت همس في ودني.. «حضرنا» بصوت طفلة؟..

بصيت لقيت النور عمالة بتترعش.. الباب اتفتح لقيت الراجل الكفيف يقولي اتفضل سيدنا مستيك..

مشيت وراه.. وقف فجأة واتلفت لي بعينه البيضاء تمامًا وقال لي أنت حد جه معاك؟.. أنا حاسس إن في حد غيرنا في المكان؟

ماردنتش عليه.. خبط كذا مرة على الباب.. زي المرة اللي فاتت.

فتح باب أوضة الوقاد.. ودخلت وراه وهو خرج وقفل..

دخلت بحذر لقيته بيكتب في ورقة كبيرة ومنهمك جداً حتى ما
رفعش عينه يبص علي مجرد شاوري لي بإيده إني أقعد.. قعدت وعنيا بتدور
يمين وشمال على مروة.. مش شايفها.. تعمدت أقعد على كرسي جانبي
مش الكنبه عشان ما أبقاش في وشه..

فضل يكتب مده وأنا كل شوية اتكلم وأسأله مروة فين مايردش

لحد ما في مره علّيت صوتي فبص لي في متهي البرود وقال: ماتخافش
مش هعاقبها بذنبك يا فضولي!

اتكهرت وأنا واقف مكاني.. فضل يكمل كتابه.. ولقيته يبص على
السقف كبير وعينه رابحة جاية.. وخلص كتابه وطبق الورقة

وحط القلم وبص لي واتكلم.

خلصت اللي عاوزه

نادر: فين مروة؟

الوقاد: مروة مين أنا ما أعرفش حد اسمه مروة!

نادر: اللي كانت هنا من شوية.. عملت فيها إيه؟

الوقاد: مكش في حد هنا!

نادر: عملت فيها إيه!

الوقاد: أنت اللي عملت.. أنا ما عملتش حاجة!

نادر: مش أنت قلت مش هتعاقبها بذنبي!

الوقاد : يا ويلك من عقابي !
نادر : أنا مكتش ناوي أرجع .
الوقاد : فضولك قضي عليك .
نادر : طيب خليها تروح وانتقم مني أنا .
الوقاد : انتقامي منك بدأ بيها .
نادر : يعني إيه ! عملت فيها إيه !
الوقاد : اسأل حفيظة .
نادر : أنا بسألك أنت .
الوقاد : اسأل حفيظة عن عقابي .. مش حكيت لك .. اسأل اللي دخلتها
معاك ! الجنية الأرملة الضعيفة البائسة .
نادر : هجيب أهل البلد وهنحرق البيت عليك .
الوقاد : هات .. يارب تلاقني حد يجي معاك .
نادر : أنت عاوز مني إيه ؟
الوقاد : أنا من الأول عندي نفس السؤال من أول زيارة ليك وأنا
عارف كل حاجة ، وعارف زيارتك للخدمة حفيظة .. بس مكتش أعرف
إن فضولك هيوصلك للمرحلة دي .
كنت عاوز أعرف آخرك إيه ؟
مروة هناك في نفس المكان اللي رمينا فيه حفيظة .. في الأول وفي الآخر
تربة الكلب عتمان ..

أول ما قال الجملة دي.. صرخة شقت الأوضه مجهولة المصدر.

قام الوقاد وقف وبسببها برق لي وقال لي:

- أنت إللي دخلتها معاك أنت يا مخبول.. فاكرها متحميك؟

أقسم على كل العشيره بالحضور الآن

أقسم على أهل الأرض بالانتقام من الصعلوك

أقسم على كل عشائر الخدام بأن يتقلوا الورثي.. خدمة وولاء

تصبحون خدامًا له معاونيين له ولاؤكم له

بدأت الحيطان تتغير وتسود وتتحول بشكل أنا عارفه كويس الشكل
اللي سُففته في الكابوس والحيطان ينزل منها حاجات صغيرة على الأرض
ومجرد ما تنزل تتحول لكلاب سودا تتحرك كلها ناحيتي وبعدها كائنات
زي اللي كانت في الكابوس قصيرة مرعبة.. كلهم جاين عليّ وإذا بي فجأة
اكتشف إني مربوط في الكرسي بشاش أسود مكتفني وبدأ يصرخ فيهم..!

أقسم عليكم بالانتقال للورث

التورث الآن.. يتسلم كل الأمور

الورث يكمل ما بدأه الأب بعد انتقال الأب..

أقسم عليكم أن تهلكوا حفيظة الآن ونادر وزوجة عثمان .

يا مازر عاوث.. يا ملك أيام الأسبوع

يا زاهق يا عازر يا شهورش يا ملوك الأرض الأسود

ردوا عليّ من أفضالي عليكم الآن..

ولقيته فتح الورقة الي كان طبقها وكمل كتبه لدقيقة بالضبط.

وصرخ بأعلى صوته الآن..

بدأوا يكشروا عن أنيابهم ويقتربوا مني.. وهو واقف يضحك زي
المجنون ويقول يا إبليس خادمك المخلص ستقتله جنية من الجحيم أوقف
انتقامها يا إبليس أوقف انتقامها.. لك ولائي دائماً وأبداً..

ووراه وهو واقف ظهرت الجنية وهو مش شايفها لكنها كانت أضخم
بكثير وشكلها شرس ومرعب أكثر ومفزع أكثر.. اتلفت لها وصرخ فيها:
غوري من هنا

«جاية عملي إيه، مهما عملتي مش هيرجع.. عثمان وعيلته أنا قضيت
عليهم.. مهما عملتي أنا قضيت عليك قبل ما تفكري تقضي عليّ..»

هتعيشي برضو تعيسة حتى بعد ما أموت.. عيشي في المعاناة وأنا هعيش
تحت عرش إبليس وهرجلك.. وعمرك ما هتعرفي معنى الراحة، لعتي
هتفضل تطاردك.»

انقضت الجنية عليه بمنتهى الشراسة وبقت عاملة زي سحابة الدخان
الي التفت حوالين الوقاد.. في نفس اللحظة هجمت الوحوش عليّ وبدأت
أحس إني بفقد الوعي لكنني سُفته سُفته وهو عينيه مبرقة في رعب شديد
سُفته وهو ييموت وهي ملفوفة حواليه زي الأفعى.. وسمعتة وعمري ما
هنسى جملة الأخيرة..

الوقاد: لا ! لا ! يعني إيه وعدتكم فأخلفتكم؟! .. يعني إيه بعيني
للجحيم.. بتخاف ربنا؟!!

لا ! أنا كنت عبد وخادم مطيع ليك..

لا.. لا.. لا.

دلوقتي بتقول إنك بتخشى ربنا وبتخاف منه يا إبليس.

خدمتك طول عمري ووهبتك كل ده

ويدأ صوت الوقاد يتخفق وحشرة الموت تخرج منه وأسمعها!

والدنيا ضلمت عليّ وسمعت همس الطفلة بتكلم في وداني، وقالت
مش هتموت يا نادر ماتخافش بس انقذ مروة وانقذ نفسك معاها..

فتحت عني فجاء زي اللي كان في كابوس.. إحنا فين الدنيا ضلمة
ومش شايف بس أنا لسه مكتف زي ما أنا بالكرمي بس الكرمي واقع
بيّ على جنبه.. إيه الضلمة دي.. وإيه الريجة دي..

الريجة دي تخوف ومقبضه أوي!

بصيت لبعيد شفت فتحة باين منها ضوء خافت.. إيه الأوضة دي..

سمعت صوت بكاء أنا عارفه كويس.. صوت مروة.

مروة: يا نادر أنت عايش الحمد لله هم جابوك ورموك هنا من كذا
ساعة وافكرتك مُتّ.

نادر: مروة انتي كويسة؟

مروة وهي بتعيط: الحمد لله إنك مامُتس.. أنا كنت مستنية أموت بين
لحظة والثانية أنا بقالي يوم كامل لوحدي هنا وعمال أنادي ومحدث بيرد
عليّ.

نادر: معلش أنا الوقاد كان مكتفني فمش عارف أتحرك.. هو احنا في
أي أوضة في بيته؟!

مرورة : إحنأ مش فف بفته!

نادر : أومال ففن ؟

مرورة : إحنأ فف فرفة!

نادر : إفه؟

مرورة : بقولك فف فرفة المفففن والأكفان حولفنا فف نادر!

شُففتهم بالنهار مرمفن ومن وقت مالدفنا بففلم كل حاجة بففقف

مرعبة.

نادر : ففب مالخر ففش لفه؟

مرورة : أنا مربوطة رفلف وإفدف .. نادر اسكت اسكت.

نادر : مش فاهم.

مرورة : ففه كل شوبة حد ففقف الفرفة .. هو حاجة فرفة مش فف بنف آدم.

نادر : فعنف إفه؟

مرورة : وطفف صوفك.

نادر : حاضر بس ففمفنف.

مرورة : طول مالدفنا مضملة ففقف شفة فرفف بقف قدام الفرفة

وطفلع أصواف مرعبة وفمشف ..

نادر : فف مالخلش الفرفة؟

مرورة : لا .. اسكت أنا سامعة صوف ففوفاته شكله فف.

سكتت وففلفت مركز مالقفش حاجة فف .. بدأت أحاول افك إفدف

من الكرسي ولا حتى رجلي.. مفيش فايدة.

سندت على ركبتي وحاولت أقف بالكرسي لكنني قعدت، ومع قعدتي ظهر شخص قدام القبر ومروءة همست إني أسكت خالص لكنني من خضتي وقعت بالكرسي الناحية الثانية لكنني وقعت على جثة حد متلج، المشهد فكرني بزمان لما وقعت على عم شحاته بس مش عارف أقوم نهائي من عليها.. لقيت ضوء جاي من برء القبر دخل جوة واتسلط جوة وشفت الجسم اللي أنا وقعت عليه فصرخت غصب عني: حفيظة!! ومع صرختي مروءة صرخت..

التفت لمصدر الضوء لاقبت الشخص الواقف برء هو اللي معاه كشاف فبدأت أصرخ فيه: أنت واقف تنفرج انزل الحقنا!
فضل واقف صامت تمامًا.

صرخت فيه يا ابني آدم أنت اتحرك أنت واقف تنفرج
فضل مسلط على وشي الكشاف وهو واقف متجمد
مروءة نظقت: قولتلك ده مش بني آدم، اسكت وهو هيمشي لوحده.
سلط الكشاف على وش مروءة، وهو واقف محلك سر

بعدها طفا نور الكشاف واتحرك بهدوء ومشي وأنا عمال أزعق.. كل ده وأنا واقع على جثة حفيظه.. بدأت أزحزح نفسي لحد ما وقعت من عليها ومروءة سكنت خالص بس سامعها كل شوية بتقول يارب.. يارب.

عشر دقائق والمشهد تكرر، وعاد ذلك الكائن بس شفته وهو بيتحرك كانت حركته فعلاً غريبة.. وقف دقائق صامت تمامًا.. بعدها نور الكشاف وسلطه على التربة من جوة وبدأت مع انعكاس نور الكشاف أبص على وش حفيظة وكانت حقيقي كارثة؛ عينها مفتوحة على آخرها ويوقها كمان

فتحاه على آخره وعلى ملامح وشها رعب وفزع رهيبة.. أكيد خدام الوقاد
انتقموا للوقاد منها.. وأنا كده بقى هربت!! كده الإنقاذ يعني!!

وفضل نور الكشاف يتجول في القبر.. حيطان القبر من جوة متهالكة
دايه وكأنها حيطان فرن يحترق ليلاً ونهاراً.

بدأت أكلمه تاني وكل ردوده الصمت.

أرجوك لو سامعني انقذنا.. هنموت هنا.

طيب لو خايف منّا.. روح هات أي حد من الشارع

طيب لو أنت جني أرجوك ارحمنا وخاف ربنا فينا.

لو انت أي كائن ارحمنا.

أول ما خلصت كلامي خرج منه صوت مرعب وأنين نحيف وأنفاس
متسارعة.

وبداً ينتلط على الأرض وصرخاته تتوالى ورا بعضه وقام مسلط
الكشاف على وشه.

مروءة صرخت صرخة دمرت اعصابي أكثر ما هي متدمرة.. صرخت
لأن ملامحه كانت تخوف وهو مسلط الكشاف على وشه.. قرية من ملامح
البشر لكنها تخوف.

قطع المشهد ده صوت زعيق جاي من بعيد!!

- واد يا جابر أنت بتهبب إيه هنا؟

- أمك كل يوم هتيجي تقولي أجيبك من التراب ولا إيه والصوت بدأ
يقرب وبدأ ينتلط ويشاور بالكشاف.

الراجل أو الشخص ده وصل ووقف جنبه، بص وقال له:

- أنت بتبص على إيه؟ وسلط الكشاف جوة هو كمان!

وبدا الكائن ده يقول كلام مش مفهوم كتير .

الرجل الثاني: هي التربة الملعونة بتاعة زمان دي حد فيها ولا إيه.. يا
سنة سودة إيه ده عفريت عفريت عفريت.. لأ عفريت اتنين!

صرخت فيه وقلت:

يا عم أنت..

مش عفاريت إحنا بني آدمين

حرامية خطفونا ورمونا هنا وعمالين نقول لجابر ده ينزل يفكنا مش
راضي.

الراجل الغريب: يا حول الله يارب.. امسك يادد يا جابر.. امسك يا
أهبل الكشاف لحد ما انزل أفكهم.

نزل الراجل وفكني وأنا فكيت مروة وسندتها وطلعنا من التربة
وبصيت على حفيظة آخر نظرة.. وشفت جابر وفهمت ليه ما عبرناش..
جابر عنده مرض عقلي لكن يعتبر هو السبب الرئيسي في إنقاذنا!

مشينا أنا ومروة والراجل عمال يكلم نفسه ويقول: التربة دي بتاعة
عيلة عثمان محدش بيقترب منها أعود بالله منهم ومن الوقاد وابنه.. وحفيظة
ماتت يلا مع السلامة! عقباهم، جوزها وابنها.

- وصلت مروة لباب بيتها وروحت أنا البيت لقيت أمي أول ما
شافتني صرخت دجال وساحر يا نادر ليه يا ابني ليه؟

اترميت في حضن أمي وفضلت أعيط زي الأطفال وهي كمان تعيط
وتقول لي يا نادر لي يا نادر لي يا نادر.

قُلتها: انتوا عرفتوا منين؟

والدتي: بعد ما أبوك رجع قُلتله اطلب مختار في بيته وحكى لنا على
كل ويدأ هو وأبوك يفكروا هيعملوا إيه كان يفكروا يروحوا للشيخ لطفى
لكنهم ما عرفوش يلاقوه فراحوا هم الاتنين يدوروا عليكموا.

نادر : يدوروا علينا فين؟

والدتي : في العزبة الغربية في بيت الوقاد..

نادر : طب أنا لازم أروح لهم.. لازم يبعدوا عن البيت ده.

والبلد كلها لازم تبعد عن البيت ده.. ده بيت كله شر!

والدتي : طب يا ابني خلي بالك من نفسك.

نادر : حاضر.

طلعت برّه لقيت واحد صاحبي معاه موتوسيكل طلبت منه
يوصلني مشوار وافق فورًا بعد ما شاف منظري المرعب وحس
إن فيه كارثة.. طرنا بالموتوسيكلو وصلنا بيت الوقاد وقُلت له
ماتدخلش رُوح أنت.. قالي طيب وهو مش فاهم ولا عارف حاجة
ومشي.. قُلتله خلاص خليك برّه مستني لما أخرج.

لقيت الباب مفتوح!

دخلت أجري على أوضة الوقاد.. لاقيتها مقلوبة وكل حاجة في
الأرض الكتب في الأرض التراييزة والكراسي مقلوبة الأرض مليانة
شعر أسود زي شعر الكائن المرعب..

بقيت أقلب الحاجات وكأني بدور على الوقاد نفسه لكن مفيش
حاجة وشكلها كده أبويا وعم مختار مجوش لسه.. سمعت صوت
ناس بتكلم والصوت كان جاي من برّه شكلهم هُما.. بخرجت
مالقتش حد لكن لاقيت أوضة منورة وبابها متوارب.. قربت منها
بحذر ووقفت برا.. لاقيت الوقاد نايم على سرير وجسمه متفحم
والراجل الكفيف واقف قدام السرير لا يصدر أي صوت أو حركة
وشخص تاني واقف وماسك كتاب وبيقرا منه وبيقول الكلام ده

الابن يرث الآن

الابن يتسلم الآن

الابن قبل الميراث

الابن يكمل ما بدأه الأب

الابن ينقل الأب الانتقال المؤقت

عائق - كافٍ - طلس - موت - بعث - جن الضلال - الوقاد.

الابن يرث الآن

الابن يتسلم الآن

الابن يكمل ما بدأه الأب

الابن ينقل الأب الانتقال المؤقت

عائق - كافٍ - طلس - موت - بعث - جن الضلال - الوقاد.

وكان مديني ضهره وبدأ يلف حوالين السرير ويصب سائل من
إبريق نحاس وصب على كل جزء من جسم الوقاد المتفحم.

ولما لف سُفت وشه كويس.. إيه ده.. الوش ده مش غريب عليّ
أبدأ.. الوش ده سُفته قبل كده..!!

هتجنن.. أيوة أنا عارف كده إن ده الوريث.. بس أنا سُفته قبل
كده فين؟!

آه.. افكرت.. إزاي كانت تايهة عن بالي..

الكابوس.. أيوة هو ده اللي ظهر في الكابوس هو والكائنات
الصغيرة بعد زيارتي لحفيظة الأولى وقالي إنه هو الوقاد.. حتى
حفيظة نفسها واضح إنها ماعرفتش.. بدليل إنها قالت لي إنه في
جن خادم بيتشكل على شكل الوقاد.. ويمكن يكون برضو جن
لكن اتشكل على هيئة الابن برضو هو ده اللي ظهر لي.. الوريث!
والي حوالية كانوا عشرة من الجن بتساعده..

انتبهت وهما يغطوه بملاية سودا جابها الابن.. وبدأ يولع شمع
ويحطه حوالين السرير.. أنا ما أعرفش هو ناوي يهيب إيه هيلع
فيه أكثر ما هو مولع ولا هيصحي عفاريتة.. مش عاوز أعرف..
برجع لورا برجلي عملت صوت فابنه بصص وأنا طلعت اجري من
غير صوت ودخلت أوضة الوقاد تاني وقفلت عليّ الباب واستنيت
شوية لكن محدش جه، كنت مستخبي ورا كرسي فُقت وقفت
عشان أمشي، وأنا قايم بصيت على الأرض لقيت ورقة افكرتها
دي الورقة اللي الوقاد كان منهمك في كتابتها قبل ما الجنية تتقم
منه فتحتها بالراحة وبكل حذر وبدأت اقرا المكتوب فيها.

وريثي..

أكتب لك اليوم لتعلم ماذا حدث..

لقد اقتحم عالم أيبك شخص يسمى نادر مصطفى فودة، هو

طالب جامعي.. أتى بغرض الفضول وأنا سمحت له بذلك حتى
أسلب روحه في النهاية.. وأنت معه فتاة ستكون خير عوناً لك
فيما بعد.. تدعى مروة.. لم تكن مريضة، ولكني مرضتها كي تكون
خادمتك .

لقد ذهب خادمي الأول، وقام بزيارته ليلاً في صورتك، ولكنه
لم يرتدع وظل فضوله يقتله.. إلى أن ذهب إلى عدوتنا الأولى، ذهب
لمن حرمتك من السيطرة المطلقة.. ذهب لمن قضت على حياتك
الأخرى السفلية.. الملعونة من كلينا حفيظة.. وشت بأسرارنا له
فكان القرار بإهلاكها..

اليوم أنا على يقين أن الجنية السوداء زوجة عثمان تواصلت معه
ليسمح لها بالدخول..

هو في في طريقه إلي الآن وقد سبقته خادمتك الجديدة مروة،
وأقيت بها في نفس مكان العقاب المعهود.. لتخرج منه لك..
خادمة، أسيرة، وزوجة.

أما هو فسأقتله بأيدي باردة قبل أن تنال مني الجنية السوداء.
الآن هو يجلس أمامي وسأقتله، وسأموت وأترك لك ميراثك،
لقد قمت بتجهيز تعويذة الإرث لأجلك بالفعل.

وريشي.. لقد دخلت الجنية السوداء وحانت نهايتي، وهي تحميه،
سألقي به في أرض العقاب.. الجنية أشم رائحتها الآن.. وتخلي عني
الشیطان لأجلها..

أشعر بحرارتها وبُغضبها.. الآن يا وريشي.. أترك لك كل شيء..
المنزل والعشيرة والخادم المخلص.. أكمل.. أكمل.. وانتقم من كل
بني آدم دون تفرقة.

الإمضاء: مِنْ صاحب الميراث الأول الوقاد إلى صاحب الميراث الثاني ورشي.. كساب!!!

الورقة اتشدت من إيدي ببص لاقيته ورايا غصب عني قُلت له: الوريث؟

الوريت: كساب.. كساب هو اسمي احفظه كويس.

وخذ الورقة وبدأ يقراها، وكل ما يخلص سطر يبص لي لحد ما جه عند الجزء الأخير قراه بصوت عالي.. «أنا استلمت الميراث» وبص لي وقال: طبعاً أنت بقى نادر..

نادر: أنا مكتش عاوز أعمل أي حاجة من ده قسماً بالله.

كساب: وأنا برضو مش عاوز أعمل أي حاجة من اللي هعمله فيك دلوقتي وهجم عليّ.. لكن سمعت صوت الباب بيتزق ودخل أبويا وعم مختار وضربوا الراجل الكفيف ولاقوني واقع على الأرض ومفيش حد غيري، كساب ده اختفى تماماً بس سامع صوته بيقولي «أنا هكون ذنبك الذي لا يُغفر..»

سندوني والدي والحاج مختار وقالوا لي لما دخلنا كنت كأنك

بتحوش عن نفسك حاجة بس مكنش فيه حد!

نادر: آه فاهم.. الحمد لله خير.

والدي والحاج مختار: واحنا جاين انتشر خبر انهم لاقوك جوا

تربة في العزبة جرينا الاول قالوا لينا فعلا لقينا اتنين بس مشبوا

فتاكدنا تماماً انكوا دول... وجينا على هنا بسرعة.

اتسندت على كتف والدي وخرجنا من أوضة الوقاد... وعم
مختار سألني أومال الوقاد ده فين؟

نادر: أهو محروق وميت في الأوضة دي.. وشاورت على الأوضة
من برة..

الحاج مختار: بجد مات؟ ازاي؟ أنا هادخل أشوفه

نادر: استنى هنيجي معاك... ودخلنا كلنا الأوضة... وشُفنا!

شُفنا سرير فاضل عليه ملاية سودا، ومفیش أي أثر لأي حد!!

الوقاد اختفى!!

عم مختار: الوقاد فين؟ اختفى ولآ مات ولآ إيه يا نادر

والدي: غار في ستين داهية.. اللي يهمننا ولادنا.. ارجع يا نادر
لدراستك وحياتك وسطنا يا ابني.

عم مختار: يعني هو مشي خلاص؟

نادر: حتى لو مشي فعلاً يا عم مختار، فهو ساب وراه الأسوأ
منه، ابنه الوريث... كساب.

«تمت»

تمت ولا أعلم هل هكذا إنتهى كل شيء؟

أم كل هذا كان مجرد بداية لكل شيء

شكراً... نادر فودة

كلمتين قبل ما نقفل الكتاب

دوما ما أحب أن أقرأ تعليقات القراء والمستمعين، وأتلقى مشاركتكم،
واللي دايمًا بتكون ما بين قصص من تأليفكم ومواقف غريبة تعرضتوا لها
حابين تشاركوني معاكوا فيها، كل ده بيكون سبب من أسباب استمرارى
ويديني دفعة قوية جدًا إني أحاول أقدم الأفضل، اسمحولي أشارككم معايا
بإحدى الرسائل اللي وصلت لي على صفحتي الخاصة على الفيس بوك،
واللي هي عبارة عن قصيدة بسيطة جدًا وجميلة ومعبرة جدًا..

أد إيه لقيتها معبره جدًا عن مشوارى ومغامراتى وتهورى

القصيدة كتبها الشاعرة الدكتورة «هالة يونس»

لك مني جزيل الشكر دكتور..

مكتوب لي أتهور

بلف وأدور عمال باتهور

عاش مفتون وجريء مجنون من وأنا لسه صغير
وفي ليل الضلمة سكون الصوت فجأة ينور
خيالات أشباح ارسم شكلها بالليل وأنصوّر
خايف من خوفي مش عارف أبرر
نفسي أنام ولا خلاص هستي أما أكبر

وأكبر وألف وأدور عمال باتهور

في زقاق مزنوق وجدار مشقوق
لقبر بعيد فيه صوت مخنوق
عمال بيعافر أضعف مخلوق

وألف وأدور عمال باتهور

عن راسب محلول ناشف مبلول
يشربه مشلول يقوم على طول
وأديب بهلول عره ابن أصول
يكتب طلاس قتل ومقغول

وَأَلْفَ وَأَدُورَ عَمَالٍ بِاتِهْوَرَّ
أَجْرِي فِي مَتَاهَاتٍ أَحْضَرَ جَلْسَاتٍ
وَأَزُورَ مَقَامَاتٍ عِلْشَانَ كِرَامَاتٍ
وَأَزَايَ يَنْفَعْنِي مِنْ بَعْدِ مَا مَاتَ

وَأَلْفَ وَأَدُورَ عَمَالٍ بِاتِهْوَرَّ
عَنْ نِدَاهَةِ وَجْنِيَّةٍ فِي التَّرْعَةِ الْمِصْرِيَّةِ
نَهَارِكَ فِي الدَّرَةِ وَلَيْلِكَ فِي الْمِيَّةِ
بِيْتَوْلِدُوا وَيَمُوتُوا وَأَنْتِي عَمِيَّةٌ

وَأَلْفَ وَأَدُورَ عَمَالٍ بِاتِهْوَرَّ
حَاجَةٌ تَقْرِبُنِي وَحَاجَةٌ تَبْتَعِدُنِي عَنْ سِرِّ فِرَاعَةِ
عَنْ حَارِسِ اللَّكْتَزِ وَسَايِبِيْنِهِ لَعْنَةُ
عَايِزِينَ يَتَغْنِي.. وَسَاِحِرِ مَغْرِبِي.. يَأْكُدُ لَنَا
وَهَنْحَفْرُ هُنَا

. وَأَنْ مَا تَمَتْنَا

وَاحِدٌ رَيْنَا

بِغْفَرٍ وَسَامِحٍ.. فِدَا كَتَرْنَا

وَأَلْفَ وَأَدُورَ عَمَالٍ بِاتِهْوَرَّ
وَتَفْضِلُ حَيَاتِي.. صَفْحَةٌ فِي كَشْكُولِ
طَبَاشِيرِ فِي فِصُولِ
أَنَا مِينَ ١٩
طَيِّبٌ مَعْلُولٌ

واعى مسطول

عاقل مخبول

لا.. أنا كل دول

ورا المجهول

حاجة تقولي ليه بلف وأدور عمال باتهور

دي أسرار الكون في كتاب مكنون

يا تعيش مؤمن أو كافر ملعون

بيتي وبيتك لازم مسكون

يا عمال البيت سلام وسكون

أما أنا..!!

هلف وأدور مكتوب لي أنهور

خطواتي متاعب.. أمشي عليها ولأ مش همشي.. قلدي هيقدر

أنا ساجن خوفي.. حبسه من صفري.. زنزاته ضلوعي..

ولقبته بيكبر

أنا أكبر منه.. أنا مارد خوفي قدامي بيصغر

تادرو.. عاشق للضلمة أغسل فيها وشي وأتكحل بسواده الأسمر

وأفضل ألف وأدور مكتوب لي أنهور